

**NATIONAL ASSEMBLY OF
SEYCHELLES**

Friday 30th October, 2020

The Assembly met at 9:02am

National Anthem

Moment of Reflection

Mr Speaker in the Chair

MR SPEAKER

Mersi. En pti item *housekeeping*, avan nou konmanse, e sa se lo size delo. Nou'n gannyen en pti diskisyon, avek Madanm Clerk. *Plastic bottles out of the question* pou diferan rezon. Pa zis lanvironnman, me apre nou realize, cost osi e apre sirtou nou anvi evit en disparite kalite boutey lo latab. E sa i enkli si ou, ou anmenn ou prop boutey.

Me parkont nou annan en solisyon ki mon krwar i ava *suit* nou byen. Nou annan en *sponsored* en *well-wisher* ki anvi *donate* nou 35 boutey *glass bottles*, ki byen prezante, e i pou met logo Lasanble avek non bann Manm lo la.

So sak dimoun i kapab annan son prop boutey ver e ou zis bezwen okip li ou menm. I ou *personal bottle*, e *the first one* i *free*. Si i arive apre ki zot

bezwen sanze, la zot a gete si zot bezwen pey zot menm. So fotespere sa i *solve* sa problemm. Ok, mersi bokou. Nou a prosede avek Mosyon. E mon apel Onorab Georges.

HON BERNARD GEORGES

Mersi Mr Speaker. Bonzour Mr Speaker. Bonzour tou bann Manm dan Lasanble, e tou dimoun ki pe swiv nou dan lakour. Mr Speaker nou premye Mosyon bomaten i lir *comme suit* *In accordance with Articles 63(1) and 69(2) of the Constitution, this Assembly approves the proposed appointment by the President of the Republic of Mrs Devika, Sumitra, Kathrina Vidot to the office of Minister.* Mersi Mr Speaker.

MR SPEAKER

Thank you. Eski Mosyon i ganny segonde? Onorab Desheila Bastienne.

HON DESHEILA BASTIENNE

Bonzour Mr Speaker. Bonzour tou Manm Onorab. Mr Speaker Mosyon i ganny segonde.

MR SPEAKER

Mersi. E avek sa nou ava apel Mrs Devika Vidot. E nou a *move* dan *Committee Stage* mersi. Mrs Vidot bonzour, e

byenveni dan Lasanble. Nou pou demann ou par konmans avek en pti lentrodiksyon personnel bref 2 a 3 minit avan nou prosede avek kestyon bann Manm. Mrs Vidot.

MRS DEVIKA VIDOT

Bonzour Mr Speaker. Bonzour tou Manm Lasanble. Dabor mon ti a kontan konmanse par felisit zot tou zot apwentman. En gran bonzour spesyal i al pou Lepep Seselwa ki pe regard mon ozordi bomaten. Mon non i Devika Vidot. Mon'n ne Takamaka, e grandi dan distrik Baie Lazare. Mon annan 31 byento pe al vin 32an. Mon'n marye, 2 zanfan. En pti pe lo mon parkour akademik.

Mon ti *graduate* an 2011 *from University of Manchester* dan en *Degree in Accounting and Finance*. Apre sa kan mon'n fer mon retour Sesel mon'n konmans travay plizoumwèn, dan *Financial Services Industry* parey zot pou vwar lo mon CV. I en pti pe dan odit osi, so en pe de sa.

Mon'n *focus* lo pourswiv mon akademik kalifikasyon e *professional* aplikasyon, alor mon ti konmans antreprann pou fer mon *ACCA part-time*. So an menm tan ki mon ti pe travay, mon ti pe fer sa kalifikasyon *self-funded*. Mon ti

pe pey lo mwan menm. So mon'n persevere mon'n arive konplet sa. Ozordi *I am a proud member of ACCA*. E mon pe *aspire to become a Fellow* e sa pou arive lannen prosen, kan mon fer mon laplikasyon.

Mon pa'n aret lanmenm. Touzour pandan kan mon pe travay, mon'n osi fer en *MSc in Profession Accountancy* ki mon ti konplete 2017 e mon'n *graduate*.

An se moman mon pe diriz en lakonpanyen *offshore*, en *ICSP* ki Seselwa i plito konn li konman *offshore*. I en term ki zot pli familye avek. Mersi.

MR SPEAKER

Mersi Mrs Vidot. Wi nou a konmanse e parey pratik ki mon pe adopte, mon a pran 2 kestyon, oubyen 1 apre lot kote, dapre lakantite ki i annan lo soz. Pou lemoman lakantite i paret balanse. Alor mon a konmans isi avek Onorab Cosgrow.

HON WALLACE COSGROW

Bonzour Mr Speaker. Bonzour tou dimoun ki pe ekoute, bonzour tou Manm Onorab. Bonzour Mrs Vidot.

Mrs Vidot, ler mon get ou CV i en CV tre enteresan, pou en zenn profesyonnel sirtou en zenn profesyonnel sa laz ki ou

ete. Mrs Vidot ler mon get ou CV ou en dimoun ki'n fer bokou dan domenn finans, dan domenn *accounting*, e ou pe travay *comme* dir ou menm, plizoumwèn dan domenn *offshore*, fer en pti pe letan *Seybrew* plizoumwèn dan domenn *offshore*.

Ki ou panse an term ou leksperyans, dan domenn *offshore* dan domenn finans, ki ou panse ou kapab anmennen, lo nivo *Cabinet*, si ou, *well* si ou ganny apwente Minis. Akoz nou pa konnen pou lemoman ki portfolyo ki ou pou okipe. Me si ou ganny apwente Minis ki leksperyans ou krwar ou kapab anmennen lo *Cabinet*? Akoz konman ou konnen, poudir nou annan en kantite lizye lo nou lo sa domenn *offshore*, dan sa domenn *anti-money laundering*, bann domenn konpanyen *offshore*? So ki panse ou kapab anmennen lo *Cabinet* pou sey met Sesel en pti pe pli dan kler lo sa kote lo sa domenn la? Mersi bokou Mr Speaker.

MR SPEAKER

Mersi Onorab. Mrs Vidot.

MRS DEVIKA VIDOT

Mersi Mr Speaker. Mersi Onorab pou ou kestyon. Bon mon panse ki dan atraver leksperyans ki mon'n anmase

dan lendistri *offshore*, in donn mon en kantite bagaz an term premyerman enterpretasyon Lalwa aplikasyon Lalwa. Mon'n osi ganny *exposure* enternasyonalman avek bann diferan fason fer, diferan pei lafason keksoz i ganny deroule.

Mon pwennvi se ki lo kote Sesel, an se moman zot bezwen konnen zot tou poudir *OECD* nou *under scrutiny from the OECD*. E Sesel lo son kote in fer en kantite pou sey *meet requirements*, pou *meet* standar. E *still* nou pe vwar poudir i annan mankman. Nou annan ankor *room* pou devlope.

So mon panse ki *through* sa leksperyans, *through* sa bann *followings* ki mon pe fer, keksoz ki mwan mon kapab anmenn devan, kapab anmenn kot *Cabinet*, akoz mon pa ankor konn mon portfolyo an se moman. Me sa leksperyans ki mon'n gannyan *through* tou sa letan ki mon pe swiv sa, mon krwar ki atraver sa mon'n kapab formil serten ki ou a dir en lopinyon, ou serten bann mo stratezi ki mon panse, i pou pli bon pou pei.

Par egzanp mon panse ki i annan serten lenzistis mon panse ki pe ganny fer avek bann *Small Island States* ki annan bann *offshore sector* kot par egzanp, sa bann gro pei zot pa

pe regard tro byen zot *domestic regulations*. Me zot pe plito enpoz lo nou sa bann pti pei.

E i annan resers ki'n ganny fer, e mon panse ki nou osi nou bezwen zwe en pli gran rol, e met nou kontribisyon devan konman Sesel, konman en Nasyon, met devan pou nou pli kapab defann nou lekòr. Sa i en keksoz ki mon panse mon kapab ede pou *achieve*.

Lo kote mon lezot leksperyans atraver mon karyer *in terms of*, mon'n ganny en kantite bagaz dan *accountability*. Sa i enn bann kalite enn mon bann prensip for ki mwan mon annan. E mon panse ki sa kalite letan mon pou antre dan *Cabinet*, i enn ki pou fer sa Minister ki mon pe al dirize, i pou enn ki'n ganny fonde lo *fairness, accountability*. E ki mon pe *hope* ki sa osi i ava *transpire* dan *Cabinet* an antye, ki mon kapab ed mon bann koleg, ki nou kapab *by* adopte bann prensip, bann Polisi ki swiv sa menm laliny. Mersi.

MR SPEAKER

Mersi Mrs Vidot. Onorab Gervais Henrie.

HON GERVAIS HENRIE

Mersi Mr Speaker. Bonzour tou dimoun. Bonzour Mrs Vidot. Mon enterese dan prosperite

Sesel, e i annan lontan ki nou parti pe koz lo met larzan dan pos Seselwa. Avek ou *background*, mon anvi ou donn mon 3 nide ki ou kapab met delavan avek *Cabinet*, pou fer ki sak Seselwa a lafen 5an manda ladministrasyon Mr Ramkalawan, nou santi nou annan plis larzan dan nou pos. Mersi.

MR SPEAKER

Mersi Onorab. Mrs Vidot mon byen satisfè ki ou premye repons in bref e *to the point* e mon a zis demann ou pou kontinyen dan menm stil. Mersi. Mrs Vidot.

MRS DEVIKA VIDOT

Ok, sorry mersi Onorab pou ou kestyon. Petet mon a konmans avek lo kote lantreprenarya lo kote biznes Sesel. An se moman mon krwar tro bokou *reliance* ti pe ganny mete dan nou lekonomi lo Sektè Tourizm.

Alor enn bann nide petet ki mon kapab vin avek devan se, devlop diversifye nou lekonomi. Alor devlop lantreprenarya. E ou pou remarke poudir an se moman nou pe *go through* Sesel pe *host the Global Entrepreneurship Week*. *So we are the host*. So sa i en pa an avan. E mon panse

ki sa i en *very good way forward*, e ki Gouvernman i merit kontinyen avek.

So *through* diversite lekonomi nou kapab *empower* nou bann dimoun, pou *add* diferan laspe biznes. So ou pou pe ankouraz biznesmenn pou al dan divers Sekter Lekonomi, *ok?* Pa zis *focus* lo *Tourism*. Byensir i annan ki, i annan ankor an plis ki kapab ganny fer lo kote *Tourism*, parey i annan bann *recreation activities*, ki mwan monpanse fransman an se moman, nou bann biznesmenn pa pe *venture* ase ladan.

I ti pou osi benefisye nou bann touris kan i vin Sesel ki zot annan keksoz pou fer alor *spend* plis larzan dan nou lekonomi. *Ok?* be ler nou napa sa servis pou donn zot, zot pa pe *spend* sa kantite. *Spend* lo lozman epi zot al se zot. Zot servi nou lans ki pou naryen e zot retourn se zot.

Bon dezyenmman, dan sa menm laliny devlop Sekter Lendistri, monpanse ki Gouvernman i kapab regard dan alokasyon later. An se moman i annan en mankman dan later endistriyel, pou fer ki bann biznesmenn i kapab epanouir, ouver zot biznes epanouir. So sa i en landrwa kle ki nou bezwen regard ladan.

Trwazyenmman, monpanse ki lo en nivo lazenes, Gouvernman i bezwen pli angaze pou li met an plas bann prosedir bann Polisi ki angaz lazenes depi en tre zennaz, ki ou met en vizyon avek zot. Zot ledikasyon i enportan. Sa ki pa *the* doue entelektyelman zot osi zot annan talan dan zot lanmen. E sa fodre zot realize. E nou bezwen fer zot realize. Ki zot, zot karyer dan zot lanmen, e sa i kapab lakle e sa i pou anmenn zot larzan.

So devlop zot *skills* ed zot devlop zot *skill*;- realiz zot potansyel e atraver sa ed zot pou zot kapab devlop sa fer li vin en biznes, pou ki demen nou pa pe bezwen *rely* lo kontrakter ki vini *from* aletranze or pe *rely* lo *GOP* ki nou pe donn avek *expatriate* pou vin fer nou louvraz.

Ok monpanse ki lazenes an se moman, i sa i en mankman dan lazenes. Mersi.

MR SPEAKER

Mersi Mrs Vidot. Onorab Rosie Bistoquet.

HON ROSIE BISTOQUET

Bonzour Mr Chair. Bonzour tou bann Onorab. Bonzour Mrs Vidot e mon pou dir en bonzour spesyal pou tou piblik ki pe

ekoute, spesyalman bann dimoun Point Larue.

Mrs Vidot, koman en zenn profesyonnel mon remarke osi ou byen vokal. Akoz ou krwar ou'n ganny swazir parmi lezot zenn dan ou kalib pou form parti *Cabinet of Ministers*? Apre lot kestyon mon pou demann ou, ki kontribisyon ou pou anmennen pou enspir lezot zenn parey ou? Mersi.

MR SPEAKER

Mersi Onorab. Mrs Vidot.

MRS DEVIKA VIDOT

Mersi Onorab pou ou kestyon. Bon, mon panse ki mon'n ganny swazir premyerman, *primarily, based*, lo kalifikasyon ki mon'n annan. E mon osi panse ki parey ou'n dir mon tre vokal. So, i annan serten kalite petet in ganny demontre dan lafason ki mon travay, lafason ki mon enterakte avek dimoun. Mon en dimoun ki kontan konverse, ki kontan konekte avek dimoun. So, mon panse ki sa i enn bann kalite, ki petet in fer ki sa bann dimoun ki lo sa *selection Committee* zot in vremen vwar dan mwan.

E mon priye ki si mon ganny aprouve, avek zot laprouvasyon definitivman, mon vin sa letensel pou lazenes Seselwa. Ki lazenes Seselwa i

vwar poudir zenn profesyonnel i annan son plas dan nou pei. Selman nou bezwen pare pou vin devan pou nou kontribye. Fodre pa ki nou pe ezite. Alors sa i enn bann fakter ki mon krwar se pour sa rezon ki mon'n ganny selekte. Mersi.

MR SPEAKER

Mersi Mrs Vidot. Onorab Churchill Gill.

HON CHURCHILL GILL

Mersi Mr Chair. Bonzour tou prezan, bonzour Mrs Vidot. Pour Bidze 2021, nou Bidze pou tre *tight*, zisteman akoz larzan dan kof Leta i tre limite ki pe antre ozordi. E sa i pou nesedit annan en *budgetary control* dan tou Minister. An menm tan i annan bann komitman enternasyonal ki pei i annan, ki Gouvernman in komit pei, ki nou bezwen pey serten *fees* pou bann afilyasyon.

Eski baze lo ou CV, mon vwar ki i annan bokou kalite ladan ki kapab fer en kontribisyon ase sibstansyel, eski ler ou'n ganny konfirman dan nou *post*, ou pou kapab annan sa kouraz pou dir avek ou *Cabinet* ki nou bezwen annan en *internal control*, tre efikas dan tou Minister? E an menm tan, pou nou fer bann *spending* kot nou devret, pou

asire ki i annan en priyorite ki byen definir. Sa aköz nou pou annan en Bidze tre limite, se sa ki nou pou bezwen sa bann serten kontrol.

Eski sa bann keksoz ki ou krwar i ti pou ed *cabinet* si nou ti kapab *reinforce* li? Mersi.

MR SPEAKER

Mersi Onorab. Mrs Vidot.

MRS DEVIKA VIDOT

Mersi Onorab pou keştyon. Byensir baze lo tou sa ki ou'n dir, egzaktaman sa ki mon anvizaze pe al fer. Dan mon *academic careers, as well* ki dan mon karyer profesyonnel, sa ki ou aprann se ki i vreman enportan pou en Gouvernman, pou en *public sector*, i annan 3 kalite ki i bezwen swiv, e se *effectiveness, efficiency, economy*. So, *effectiveness* i vedir, nou bezwen swazir *the right things to do at the right time*. Ok, so nou pou bezwen selekte kwa ki pli enportan pou fer. Sa i form par nou *effectiveness*.

Efficiency i dezyenm, so nou bezwen swazir keksoz e fer li byen. Keksoz ki nou'n selekte pou fer, nou pou bezwen fer li dan en fason ki *efficient, right*? E finalman *in terms of economy*, sa mon pe *refer to productivity*. Mon pe met li an Angle, eskize

sa bann *term. Productivity*, sa se nou bezwen kapab *maximize* nou *output*, baze lo sa *input* ki nou'n ganny donnen.

So, nou bezwen fer en fason ki nou servi nou resours, nou *utilize* nou bann resours *to the maximum capacity possible*. E sa i enkli nou resours imen, so nou bann dimoun. So, nou bezwen konnen ki mannyer pou retir zot dan en serten fonksyon ouswa plas zot dan en lot pou fer ki zot vin pli *efficient*. E i enkli osi nou resours finansyer. Larzan ki nou gannyen donn pou travay avek. Nou bezwen rode ki fason ki nou kapab fer sa de bout zwenn. e mon panse sa i fason pli byen pou fer. Mersi.

MR SPEAKER

Mersi Mrs Vidot. Onorab John Hoareau.

HON JOHN HOAREAU

Mersi Mr Chair. Bonzour Mr Chair. Bonzour tou dimoun a lekout, bonzour Ms. Vidot. Ms. Vidot, mon pou al en pti pe lo laliny ki Onorab Bistoquet in al lo la, mon pou demann ou Ms. Vidot, mon krwar ki ou konn tre byen sa dikton dan lemonn biznes ki dir, *there are no bad workers but there are bad managers*.

Si ou a latet en lorganizasyon, ou bezwen aksepte sikse e ou bezwen aksepte osi *failure* sa lorganizasyon. Alor ki karakter ki ou krwar koman en zenn Minis, ou devret fer ki ou annan pou ou kapab asire ki ou annan, sikse dan ou Minister? Dezyenman i enn ki en pti pe lo baz filozofikal. Ms. Vidot an vi ki ou'n fer bokou travay dan Sekter Finansyel e biznes, ki ou panse lo *tax system* Sesel? Eski nou annan tro bokou *tax*. Eski sa pe annan en lenpak lo pri lavi. Mersi?

MR SPEAKER

Mersi Onorab. Mrs Vidot.

MRS DEVIKA VIDOT

Mersi Onorab pou ou kestyon. Premyerman an term kalite pou *manage* Minister, mon'n konmans avek sa, *in terms of* kalite ki mon posede, sa se *accountability*. Mon panse ki sa premyerman i en kalite vreman enportan ki koman en Minis mon pou posede, ki fer ki mon pou pare pou mwan *take the success or the fall*. Mon pou *accountable* pou mon Minister, ki i pe fer byen, ki i pe fer mal. Me definitivman mon pou fer mon mye ki mon Minister pe performen. Mon pa krwar sa i en *point of contention, to be fair*.

I annan lezot faktè selman ki mon panse en *good leader*, i bezwen posed pou li kapab diriz en lorganizasyon, dan sa ka en Minister. So, *humility*. Ou bezwen mazin, ou bezwen *humble*. Ou bezwen mazin akòz ki ou la. Ou la pou deservi en serten fonksyon, ou la pou deservi ou pep, nou la pou deservi Lepep Seselwa. Nou pou ganny konfyè zot bann resours e nou bezwen fer sir ki nou pe servi zot bann resours byen.

I annan osi *empowerment*. Mon bezwen fer sir ki koman en Minis mon pe kapab *empower* mon bann dimoun par anba mwan. Mon bezwen donn zot sa lespas pou zot *grow*, e mon bezwen ed zot dan sa demars. *In terms of* kominikasyon. Kominikasyon osi i kle. Nou bezwen kapab etabli en laliny kot i fasil or ki mon bann *staff* i santi i konfortab pou kominike, pou donn zot *feedback*, pou donn zot *input* a nenport ki moman.

Se atraver sa bann keksoz koumsa, ganny *feedback* avek ou *staff*, ganny zot kolaborasyon, ganny zot konprenezon. Se sa ki pou fer sikse en Minister. Akòz dan Minister nou annan servis ki nou ofer. Nou pa vann prodwi, nou vann nou servis, sa ki nou

annan e nou *human resource* i lakle pou nou kapab delivre sa servis a sa nivo ki tre o.

Dezyenm nou'n demann mwan *in relation to taxes in Seychelles*. Sa i en laspe ki mon vremen fasinen *about. Taxes in Seychelles*, mon swiv li de pre. Mon panse ki an se moman, mon konn ase byen lo laplipar bann *taxes ki enforce in Seychelles*, wi. Mon pa pou kapab *at this point in time*, dir ou wi i annan tro bokou ouswa i annan mwens. Akoz mon napa tou lenformasyon. Mon pa *privy* to sa bann lenformasyon pou mwan kapab donn ou, pou fer sa *deduction*. Ou bezwen fer plis konsiltasyon.

Me sa ki mon kapab dir ou, lobzervasyon ki mon'n fer se ki i annan de kalite *tax* ki mon panse, i pa aplikab to serten endividyel *or companies* e ki kapab ganny *restructured*. Sa definitivman mon pou kapab asir ou, poudir mon vwar poudir personnelman i annan *improvement* pou fer lo sa kote. Me *in regards to too much or too little*, sa nou pou bezwen fer en *proper* analiz pou kapab determinen. Mersi.

MR SPEAKER

Mersi Mrs Vidot. Onorab Johan Loze.

HON JOHAN LOZE

Mersi Mr Speaker. Madanm Vidot mon annan en kestyon tre bref pou ou. Eski ou santi dan ou kapasite koman en Minis, ou posed ase lafors karakter pou azir koman en *beacon of hope* pou lazenes Seselwa an zeneral? Vi ki ou manm pli zenn *Cabinet* Minis. E pou bann zenn profesyonnel Seselwa an partikilye e pou tou zenn Seselwa *in the workforce*? Mersi Mr Speaker.

MR SPEAKER

Mersi Onorab. Mrs Vidot.

MRS DEVIKA VIDOT

Mersi Onorab pou ou kestyon. Parey mon ti komanse lo komansman, mon'n fer resorti. Mon pe swete ki par mon prezans dan *Cabinet* sa i ava vin en lenspirasyon pou nou zenn Seselwa. E mon panse ki wi, mon kapab fer sa diferans. Mon panse ki mon karakter, mon enn ki konekte tre byen avek dimoun. *Primarily* mon annan en kantite respe pou dimoun.

So, lafason ki mon kominik avek dimoun, mon kominik avek respe. E mon panse ki atraver mon leksperyans mon'n vwar ki lafason ki ou, ou apros dimoun, ki ou koz avek dimoun, ou

resevwar parey. E mon pa vwar poudir akoz mon pli zenn lo sa *Cabinet* ki i pou fer ki mon pa pou kapab enterakte ou kominike, ou fer pase mon pwèn devan.

Akoz mon panse ki mon bann koleg i pou *afford* mwan menm respe ki mwan mon'n *afford* avek zot. So, mon pa pe vwar sa koman en *huddle*. Sa lapwentman mon vwar li definitivman i pou *challenging*, me selman mon pran li koman en *task*, parey nenport ki *task* ki ganny met devan mwan, e mon pou fer li avek tou mon abilite e tou mon determinasyon. E mon espere ki mon fer tou dimoun fyer. Mersi.

MR SPEAKER

Mersi. Onorab Richard Labrosse.

HON RICHARD LABROSSE

Bonzour tou mon bann koleg. Bonzour tou bann ki a lekout, spesyalman zabitan Plaisance. Mrs Vidot dabor felisitasyon, ou'n dan en lendistri ki nou'n ansanm pou en pe letan. So, ozordi mon keston i pou baze lo sa. Parey ler mon pe get ou CV, ou'n fer *regulatory compliance*, ou annan leksperyans *financial services*, ou'n osi annan *auditing* e osi

leksperyans travay avek lotorite. So, an bref si ou kapab dir nou, kwa ki ou santi ki merit en pti git lezel, parey nou dir divan anba lezel dan Lendistri *Offshore* an se moman? Parey la ki nou konnen osi ki Sesel osi i dan en pti pe problem. Mersi.

MR SPEAKER

Mersi Onorab. Mrs Vidot.

MRS DEVIKA VIDOT

Mersi Onorab pou keston. Bon ki mon panse se ki sa ki nou'n fek pas atraver, nou'n fek pas atraver *COVID-19* sa pandemi. E nou'n vwar ki in *hit* nou *tourism industry very harshly*. Ki in enpakte severman lo nou lekonomi. Me kwa ki fasinan pandan sa bann letan, se ki i annan sa sekter, i annan Sekter *Financial Services Industry* ki li malgre in kapab ganny afekte, me in pli *resilient* dan tousala. Se byensir se akoz *the nature of sa industry*. *Nature of sa industry*, i en *industry* ki ou pe bezwen kontak fizikal avek ou bann kliyan. Alors tou keksoz pe ganny fer *virtual*.

Alors i enn sa bann lendistri ki'n kapab soutenir son pwisans pandan sa bann letan, e ou bezwen konnen poudir *the FSA* ti fer

kontribisyon avek Gouvernman. E *tout au long* in kontinyelman marse e nou'n fer antre dolar, *foreign exchange basically* dan nou sistenm ki'n ede pou soutenir nou lekonomi.

Alors, mon panse an term Gouvernman ki i bezwen kontinyen. Ki i remark potansyel *Financial Services Industry* e i kontinyen donn sa lankourazman sa lendistri. Donn li sa lenportans, regarde kwa ki kapab ganny fer. Annan antretyen avek *the regulatory authority*. Regarde ki kontrent ki bann dimoun ki dan prive dan sa sekter pe fas avek pou nou kapab *overcome* sa bann defi. Akoz mwan mon panse ki sa lendistri i annan en kantite potansyel, malgre *scrutiny from the OECD*, mon panse i pou annan fason ki nou pou kapab *overcome* tousala. Mersi.

MR SPEAKER

Mersi Mrs Vidot. Onorab Kelly Samynadin.

HON KELLY SAMYNADIN

Mersi Mr Speaker. Bonzour tou mon bann koleg Onorab e bonzour Mrs Vidot. Ou'n koz lo plizyer kalite ki ou pou bezwen, pou ou kapab antre dan ou pos ministeryel e osi koman en Dirizan. Me mwan mon ti ava kontan konnen, ou pe al koz lo

ou bann kalite byensir, mon ti a kontan konnen ki bann kalite, ou bann valer ki ou panse ou devret annan, pou ou kapab *relate* pli byen avek ou *staff*, ki pli aze oubyen bann ki pli ansyen. Akoz byensir sa i pou inevitab, ou pou annan diferan kous, diferan group laz dimoun dan ou *staff*. Si ou kapab elabor en pti pe lo la silvouple. Mersi.

MR SPEAKER

Mersi Onorab. Mrs Vidot.

MRS DEVIKA VIDOT

Mersi Onorab pou ou kestyon. Koman en zenn ou osi, mon panse ou osi ou pe fer fas avek serten defi. Ou osi *amongst your colleagues*. Me parey mon'n dir, mon pa krwar poudir nou laz i merit annan okenn lenpak lo la kalite travay ki nou *deliver*. Ok, sa i bezwen *stand from* kalite ki nou posede, kalifikasyon ki nou annan e ki mannyer ki nou kapab fer sa *come across*.

Bon, *in terms of staff*, ki mannyer mon anvizaze *manage* zot? Premyerman se mon'n mansyonnen oparavan, kominikasyon. *Maintain a good line of communication* ki dimoun i kapab donn zot *feedback*, koze e eksplike. Byensir koman mon pou antre dan sa pozisyon mon

pou bezwen *rely* en kantite lo tou mon *staff* e a tou moman. Akoz zot ki pou bezwen pe enterakte avek mwan, pou les mwan konnen ki mannyer keksoz i pe marse, kwa ki pe mars byen, a zot avi kwa ki pe mars mal. Akoz apre tou zot ki *on the ground*, zot ki fer fas avek bann keksoz *on a day-to-day basis*. So, i enportan sa kominikasyon, sa ekout, sa latant. Ou bezwen fer sir ki sa i arive.

So, an menm tan, mon anvizaze *build* bann *positive working relationships* avek zot. Savedir *aside from* en nivo profesyonnel, me i bon ki ou osi konnen en dimoun en pti pe plis, pou ki ou kapab pli byen konpran kote ki ou kapab *better* plas sa dimoun dan lorganizasyon.

E *in terms of feedback* pou zot osi, kan *staff* pe *perform extremely well* ou bezwen pe *commend* zot, me kan keksoz pe mars mal osi ou bezwen pe les zot konnen. Sa i enportan. Nou pa pou kapab annan en Minister kan keksoz pe mars mal nou reste trankil, nou pa dir. Nou bezwen annan sa lavolonte. Nou bezwen annan sa pouvwar pou koze, kominik avek nou *staff*. Wi, mon *command* ou pou, sa me i annan keksoz pou *improve*. So,

nou bezwen *être* reel, nou bezwen *être* fran e pou nou kapab bouz devan.

Finalman mon krwar in *term of* an zeneral, mon krwar fodre senpleman *in terms of delegation*, mon bezwen fer sir ki tou kou pe *delegate*, fer pase mon bann pwen dan en fason ki kler, pour ki keksoz i ganny fer atan e ki nou evit okenn dezapwentman dan nou Minister.

MR SPEAKER

Mersi Madanm. Onorab Egbert Aglae.

HON EGBERT AGLAE

Mersi Mr Chair. Bonzour Mrs Vidot e tou Manm Onorab. Petet Mrs Vidot, mon santi mwan soulaze ler mon vwar *as* en 32an ou pe vin en Minis, e sa i poz en lespwar pou nou zenn ki la. Premyerman baze lo ou bann larepons ki ou'n donn nou, petet enn ou bann *challenges* ki ou riske pe fer fas avek koman en zenn Minis, ou pe al ansarz en Minister la, pou annan bokou travayer ki pli vye ki ou byensir.

Ki mannyer ou pe al sitye ou, akoz in annan bann serten *mindset*, oubyen mantalite, ki i kapab poz en dominasyon lo ou lotorite dan sa Minister. Ki mannyer ou krwar ou pou

kapab fer fas avek sa kalite *challenges*, pou ou kapab fer sir ki napa okenn *undermining* ki arive, ki ou Minister i fonksyonnen?

Dezyenman ou'n annan en antretyen mon kapab dir, leksperyans avek sa *offshore sector*. Ki manner la dan sa moman letan, kot lekonmi i dan problem e *offshore sector*, mon konpran se i pe anmenn en pe larzan dan lekonmi, ki manner ou kapab petet pous en pe plis atraver ou portfolyo ouswa lo *Cabinet* menm pou fer ki sa Sekter i kapab anmenn plis an term deviz etranzer pou pei ?

E osi ki manner ou pou travay etrwatman an kolaborasyon, avek sa bann lezot lazans ki dan Sekter Finansyel. Akoz nou'n vwar ki dan lepase in annan bann malantandi an term sirtou, kot i konsern regilasyon. E kot Sesel par fwa in ganny mete lo bann *White List, Black List*. Ki manner ou krwar ou pou kapab re armoniz sa sekter ansanm ki zot tou, zot lo en menm *level*.

E dernyerman Mrs Vidot, dan en Minister ou pou pe vwar piblik osi. Eski ou santi poudir ou pou kapab, sirtou avek lekspektasyon ki pep i annan li menm li, ler ou pou dan

Minister, ou pou kapab tenir sa bann lekspektasyon dimoun pou fer zot konpran lo sa servis ki ou, ou kapab ofer zot ozordi avek sityasyon ki nou ladan? Mersi.

MR SPEAKER

Mersi Onorab. Mrs Vidot.

MRS DEVIKA VIDOT

Bon mersi Onorab pou ou bann kestyon. Mon pou sey reponn tou, si an ka mon manke ou ava les mwan konnen mon a ava zis *go back* lo la, *ok?* Premyerman ou'n adres bann dimoun ki pou pli aze ki mwan. E lo kote sa, ki mon larepons pou ou, se sa ;

Tou dimoun mon pou tret zot parey, ki ou pli aze ki mwan ki ou pli zenn, mon pou *afford* ou menm nivo respe, eski ou travay *at a head*, eski ou travay lo pli *junior level*, menm respe mon pou *afford* avek ou. Koumsa ki mon'n ganny grandi e sa i en kalite ki anndan mwan.

Me selman toudmenm, nou bezwen realis, nou pe fas avek sanzman e nou bezwen *cognizant*, ki nou pou bezwen *manage* sa sanzman, sa i enportan. Dan nivo biznes, ki dan Gouvernman nou bezwen kapab *manage change*. E ki manner ou fer sa? Ou bezwen fer sa par kominikasyon, *set* lekspektasyon avek ou bann

dimoun. So, nou bezwen koz avek ou bann dimoun, eksplike, fer sir ki desizyon pa zis ganny fer e enpoze lo zot. Dimoun i bezwen konpran, akoz ki nou pe fer serten desizyon.

E *through understanding*, ler nou *obtain understanding from* zot, zot pou pli *receptive* pou bann keksoz ki pe ganny mete devan zot. E sa i en faktor kle ler ou pe *undergo change*. E *part of* bann kalifikasyon, mon'n aprann en kantite lo ki mannyer pou *manage change* dan lorganizasyon.

Dezyenm mon pou tous, ou'n demann mwan en kestyon lo *offshore*. *What can be done, financial services? So, Financial Services Industry* an se moman, vi ki nou pe ganny sa bann presyon avek *OECD* e tou sa, mon'n tous lo sa bout laspe enternasyonal avan. Me ki mon panse ki Gouvernman i kapab osi ede ladan *or* ouver laport, se *in terms of the domestic side as well*.

Ki mon pe *mean* par sa, se ki rod lavenir pou entrodwir bann *investments products*. Ou pou realize poudir an se moman nou annan, i annan *very minimal* prodwi, ki ou kapab envestir ladan. Koman en endividyel, ou'n ganny ou saler lafen dimwan, ou annan en pti

larzan pou met dekote, ou annan zis pou ou swa kit li dan labank *or* ou *withdraw*. Mon pa konnen ou gard se ou, *I hope not*. Me selman, so ki mon pe sey dir. E labank to lentere lo sa *savings* i *quite low*.

So, ki nou kapab fer, se ki nou kapab rod en lavenir pou entrodwi bann diferan, bann nouvo *investment products*, ki *even* nou Sekter Domestik, nou bann dimoun lokal i kapab envesti ladan. *Ok?* Ki alafen dizour zot ava ganny en *return* lo zot larzan ki pa ava zis pe asize dan labank. Zot ava fer marse zot larzan. E sa pou ed nou lekonomi byensir, akoz nou pou met likidite dan nou lekonomi.

Trezyenmman, ou kapab zis repet ou trwazyenm kestyon silvouple?

HON EGBERT AGLAE

I konsernan lekspektasyon piblik anver servis.

MRS DEVIKA VIDOT

Wi, eskize pou sa. Wi, lekspektasyon piblik, so parey mon'n dir o debi, mon pran gran plezir avek enterakte avek dimoun, so mon pa vwar sa koman en defi ditou, ditou. Byensir avek *proper time management, managing* ou *diary*, mon pou fer sir ki mon

ava annan letan pou mwan zwenn avek piblik *at a specific time*. Mon respekite en kantite ler piblik, akoz mon osi mon'n pas atraver en kantite dezapwentman kan mon'n anvi vwar en dimoun dan Gouvernman, i pa'n posibil.

So, mon pou esey mon ki sa bann sityasyon dan nou Minister i pa arive. Mersi.

MR SPEAKER

Mersi Mrs Vidot. Onorab Adelaide.

HON FRANCOIS ADELAIDE

Mersi Mr Chair. Bonzour Mr Chair, bonzour tou Manm Onorab. Bonzour spesyal pou Mrs Vidot e felisitasyon pou ou nominasyon. Vi ki ou'n dir ou sorti dan distrik Bais Lazar, menm ki Onorab Mondon pou en pe ankoler. In ne Takamaka e i dan distrik Baie Lazare, so tou mon felisitasyon.

Zis en pti komanter ki mon kontan. Mwan mon anvi dir ki i annan bann *leaders* dan bann kominote ki parfwa zot vwar talan zot bann dimoun, e se sa bann *leader* ki pous devan pou fer sa bann dimoun, sirtou bann zenn, ganny rekonnet.

Mon kestyon pou Mrs Vidot se, mwan mon oule en konfirmasyon avek ou akoz mon pou al donn ou mon vot la.

Eski ou pou kapab diriz sa Minister. Mon oule ou koz dwat avek tout lafyerte, eski ou pou kapab diriz sa Minister? E mon dezyenm kestyon se ki ou laz, ou en pe zenn. Byensir si mwan mon gete mon vwar en Minis ki en pe alaz, mon konnen i pe al *retire*, so mon espekite mon annan en plas mon osi mon pou kapab ganny promosyon.

Me ou, ou zenn, eski ou pou ankouraze bann zenn ki pe *look up to you*, ki zot anvi vin ranplas ou zot, e eski ou pou donn zot sa sanz pou zot petet kapab ranplas ou pli tar, menm ou zenn ou osi ou annan en lavnir. Petet i annan zenn osi ki ase anbisyè. Eski ou konpran mon kestyon? *Thank you*.

MR SPEAKER

Mersi Onorab. Mrs Vidot.

MRS DEVIKA VIDOT

Mersi Onorab pou kestyon. Premye repons mon annan pou ou se wi. *Straight answer* wi, napa rezervasyon lo la.

Dezyenmman mon kontan ou'n demann mwan sa kestyon. Mon vremen ankouraze pou mwan pran sa *post*, e mon pa krwar ki, le rezon ki mon'n vin devan se akoz mon'n anvi deservi, mon'n santi i annan en *need*. *Ok*, i ti annan en

mankman, e mon'n anvi pou mwan servi nou pep. Servi nou sitwayen Sesel. E alors mon'n *step up* pou fer li. E avek gran fyerte mon pou definitivman pare, mon panse ki sa i ava en lankourazman pou nou zenn, e mon krwar ki zot osi zot merit fer parey e mon pare pou mwan *step aside* pou ki zot osi zot kapab ganny zot sans.

So, mon vwar sa zis koman en *stepping stone* pou mwan, e mon vwar sa koman en lankourazman pou lezot zenn. So, vwala. Mersi.

MR SPEAKER

Mersi Mrs Vidot. Onorab Terence Mondon.

HON TERENCE MONDON

Mersi Mr Chairman. Bonzour Mrs Vidot e tou dimoun ki pe ekout nou. I en plezir vwar en lot zanfan Takamaka pe al pran en pozisyon Minis. Mon krwar Takamaka i fyer e i salye ou pou ou lakonplisman, menm si ozordi i pe reste Baie Lazare pour lemoman.

Mon kestyon Mrs Vidot. Prenon an kont legzizans e lekspektasyon ki vin avek sa pozisyon Minis, ki bann lavantaz e dezavantaz ou pe prevwar koman en zenn paran avek en fanmir? Ki lapros ou pou pran pou fer sa balans ant

travay ek lavi fanmir? Mersi Mr Chairman.

MR SPEAKER

Mersi Onorab. Mrs Vidot.

MRS DEVIKA VIDOT

Mersi Onorab pou ou kestyon. Annefe pandan mon karyer, dan mon parkour, sa i en keksoz ki mon panse ki mon'n kapab fer ase byen. Parey mon'n dir, mon'n travay *full time*, me *part time* mon'n fer tou mon letid. So, tou mon konze mon'n rezerve pou mwan kapab *study* pou mwan al fer mon legzanmen. Mon sorti travay avek mon liv, mon pe *burn the midnight oil*. Mon pe lev 3er bomaten, mon pe leve mon pe kontinyen mon pe al travay. So, sa i vin en labitid pou mwan. *Ok?* In anzandre dan mwan. So, pou mwan travay dir i pa en keksoz ki mon pa familye avek.

Actually, mon *believe* ki *the harder the battle, the sweeter the victory*. E mon krwar ki mon en *firm believer* ki si napa sakrifis, si ou pa pe santi ou pe vreman donn tou, *then* ou *return* i pa pou *as rewarding*. *Ok?* Sa i mon pwennvi lo la.

So, mon pa pe *foresee* ki akoz mon annan en fanmir i pou *any different*. O kontrer sa lavantaz avek annan en fanmir

se kan ou'n fatigue apre en lazournen travay ou monte ou vwar ou pti garson *or* ou pti fiy, i anmenn en lazwa enorm lo ou e i en *stress reliever* ki ou kapab pey en milyon Roupri ou pa pou gannnen, e ou ganny sa for *free* dan lakour. Mersi.

MR SPEAKER

Mersi Mrs Vidot. Onorab Sebastien Pillay.

HON SEBASTIEN PILLAY

Mersi Mr Chairman. Bonzour tou koleg Onorab, bonzour tou dimoun a lekout e en bonzour spesyal Mrs Vidot dan nou Lasanble. Mon'n ekout ou atantivman e mon'n vwar dan ou en kalite vreman, vreman *inspiring*. Akoz ler Onorab Aglae in demann ou en kestyon, in koz ek ou lo bann travayer ki en pe pli aze dan ou Minister, pli eksperyanse. Ou'n reponn *regarding* sa bann dimoun.

E sa lot mo ki ou'n servi pou dekrir bann travayer ki pou lo en *echelon* en pe pli ba, ou'n vreman *think* avan ou servi sa mo. E sa i montre mwan ou en dimoun ki annan en kantite respe.

So, mon konnen poudir ou pou al nenport portfolyo kot ou pou ale avek ou abilite, mon krwar ou pou kapab fer byen. Sel kestyon ki mwan mon

annan pou, ou'n kapab fer fas avek en kantite presyon an deor, kot ou'n napa vreman kritik ki ganny anvoye *toward* ou.

Mwan mon ti a kontan ou *succeed* dan sa ki ou pe al fer. Eski ou santi ki ou posed sa kapasite pou fer fas a kritik? E eski ou santi poudir ou ava annan sa liminite, pou osi aksepte kot ou bezwen ekout *advice* lezot dimoun, pou ou pare pou pran li ?

Akoz ou pou al dan en domenn, *wherever you go*, tre konpetitiv akote lezot ki pou annan bann kalifikasyon parey pou ou. So, zis reponn mwan lo sa 2 kestyon. Mersi.

MR SPEAKER

Mersi Onorab. Mrs Vidot.

MRS DEVIKA VIDOT

Mersi Onorab pou ou kestyon. Eskize, mon bezwen vir par kote pou mwan kapab regard ou byen. Bon, definitivman sa i en keksoz ki mon krwar i zis normal e mon pe ekspekte kritik. Aktyelman *tout au long* mon karyer, i enn bann keksoz ki mon'n *look forward* letan in ler pou fer *appraisal*. Akoz se sa landrwa ki mon konnen kwa ki mon pe fer byen, kwa ki mon pe fer mal.

Byensir i gou kan ou tann dimoun pe *praise* ou, pe dir ou, ou pe fer en bon *job*. *But at the same time* kritik ki negativ, se sa ki fer ou devlope. Sa ki fer ou realize poudir be *hold on*, mwan mon panse ki keksoz i koumsa, me i pa neserman koumsa.

So, mon ekspekte, espesyalman dan en louvraz kot ou pe deservi la mazorite popilasyon, *depending on* sa portfolyo ki mon pe al ladan, ki kous popilasyon ki mon pe al touse. Mon pe espekte bokou plis kritik ki plis ki en senp pti *appraisal*. Akoz sa nou pe koz diferan *diverse views*, diferan lopinyon, diferan dimoun, *from* diferan *background* ki annan zot fason panse, ki pa neserman pe agree avek ou fason panse.

Alors mon panse ki lenportans ladan se ki, mwan mon pou bezwen fer sir tou kou ki mon Minister i annan sa lobzektif, nou annan sa *strategic objective*, ki nou nou'n set, ki'n ganny formile, ki *whatever* ki nou fer nou pou pe sey *achieve* sa a tou pri.

E kritik ki ava vini, i ava ed nou swa pou re dres li, si nou panse i en keksoz ki valab, ki merit rekonesan. Nou ava re dres li. *Otherwise* ou konnen i annan en kantite kritik osi ki

zis pourvi, anler ou ganny en konpran poudir be sa i akoz, ou sey ganny en konpran sa bann kritik plito, ou konpran mwan? Me selman an zeneral mon pou *welcome* kritik. Mersi.

MR SPEAKER

Mersi Mrs Vidot. Wi Mr Pillay.

HON SEBASTIEN PILLAY

Mersi Mr Chairman. Mon konnen mon pou ganny sans fer li atraver mon repons lo Mosyon. Me mon ti oule swet Mrs Vidot, mon pou donn ou mon sipor. Mon krwar ou'n kit ou lekor dan Lasanble ozordi dan en fason admirab, e mon menm kapab dir dan en fason formidab. E pou en zenn fiy, e koman en papa 2 fiy mon krwar ou en lenspirasyon pou lezot fiy. Nou vwar nou bann *staff*, bann madanm isi dan Lasanble, e mon swet ou *all the best*. *Be resilient*, ou annan en tre bon karakter e mon krwar ou pou fer *byen wherever* ou ale. Mersi Mr Chairman.

MRS DEVIKA VIDOT

Mersi Onorab.

MR SPEAKER

Mersi. mon pou pran dernyen kestyon sorti kot Onorab Philip Monthy.

HON PHILIP MONTHY

Mersi Mr Chairman. Bonzour tou Manm Onorab. Bonzour Mr Chairman. Bonzour Mrs Vidot e bonzour tou zabitan Cascade.

Mrs Vidot i annan en keksoz ki ou'n prononse taler, ki'n atir mwan latansyon. Ou'n koz lo met plis later endistriyel a dispozisyon bann biznesmenn. Ou'n koz lo devlopman bann zenn lantreprenarya. Devlopman lantreprenarya. Ou'n koz lo Sesel i annan en kantite talan ki fodre nou devlope lo nivo biznes. E sa i relye avek mon distrik Cascade. *Ok, zone endistriyel i tonm dan mon distrik Cascade. E mon'n vwar ki pandan plizyer lannen bann biznesmenn dan mon distrik, in ganny en pe neglize, akoz i annan plizyer zot pe rod later pou agrandir zot biznes.*

E mon annan plizyer zot ki annan en kantite talan. E la mon mazin sa de manrmay Cascade Boys ki annan en talan enkrwayab, me zot pe fer zot biznes kot zot lakour e zot pe ganny problem ek vwazen, ek lotorite. Donk ki lespwar, si ou ganny apwent Minis, ou ganny sa portfolyo lendistri. Ki lespwar ki ou pe donn bann biznesmenn mon distrik ki later endistriyel lo zone Providence i pou annan *fairness* dan lafason

ki i ganny distribye e ki zot pou annan en sans pou zot kapab agrandir zot biznes? Mersi bokou.

MR SPEAKER

Mersi Onorab. Mrs Vidot.

MRS DEVIKA VIDOT

Mersi Onorab pou ou kestyon. Wi, mon'n mansyonn lo later e mon panse sa i en fakter kle. Later i en resours ki *valuable* e bokou nou bann sitwayen in realize an se moman ki nou pou al *rent* en landrwa, i kout bokou. Avek sa sityasyon ki nou pe fer fas avek *COVID-19*, pou *rent* en landrwa petet i pa fezab, i pa *financially feasible* pou sa biznes, i *drain* son *cashflow*. Alors si zot ti kapab ganny landrwa kot zot investir dan en keksoz ki vin pou zot, sa i pou pli rantab pou zot. So, zot pou prefere angaz dan en *loan* pou kapab konstrir en latelye ou ki se swa. Pou zot, ki ava vin pou zot.

Garanti ki mon kapab donn ou *or* plito lespwar *or* vizyon ki mwan mon pe *foresee* pou sa, si i arive sa portfolyo i tonm anba mwan. Se fer sir ki mon etabli Polisi ki ler, *internal Policies, procedures* ki kler, ki *available* avek tou dimoun a laporte tou dimoun. Ki liste ki kriter ki merite pou kapab

ganny akse avek later. So sa i vremen enportan.

Definitivman dabor nou bezwen for odit pou regarde kantite later ki annan *available*, kantite ki'n ganny servi pou nou regard nou *inventory basically*. Me selman dezyenman se sa bann Polisi ki nou bezwen met an plas. Nou bezwen ki pa zis nou entern ki konnen ki Polisi ki annan, regardan sa bann later e ki dimoun an deor ki sa i konsern zot, zot osi zot *well versed* avek ki kriter ki zot bezwen mete.

E koumsa zot kapab travay pou *meet* sa bann kriter. Nou pa kapab annan bann kriter entern ki zis nou ki konnen. So sa i bann fason ki mon anvizaze fer si sa an ka i tonm anba mon portfolyo. Mersi.

MR SPEAKER

Mersi Mrs Vidot. Avek sa nou'n ariv a lafen nou seri kestyon e i reste pou mwan lo lapar Lasanble pou mwan remerisye Madanm Vidot pou son partisipasyon e repons nou bann kestyon. Alors la mon a va envit li fer son depar pou nou kapab kontinyen.

(MS DEVIKA VIDOT WAS EXCUSED FROM THE HOUSE)

MR SPEAKER

Mersi, nou a retourn dan staz Lasanble pou nou deba. Parey pratik ki nou'n etabli, mon ava pran lalis. Si zot permet, mon pou pran lalis kestyon Lopoziyon e mon annan 3 Manm la, mon a enkli *Leader Lopoziyon*. Zis tenir lanmenm pour lemoman, i fer 4. *Ok*.

Si, zot eskiz mwan, mon pou pran menm kantite norm lo sa kote e sa i fer ki i vin 5. Sansan nou pou tro prolong deba. E yer mon krwar nou ti'n etabli en bon *pattern* ki nou ti kapab limit lakantite partisipasyon lo tou lede kote, e mon ti a kontan kontinyen avek sa. E avek sa mon ava azout *Leader Government Business*. Mersi bokou.

Ok, mon annan Onorab William, Onorab Woodcock, Onorab Regina Esparon, Onorab Naddy Zialor, Onorab Andy Labonte e Onorab Georges. Mersi.

E lo sa kote, parey menm. Mon annan Onorab Cosgrow, Onorab Loze, Onorab Vidot, Onorab Lemiel e Onorab Pillay. Mersi. Bon, be nou a komans a lo sa kote e mon ava apel Onorab William.

HON WAVEN WILLIAM

Mersi Mr Speaker. Bonzour tou manm piblik ki a lekout. Mr Speaker pou mwan i en gran plezir e en loner pou siport sa Mosyon pou nominasyon Ms Devika Vidot. Mr Speaker i annan en fraz ki mon'n sezi ki Mrs Vidot in dir. Mon site, "*the harder the battle the sweeter the victory.*"

Mr Speaker, mon kontan ki Mrs Vidot in vin devan koman en zenn. In rann lapel akoz in santi poudir son kalite, e son bann atou ki i annan, in pare pou li vin pran sa bann *challenge* dan pozisyon en Minis, dan en sityasyon vreman difisil ki pei pe pas atraver.

I montre Mr Speaker, son determinasyon e son lanvi pou li vin devan pou li kontribye. E mon pe dir sa akoz koman en zenn avek sa sityasyon ki nou ladan, i ti kapab dir non. E mon kontan ki Prezidan Ramkalawan in selekte li pou form parti son *Cabinet of Ministers*.

Mr Speaker, in servi sa bann mo par egzanp efisyen. In dir ki ou bezwen konnen ki ou pe vin fer. E ou bezwen pa zis konnen, me fer sa travay dan en fason byen. E in koz lo resours, parey ou konnen nou en pti pei avek limitasyon dan resours, in koz lo maksimiz byen, e itilizasyon nou bann resours.

Mr Speaker, e Ms Devika Vidot i annan 31an, i pe al ganny 32an la le 18 Novanm. Mr Speaker mon vwar Mrs Vidot koman en lenspirasyon pou sa nouvo zenerasyon. Mr Speaker, letan nou'n fer en *quote* evalyasyon dan sa kanpanny eleksyon. Nou'n vwar se an gran parti se bann zenn, bann zenn ki'n determin rezilta sa eleksyon ki parmi mon panse Ms Devika Vidot.

E mwan Mr Speaker mon anvi felisit li ozordi. Pou reponn sa lapel e dir wi pou form parti sa lekip, ki anvi vreman anmenn sa transformasyon dan Sesel, ki pep Seselwa pe espekte. E mon pou dir ki Mrs Vidot i konnen ki pep Seselwa e Gouvernman ki fek ganny elekte i anvi avek li. Alors pou fer kourt, mon pou swet li tou de bon, e bonn sans dan sa pozisyon ki in ganny apele pou deservi. Mersi.

MR SPEAKER

Mersi Onorab. Annou rapel pou gard bann entervansyon bref silvouple. Mersi. Onorab Cosgrow.

HON WALLACE COSCROW

Mersi Mr Speaker. Mr Speaker mon pou gard mon entervansyon ase kourt. Mr Speaker, bomaten ler mon'n

ekout Mrs Vidot, i fer mwan mazin en pti pe letan pase ki mon osi mon pa ti tro pli vye ki li, ler mon ti ganny apwente Minis an 2015. Mon ti annan 36an. I fer mwan mazin osi bann lezot zenn ki ti dan *Cabinet of Ministers* o paravan, avan mwan, ki ti osi ase zenn ler zot ti zwenn *Cabinet*.

Ler mon ekout Mrs Vidot bomaten ankor, i fer mwan vwar poudir Mrs Vidot i en zenn ki'n pran son letid o serye. I en zenn ki'n profit loportinite ki pei in met devan li. I en zenn ki'n travay dir. E ozordi i pe war fri son travay dir, a en tre zenn az 31an.

Ler mon ekout li mon get son bann *background* osi, son bann letid ki in fer, mon krwar mon kapab ganny en nide apepre kote Mrs Vidot i kapab pe al deservi son bann lekspertiz. In donn nou enn de pti *hint*. Mon krwar dan bann landrwa kot i posibleman i kapab ale, i annan bann bon dimoun. Bann bon travayer ki pou ed li. Ki pli vye, ki pli *junior* parey in eksplike. Ki kapab ed li pou li deservi son *duty* koman en Minis dan *Cabinet* efektifman. E ki a kapab anmenn lespwar pou bann lezot zenn parey li.

Mr Speaker, mon pou terminen par dir ki mwan, mon

pou donn Mrs Vidot sipor, pou li kapab deservi son louvraz koman en Minis. Napa bokou Minis zenn dan nouvo *Cabinet*. Avanyer nou ti war Mr Naadir Hassan ki osi ase zenn. En dimoun ki mon konn tre byen. So, mon pou donn li sipor. E mon anvi ki i vin sa lespwar pou bann zenn. Bann zenn ki anvi *aspire* pou zot vin dan politik. Bann zenn ki anvi *aspire* pou pran la relev demen.

So Mrs Vidot i annan tou mon sipor. E mon swet li *all the best* dan *Cabinet*. E mon konnen ler mon ekout li, mon konnen ki i pou fer en diferans pou bann zenn Seselwa, e osi pou pep Seselwa. Mersi bokou Mr Speaker.

MR SPEAKER

Mersi Onorab. Onorab Wavel Woodcock.

HON WAVEL WOODCOCK

Mersi Mr Speaker. Bonzour Mr Speaker, tou koleg Onorab e tou dimoun a lekout. Mr Speaker propozisyon Prezidan Ramkalawan pou lapwentman Ms Devika Vidot pou vin en Minis, i montre ki nou Prezidan i krwar dan zenn. I krwar dan bann zenn profesyonnel. Annefe dan son *Cabinet* ou pou war ki pou annan de zenn dan zot 30an. Ms Devika ki annan

31an, e osi yer nou'n war Mr Naadir Hassan ki li osi dan son 30an.

E Ms Devika i en zenn ki mon konn li tre byen. I en zanmi, mon konn son paran. Mon konn son konpetans. I en zenn profesyonnel konpetan e edike. Annefe i ti menm mon *lecturer* Liniversite Sesel an 2015/2016 ler mon ti pe fer mon Degre dan Ladministrasyon Biznes. E i ti mon *lecturer* pou *Business Analysis*. Sa letan i ti annan li 26 ou 27an. E i ti en *lecturer* ekselan. E mon remersye li pou sa lansennyman ki in donn mwan.

E son spesyalizasyon i dan *accounting* ek *finance*. E par lefe ki ozordi Sesel pe fer fas avek en kriz ekonomik ki'n anmennen par *COVID-19*, mon *believe* ki son lekspertiz pou ede bokou dan sa domenn. Son leksperyans osi dan *offshore* Mr Speaker, mon krwar i pou ede ranforsi sa sekter, pou fer fas avek bann defi ki nou pei in fer fas avek kot i konsern Sekter *Offshore*.

I en zenn responsab e egzampler, e i pou osi en lankourazman pou lezot zenn *aspire* pou pran bann pozisyon *leadership* dan nou pei. Avek sa de mo Mr Speaker, mon pou siport son nominasyon pou li

vin Minis dan *Cabinet* Prezidan (Faure), Prezidan Ramkalawan. Mersi bokou.

MR SPEAKER

Mersi Onorab. Onorab Johan Loze.

HON JOHAN LOZE

Mersi Mr Speaker. Mr Speaker, mon krwar Prezidan Faure i remersi Onorab pou azout en Manm dan son *Cabinet*. Mr Speaker, si *ma mémoire est bonne* mon krwar sete Samuel Ullman ki ti dir poudir "*youth is not a time of life; but rather a state of mind.*" E ozordi devan nou nou'n vwar en zenn ki li i dan son *time of life of youth*, be i osi i dan en *brilliant state of mind*. Onorab George ou ava *happy* pou note ki *again chapeau, a near perfect candidate for a ministerial post*.

E nou lo nou kote nou'n vremen *happy* pou resevwar sa zenn fiy *in the House* ozordi pou ekout li. In, pou *paraphrase Leader* Lopozisyon, in *acquit* son lekor dan en fason ekselan. Mon pa konnen ki i annan avek bann dimoun ki (ACA) *certified* ki mont lo *Cabinet*. *ACCA sorry, ACCA certified* ki mont lo *Cabinet* a en tre zenn laz.

E Minis Jacquelin Dugasse osi ti annan zis 30an letan ki i ti *assume* son

pozisyon lo *Cabinet*. E la ankor ozordi nou vwar en zenn madanm a laz 32an ki pe fer parey. I enteresan, *it is not only the freshness of youth*, be Ms Devika i annan li en leta mantal an beton letan ou get li. I en dimoun ki desiziv, i ferm, e i konnen egzaktman dan ki direksyon *she wants to steer her boat*.

E sa dan li menm i vreman enpresyonan. Mon rekonnèt sa dan li, akòz mon osi mon annan en fiy 27an ki i pe fer son dezyenm *Master Degree*, e egalman ferm parey. So mon'n vreman asize la trankil, ekoute, *soak in* sa ki in annan pou li dir. *Remind* mwan en kantite bann keksoz ki mon tande kot lakaz ler sa zenn madanm i decide pran son bann desizyon. E mon krwar ki *whatever* Minister i ganny mete ladan, *will be in firm, capable hands*.

In osi enteresan pou note ki, i annan li en lonnekte entelektyel ki *above par*. *Not once, not once* ki sa fiy in asiz la devan e in sey fer nou krwar ki i pa konnen ki Minister ki i pe al ladan, *not once*. I pa'n vin zwe sa zwe li. I pa zwe sa bann zwe li. *She does not lower herself to that level*. I pa'n dir nou, me i pa'n sey fer nou krwar ki i pa konnen. Zis mazin sa.

She set her own standard. In *set* son prop bar la devan. E in asiz la anndan, in mentenir son standar. *Now*, sa dan li menm i enpresyonan. I reflekte en pe lo bann dimoun ki'n pas avan li. I reflekte lo bokou lo serten nou ki pe asize isi anndan. Menm lo dimoun ki pe asize isi anndan, ki konnen li menm li poudir mon admir li en kantite. Mon admir son profesyonnalizm, selman i reflekte lo nou tou *across the board*, ki sa zenn fiy ozordi, a laz 32an i nobou asiz la devan nou, *attain the moral high ground*. Gard *the moral high ground*. *E put us all to shame, including* son bann koleg ki'n vin devan nou avan li.

Sa i devret en pwen refleksyon pou nou, e pou Lanasyon Seselwa an antye! Be *so far* ki mon pou dir, meyer kandida ki zot in anvoy devan Lasanble, pou konsiderasyon pou en *post* ministeryel, depi ki sa *process* in komanse. E mwan personnelman mon pou al lev mon lanmen byen o, pou mwan pas son laprouvasyon. Mersi Mr Speaker.

MR SPEAKER

Mersi Onorab. Onorab Regina Esparon.

HON REGINA ESPARON

Mersi Mr Speaker. Bonzour tou dimoun a lekout. Mr Speaker mon pou siport nominasyon Mrs Vidot. En zenn profesyonnel avek ase bagaz pou deservi dan en plas Minis. En zenn ki'n ganny kit deryer dan lepase par Gouvernman, kantmenm in en profesyonnel byen kalifye. Mon konn li koman en dimoun byen motive, ki touzour pare pou aprann e avans devan.

En zenn *graduate* ki apre ki i ti kalifye in retournen pou vin travay, e kontribye pou devlopman son pei. Mon napa dout ki koman en zenn madanm tre *proactive*, ki i pou anmenn en kontribisyon pozitiv pou pei. E avek sa bagaz dan finans, i pou osi en *plus* oubyen en *asset* dan sa Minister kot i pou ganny plase.

Mr Speaker, dan sa lespri ankadre plis madanm dan bann pozisyon kle dan nou pei, mon kontan ki Prezidan Ramkalawan in selekte en zenn madanm pou deservi dan son *Cabinet*. E mon pou donn Ms Devika Vidot tou mon sipor, e mon konnen i pou vin en legzanp pou bann lezot zenn profesyonnel, sirtou madanm. Ki pe aspire pou bouz pli devan. E mon felisit li pou aksepte sa pozisyon. Mersi Mr Speaker.

MR SPEAKER

Mersi Onorab. Onorab Vidot.

HON AUDREY VIDOT

Mersi Mr Speaker. Bonzour zabitan Roche Caiman, tou Manm Onorab, tou dimoun ki a lekout. Mr Speaker, koman en zenn madanm Parلمانter mon vwar li neser pou fer resorti ki i enportan pou ankouraz bann zenn fanm Seselwa pou la relev dan bann pozisyon kle dan pei. Espesyalman ler zot in montre atraver zot karakter. E sakrifis pou avans devan.

Mon felisit Mrs Vidot dan son nominasyon pou *post* Minis. Pou en zenn profesyonnel i vremen enteresan a en tre zenn az 32an, pou annan en tel karakter vremen pozitiv. In prouv son lekor ozordi devan nou Lasanble, ki i annan bokou forte, e i annan bokou pou ofer avek son pei.

I montre ki i en zenn fanm Seselwa avek bokou lenerzi, e lanvi pou fer sa diferans pou Sesel. Mon apresye ki in fer resorti ki i pare pou travay avek *fairness*, e montre enparsyalite dan son travay. E ki i pare pou kontinyen anmenn plis loportinite pou nou bann zenn Seselwa.

Alors mon profite pou mon swet li tou bonn sans dan son

parkour. E ki vremen Bondye i a beni li pou li kapab vremen tous pep Seselwa. Mersi.

MR SPEAKER

Mersi Onorab. Onorab Naddy Zialor.

HON NADDY ZIALOR

Mersi Mr Speaker. Bonzour tou bann Manm Onorab. Bonzour tou Lepep Seselwa. Mr Speaker mon pou tre bref. Mon pa kapab pa sezi sa loportinite ozordi pou mwan aport mwan sipor pou Mrs Vidot. Pou la senp rezon ki ozordi i en zour istorik. I osi en moman ideal pou nou ankor enn fwa prouv avek Lepep Seselwa, ki le 25 bomaten ler nou ti ganny en nouvo Prezidan, i ti promet ki i pou pran ka avek tou son zanfan.

E yer avek avantyer nou'n tann bokou koze lo zenn profesyonnel; kwa ki pou ganny fer, kwa ki pe fer, malgre ki nou fek antre dan Gouvernman. E Wavel Ramkalawan dan son kapasite konman Prezidan, in prouv avek Lepep Seselwa ki wi i annan en plan pou bann profesyonnel Sesel.

(APPLAUSE)

HON NADDY ZIALOR

E mon pou sezi sa loportinite pou demann avek Mrs Vidot, ek tou zenn ki pe ekout nou bomaten, Ki reste asire, ki dan plan Gouvernman pandan sa prosen 5an, nou pou fer sir ki tou zenn profesyonnel, tou zenn, e tou zenn ki'n pa'n ganny en loportinite, pou annan en loportinite pou zot pandan sa prosen 5an.

(APPLAUSE)

HON NADDY ZIALOR

E avek sa de pti mo ki mon pe demann avek nou Lasanble, ki mon pe demann avek pep Seselwa pou donn tou zot sipor Mrs Vidot, koman prosen Minis dan *Cabinet Minister* dan sa nouvo Gouvernman. Mersi.

MR SPEAKER

Mersi Onorab. Onorab Lemiel.

HON SYLVANNE LEMIEL

Mersi Mr Speaker. Bonzour tou mon bann koleg Manm Onorab. E tou bann dimoun ki pe ekout nou. Mr Speaker, mon pou bezwen fer en pti kontribisyon mwan osi. Akoz ozordi mon fyer ler mon regard en zenn madanm tre profesyonnel. En zenn madanm tre konfidan. En zenn madanm tre entelizan, avek bon bagaz *leadership*, ki'n vin devan nou ozordi, e ki'n

ganny propoze pou en *post* Minis.

Ozordi nou vwar ki Sesel i bezwen bann zenn. Nou bezwen nou bann zenn profesyonnel. Sirtou nou bann zenn madanm. Ki ennler zot ezite pou zot vin devan, *be it* dan politik, *be it* dan lezot keksoz ki mon krwar zot kapab anmenn bokou, bokou, bokou kontribisyon pou pei, pou zanfan.

So i fer ki ozordi Mrs Vidot, mon krwar in vin koman en lenspirasyon pou zot sa bann zenn la deor ki ankor pe gete. *Or* ki'n ganny aprese, me ki pa pe kapab pran en desizyon. Zenn, sirtou bann zenn madanm, bann zenn fiy, mon panse ki ozordi Mrs Vidot, petet pa zot tou ki pe vwar li. I annan kekfwa i a *review* zot televizyon tanto. *It is worth watching. It is worth* ekout sa madanm ki in dir ozordi.

Akoz mon krwar zot bann zenn madanm la deor, zot bann zenn fiy ki ankor pe deside, ozordi Mrs Vidot i merit en lenspirasyon pou zot tou! Pran zot letid o serye. Sa madanm in lekol, in travay. Ozordi fri son travay in raporte. So nou bann zenn ki la deor, mon pou *stress* lo nou bann zenn fiy. Annou pran bann loportinite ki vini. Annou pa per *challenge*. Pa per

bann msye ki pou vin *challenge* nou osi. *Ok?* Akoz bann madanm mon konnen nou for.

E mon asire ki Mrs Vidot pou fer en bon travay. Son liminite sa madanm ki i annan, mon krwar i merit tous nou tou. *Humbleness* dan lavi la, pou anmenn nou lwen. Fodre pa nou vin tro arogan. Fodre pa nou vin tro, konmsi nou ki konn tou! I montre ou poudir i en dimoun ki menm pare pou li aprann, pou li ekout lezot. E sa i vreman, vreman enportan.

So, avan mon fini Mr Speaker, mwan mon pou dir ki mon pou donn mon sipor total Mrs Vidot. Akoz mon krwar i enn parmi bann meyer ki in ganny swazir pou vin Minis. E mon swet li bonn sans dan son Minister ki i pou ganny *allocate* avek. E mon napa dout, mon krwar ki koman en madanm ki ekoute. Koman en madanm ki pare pou travay ek lezot, pou ekout lezot. E son kalite personnalite ki in vin avek. Mon plis ki krwar ki i pou fer byen. E mon swet li tou de bon dan son travay. Mersi Mr Speaker.

MR SPEAKER

Mersi Onorab. Onorab Andy Labonte.

HON ANDY LABONTE

Mersi Mr Speaker. Bonzour tou mon bann koleg Onorab. E bonzour tou zanzan Sesel ki a lekout. Bon, ler mon'n ekout mon dernyen koleg koze lo lot kote, i konfirman ki zot in pran konsey Onorab Georges yer, e zot in remet en pe lakord lo sa gitar. Alors i vreman ankourazan.

(laughter)

MR SPEAKER

Bon, rezon ki mon pran laparol. Mon'n asize mon'n ekoute, mon'n obzerv sa CV. I montre mwan pirman poudir Mrs Vidot i vreman en profesyonnel. E en zenn profesyonnel ki'n tann lapel. So, in tann lapel in vin devan, e i pare pou li deservi son pei.

E pandan mon letan konpany, zot konn tre byen poudir *La Rivière Anglaise* i en landrwa kot premye *condo* ti ganny konstri. Me annefe nou bann profesyonnel laba in vreman dezapwente avek sa Gouvernman ki'n sorti. Zot in eksprim zot dezapwentman dan plizyer fason avek mwan. E alors ozordi mon pe dir avek zot, sa Gouvernman ki'n ganny elekte, i en Gouvernman ki pe vin travay pou zot.

E Mrs Vidot ozordi in konfirm sa, poudir sa Gouvernman i pare pou reget zot. E redonn zot, zot vre valer. Alor lo sa baz ki mwan mon pou siport son nominasyon. E mon pou dir tou lezot profesyonnel dan Sesel, se ki nou, nou la pou zot. Mersi.

MR SPEAKER

Mersi Onorab. Onorab Sebastien Pillay.

HON SEBASTIEN PILLAY

Mersi Mr Chairman. Mr Chairman tradisyonnelman ler *Leader* Lopozisyon i koze, i parfwa tante pou li al reponn bann komanter ki'n ganny fer. E mon krwar dan sa ka spesifik ki la, mon pran lapenn pou enterven an ki'n koz avan mwan, e detrwa avan li, ki in swazir pou li *demean* sa performans ki sa zenn madanm in fer devan nou Lasanble ozordi.

Akoz pou mwan sa zenn madanm pou nou koz lo li, i *transcend* tou frontyer politik. Napa okenn, okenn deba politik lo sa enn lapwentman la. E i fer lapenn pou vwar ki malgre zot en mazorite, zot pa kapab asize e apresye en talan ki'n vin devan zot. Swet li bonn sans aköz nou konnen, i pou annan en latas difisil devan li. E nou

sey fer tou fason pou nou sipòrt li, pou li bouz devan.

E mwan se sa ki mon pou fer, mon pou fer sa pou en rezon tre spesifik. In dir en kantite keksoz sa madanm. E mon'n ekout li byen. E mon pa pou servi ni sa term zenn profesyonnel, ni sa term zenn dan lafason ki mon koze, me lafason ki sa madanm in koze, kot ler i pe koze i pa'n zanmen dir "mwan". Byen rar in servi "mwan." Toultan in dir "si ou koman en dimoun," "si ou, ou travay."

Mr Speaker ou war Onorab Woodcock pa ankor kapab aprann ki mannyer pou konpòrt li dan en Lasanble. I fer lapenn.

MR SPEAKER

Onorab Pillay kontinyen avek ou diskour, silvouple.

HON SEBASTIEN PILLAY

Mersi Mr Chairman. I montre mwan ki si Gouvernman i kontinyen lo sa letap ki zot pe fer, avek lafason ki zot bann Manm pe fer dan Lasanble, zot pou vreman pa fer loner bann dimoun ki vin asiz dan sa sez ...

MR SPEAKER

Eskiz mwan. Ekout mwan en kou silvouple. Tanzantan en Manm i fer en pti komanter

akote. En pti komanter annou les li pase, akòz si nou arete pou reponn sak komanter, zanmen nou pou fini. E sa i vin lo tou lede kote. So, mon ti a dir, *ok* pou fer Lasanble enteresan tanzantan en dimoun i santi i bezwen soz. Me i pa annord. I pa annord. Me selman annou pa pran ka avek sa. Kontinyen avek ou diskour, e annou fini.

HON SEBASTIEN PILLAY

Mersi Mr Chairman. Mon krwar in ariv 10er 32. Nou'n pas en letan bomaten kot nou'n ekout en dimoun ki *obviously* kalifye pou son travay. Pou Onorab Woodcock atraver ou Mr Speaker, i pou al vin en Minis dan Gouvernman Prezidan Ramkalawan. Mon konnen in sitan kontan kritik Prezidan Faure, e i dormi i mazin Prezidan Faure. Prezan mon krwar i leve i mazin Prezidan Faure.

Me Prezidan Faure in sorti, e prezan ou pou bezwen mazin Prezidan Ramkalawan toulezour. Me safwasi ou pa pou kapab kritik li, ou pou bezwen defann li. So, mon *hope* ki ou a abilite pou kritike, i pou parey ou abilite pou ou kapab defann. Mersi Mr Chair.

MR SPEAKER

Eskiz mwan, mon a zis fer sa komanter. Ou pa pe fer ou loner par adres Onorab Woodcock. Les li. Mersi. La mon a pas laparol avek Onorab Georges.

HON BERNARD GEORGES

Mersi Mr Speaker. Mr Speaker, nou'n vwar bomaten ankor en brans sa levantay ki Onorab, ki *ex-Onorab*, ozordi Prezidan Ramkalawan, pe ofer nou koman son *Cabinet*. E i vre ki atraver bann dimoun ki'n vin devan nou ziska prezan, nou'n vwar ki Sesel i vremen pou tou son zanfan.

Akoz nou'n annan dimoun ki pe sorti dan *retirement* pou zot vin servi. E nou annan plizyer, e mwan mon'n vwar de ou trwa ziska prezan. Ki klerman pe kit bann profesyon, ek bann landrwa kot zot pe travay, ki sertennman pe anmenn zot bokou plis reminerasyon, pou zot antre dan Gouvernman. E sertennman pran en *drop* dan zot, sa ki zot gannyen lafen di mwan.

E sa i montre ki nou pei i dan en bon landrwa. Ler dimoun i pare pou zot kit sa ki zot pe fer. Kit okenn benefis ki zot pe gannyen, e vin servi zot pei. E mon krwar avek sa kalite latitud e laptitud, ki nou'n vwar ozordi atraver Mrs Vidot, nou

konnen ki nou pei pou dan en tre, tre, bon landrwa pou sa bann zour ki pe vini. E sa bann lannen ki pe vini.

Mrs Vidot in, mon pa bezwen repas lo sa ki in prouve devan nou ozordi. Me mon ti a kontan zis fer en refleksyon. Si i servi pandan de manda ki Konstitisyon i permet Prezidan, ler i pou'n fini, i pou *still* annan 42 an. I pou *still* ankor en zenn profesyonnel.

E sa i montre nou ki kantmenm nou pei i annan 250an sa lannen, i *still* atraver tou son bann dimoun, en pei ki zenn, en demokrasi ki zenn. E la nou pe al antre dan en Gouvernman ki ankor lo son trwazyenm zour, oubyen lo son katriyenm zour.

Mr Speaker, mon annan en gran lespwar pou nou pei. E bomaten Mrs Vidot in renouvle sa lespwar. In donn nou parey nou tou nou rekonnet isi, en *souffle* sa ki posibil dan sa pei. E mwan mon koz koumsa, aköz mon annan en biro Avoka ki annan 8 zenn ladan. Bann dimoun en bann pli zenn ankor ki Mrs Vidot.

E mwan mon viv toulezour sa leksperyans ki mannyer bann zenn i anmenn en lenerzi dan zot travay. E ki mannyer nou, bann pli aze, e mwan, parey ou Mr Speaker nou'n fini

antre dan nou peryod retret. Nou, nou kapab anmenn sa balans leksperyans ki en pei i bezwen.

Donk, sa *Cabinet* Prezidan Ramkalawan pou annan li en tre bon balans ant leksperyans ek lenerzi. E se egzaktman sa ki en *Cabinet* ki'n ganny byen konsevwar i bezwen. Alors avek sa detrwa mo, mon ti a kontan remersye tou Manm ki'n koz an faver Mrs Vidot. E mon krwar, mon oze krwar ki i pou annan linanimite dan nou Lasanble ozordi. Mon krwar ki nou tou nou'n rekonnet en madanm ekstraordiner bomaten. E mon demann zot annou fer li loner avek nou vot. Mersi Mr Speaker.

MR SPEAKER

Mersi Onorab Georges. Nou a pas lo vot lo Mosyon. E mon a relir Mosyon pou sa. *In accordance with Articles 63(1) and 69(2) of the Constitution, this Assembly approves the proposed appointment by the President of the Republic of Ms Devika, Sumitra, Kathrina Vidot to the office of Minister.*

Tou bann ki pour? Lev lanmen silvouple. Ok Madanm Clerk? *Unanimous?* Mon annan gran plezir, Mosyon pou lapwentman Mrs Devika Vidot in aprouve avek tou Manm

prezan. 34 vot *yes*, zero vot kont, e zero *abstain*. E sa i fer premye fwa ki nou annan en vot anonim, alors mersi bokou.

(APPLAUSE)

MR SPEAKER

Prezan mon sipoze nou a pran *break*, e nou a rezwenn 11er.

(BREAK)

MR SPEAKER

Nou ava kontinyen. Onorab Georges *next Motion*.

HON BERNARD GEORGES

Mersi Mr Speaker. Mr Speaker Mosyon swivan. *In accordance with Articles 63(1) and 69(2) of the Constitution, this Assembly approves the proposed appointment by the President of the Republic of Mrs Marie-Celine Zialor to the office of Minister.* Mersi Mr Speaker.

MR SPEAKER

Nou a ganny segonde Mosyon. Ok wi, Onorab Esparon.

HON REGINA ESPARON

Mersi Mr Speaker mon segonn Mosyon pou Mrs Zialor, pou nominasyon Mrs Zialor pou pos Minis. Mersi.

MR SPEAKER

Mersi. Avek sa nou a *move* Lasanble dan Komite. E nou ava fer apel Mrs Zialor.

Bonzour Mrs Zialor e byenveni dan Lasanble. E nou pou komans konsider Mosyon lo pou lapwentman avek en pti lentrodiksyon bref 2 minit pa plis ki 3 minit par ou menm, ki pou swivi par kestyon bann Manm. E annou rapel tou bann Manm gard kestyon direk. E Mrs Zialor osi nou demann ou pou gard repons bref, direk pou nou kapab akonplir nou latas dan letan ki disponib pou nou. Mersi. Wi Mrs Zialor ou prezantasyon silvouple.

MRS MARIE-CELINE ZIALOR

Mersi Mr Chair. Bonzour Mr Chair. Bonzour tou bann Manm Onorab felisitasyon pou ki zot ariv la ozordi e bonzour tou bann dimoun ki a lekout. Mon apel Marie-Celine Zialor mon parkour en pti git dan ledikasyon.

Mon en zanfan dan distrik Plaisance pou le moman mon pe reste Anse Boileau. Mon fer tou mon letid primer, segonder Plaisance apre letan mon'n fini *A Level* mon'n al etidye *Australie* dan domenn *biologie*.

Biologie appliqué mon pa'n le fer Degre mon'n plito fer *appliqué* pou mwan ganny en

Diplonm, akoz mon en dimoun ki kontan keksoz pratik.

Apre sa letan mon'n retournen mon bann parkour profesyonnel, mon al ansenny dan lekol segonder *biologie* avek *chimie* pou en pe letan, ziske ler apre mon ti vin en *Deputy Headteacher*.

Apre sa mon ti demande pou mwan al etidye, akoz avan ler mon krwar ou pran en lofis o parey *headteacher*, mon ti demann Minister Ledikasyon pou mwan la fer *MBA*.

Mon ti al fer *MBA* dan *educational leadership* avek Liniversite *Lincoln L'Angleterre*. E letan mon'n retournen, mon'n travay dan de lekol segonder;- Anse Boileau Segonder avek Mont Fleuri Segonder koman Direktris lekol.

Apre mon ti ganny demande pou mwan al *Headquarters* Minister Ledikasyon, pou mwan al ansarz *curriculum*. Devlopman letid pou lasyans. Depi primer, segonder mon ganny sans apre konn en pe primer, ki mon pa ti konn ditou.

Apre sa mon ti anvi en keksoz diferan, sanzman e mon ti al travay i ti ankor *SIM* a sa letan, ki nou konnen kot Lenstiti Guy Morel kot mon ankor ete la apre in sanze in vin Liniversite. Laba mon'n ganny

sans pou mwan ansarz devlopman, pou letid tou bann letid *Diploma*, bann letid Diplonm dan zesyon.

Tou bann letid *diploma in management, human resources management, office management*. E apre sa letan avek devlopman lantreprenarya dan Sesel. Mon'n osi Direkter zot Sant Lantrepriz kot Lenstiti Guy Morel, ziska lannen pase. Mon lentere in grandi pou mwan. Mon annan en pasyon enorm pou devlopman imen. Devlopman imen.

E mon'n deside pou mwan sorti lo zesyon Lenstiti Guy Morel, pou mwan kapab *focus* sa lannen lo sa parkour. E ki'n anmenn mwan fer en kantite keksoz parey mon program lo radyo. Ki telman popiler e apre mon bann *coaching sessions* ki mon fer, dan en kantite lantrepriz en kantite Departman Minister. Ki fer ki la ozordi mon war en ta figur familye. Enn bann satisfaksyon personnel ki mon ganyen letan mon al dan bann landrwa. Mersi bokou Mr Chair.

MR SPEAKER

Mersi Mrs Zialor. Nou ava lev lanmen pou kestyon *please*. Pran pasyans avek mwan, mon bezwen not sa. Wi nou ava

komanse e mon ava konmans kote isi avek Onorab Aglae.

HON EGBERT AGLAE

Mersi Mr Chair. Bonzour Mr Vidot byen kontan pou war ou la. Mrs Zialor mon krwar si mon pa tronpe 2012/2013 a 2014 mon'n pas dan ou lanmen laba kot Guy Morel *Institute*.

Mon premye kestyon anvi ki ou en madanm for karakter mon kapab dir. Petet kwa ki ou pe mazine anmennen an plis koman en Minis dan sa ladministrasyon Gouvernman *du jour*, kot i konsern *improvement* avek *service delivery*? Sa i enn. E pou met an aplikasyon bann nouvo pratik ki ou panse.

Dezyenmman, ou'n koz en pasyon lo devlopman lendeks imen mon kapab dir *human development*. E Sesel i annan li en repitasyon ladan.

Kwa an plis ki ou krwar ou kapab anmennen, sirtou atraver nou bann zenn zenerasyon, ki nou war tandans ki zot pe ganny en pe lackin edikasyonnelman mon kapab dir, pou os zot nivo osi pou pran bann loportinite ki annan egziste ozordi? Mersi.

MR SPEAKER

Mersi Onorab. Mrs Zialor.

MRS MARIE-CELINE ZIALOR

Mersi Mr Chair. Mersi Onorab *good to see you* pou *submit* sa detrwa kestyon. Karakter, ki mon pe anmennen an plis? Mwan mon en dimoun ki kontan transformasyon. Koze, parol i byen i enportan, i parey en lagrenn ki ou senmen ler ou koz bann bon parol. Savedir nou bezwen fer sir ki nou dir.

Me selman si napa *fertilizer* ek en legren napa en fason kot ou kiltiv sa legren byen, ki transformasyon kot i vini. Vwala mon krwar mon kontribisyon en pti pe pli for ki mon pou anmennen, se transformasyon.

E apre avek mon kapasite ki mon annan avek leksperyans travay avek transformasyon, avek bann dimoun ki mon'n fer, mon krwar sa ki mon krwar Lepep Seselwa pe voudre vwar lenpak. Dimoun i bann *être* emosyonnel. Nou bezwen tous zot kot i annan lenpak. Fodre en dimoun dann son lavi toulezour i santi sa bann sanzman, ki ou pe koz lo la fodre i kapab santi.

E mwan mon'n teste detrwa bann diferan *tools*, bann diferan zouti dan bann diferan lantrepriz.

E mon krwar sa leksperyans ki mon pe anmennen, apre en pe parey

mon krwar Mrs Francourt ti koz lo la letan i ti vini, kolaborasyon. Mon en dimoun ki krwar en kantite ki nou pa fer keksoz tousel.

E i annan bann kolaborasyon mon for lo la napa en proze, ki mon'n fer ki mon pa'n fer avek kolaborasyon. Mon krwar sa dan *Cabinet* sa i bann keksoz kot tou sa bann Minis ki la, fer ki ou'n koz lo lazenes. Fer ki lazenes dan tou domenn i la e *feature*. I *feature* tre for tou.

Akoz mon krwar avek inanimite zot in vote pou sa ki'n pas avan mwan, en zenn dimoun pou vwar sa. E vwala sa laspirasyon, sa standar ki mon krwar nou merit pe anmennen.

E si mon ava pran ou dezyenm kestyon, lo ki kalite pratik? Kalite pratik mon krwar nou bezwen annan bann program, en pti pe pli konpreansiv, en pti pe plis soutenab.

Ou konnen avek konportman nenport ki dimoun pe enport ou laz, e mon krwar nenport ki laz ou kapab fer transformasyon.

Ou pa kapab enstri en konportman lo en dimoun. Ou pa kapab menm *instruct* e se sa ki nou pe fer. I annan bann nouvo resers dan kapasite imen.

I pa *psychology*, i en *branch* pou bann ki kontan fer resers parey mwan, i apel *neuroscience*, en bon pe *quantum physics as well too*. Ki pe montre en kantite sikse. E mon pa krwar ki Sesel nou merit ganny kit deryer.

E nou napa en kantite dimoun, i pou fasil mon krwar pou nou kapab servi sa bann lapros modern avek bann zouti modern. Premyerman par egzantp mon ava donn legzanp, ou merit annan en program *improvement* lo performans ki pa mwens ki 3 mwan. Si ou pe al mwens ki 3 mwan ou pe al kont lanatir, devlopman *behavior* imen. Mersi bokou.

MR SPEAKER

Mersi Mrs Zialor. Onorab Vidot.

HON CHURCHILL GILL

Mersi Mr Chair. An Vidot *sorry*.

HON AUDREY VIDOT

Mersi Mr Chair. Mrs Zialor felisitasyon pou ou nominasyon pou pozisyon Minis. Mon kestyon pou ou. Dan ou parkour travay ou'n ganny sans byensir vwar, antann bann diferan defi e bann *challenge* ki bann diferan travayer dan servis piblik, ki'n pas swa dan ou lanmen, swa dan ou

parkour. Ki ou priyorite? Akoz la ou pa ankor konnen ki portfolyo pou ou kapab *take ownership*. Ki ou bann priyorite pou ou kapab kontribye anver ou group Minis, pou ou kapab sa diferans pou ede e lev standar ankor, parey in ganny prononse par Dirizan pei dan domenn servis piblik. Mersi.

MR SPEAKER

Mersi Onorab. Mrs Zialor.

MRS MARIE-CELINE ZIALOR

Mersi Mr Chair. Mersi Onorab *good to see you too*, pou kestyon. Mon krwar briyevman i sa san donn okenn detay, i pou sa transformasyon ki nou bezwen fer nivo servis piblik, se *leadership*. Nou bezwen al *strengthen leadership* bann dimoun ki dan sekter piblik. Ou konnen dan lavi ou pa kapab donn sa ki ou napa.

En kantite fwa nou pe fer en teknisyen nou pe fer en pe pwason grenp pye dibwa. Nou bezwen fer sir ki nou *match* bann *skills*. Tou dimoun in ne i vin avek en *purpose* letan i vin lo later. Nou pa kapab fer dimoun fer keksoz ki pa dan son *purpose*, ouswa nou merit fer dimoun al rode ki mon *purpose*. Ki mon bi? Lekel mon bann *skill* ki mon fer byen, e nou kapab fer sa la.

E *strengthen leadership*. *Leadership* i diferan avek *management*. Nou fer en pe *management* mon vwar nou pa fer ase. Nou pa motive, nou pa enspire pou nou fer. Larepons tou sa bann problem ki nou pe diskite sa bann zour, i la i dan lespri imen, dan lespri imen.

Nou bezwen fer sa bann dimoun krwar ankor, enspir zot fer zot *believe* poudir zot kapab parey. Parey on kontan dir bann ki konn mwan, bann *super power*. Tou dimoun lo later Seselwa se bann *super power*.

Nou bezwen fer zot krwar ki zot kapab anvole. Nou kapab fer zot krwar ki zot kapab fer en kantite keksoz, fer en dimoun krwar sa. Mwan mon krwar sa i bann program ki nou bezwen anmennen e motivasyon e nou bezwen re-anmenn *trust* dan Seselwa.

Nou bezwen *trust* bann dimoun. Ler en dimoun aköz en Minis i pa en, I pa montre en kantite komanter ki ganny fer si ou pa en teknisyen, ou pa sipoze en teknisyen. Aköz ou ganny tante pou ou prezan al *micromanage*. I annan bann teknisyen Seselwa nou nou'n fer resers kot Lenstiti Guy Morel, tre, tre kalifye dan sa pei nou pou ganny sok mon krwar. Nou pou ganny sok. E zot tre

kalifye. Nou bezwen donn zot sans e donn zot en krwayans dan zot lekor e aranz lanvironnman fer li.

Mwan mon kontan lafanmir fer li *family friendly* aköz en sipor fanmir, pou nou demann dimoun sa transformasyon ki i bezwen fer. Nou bezwen annan *work life balance*. Nou bezwen annan en sistenm performans. Ki mannyer nou zer performans kot nou pa al get zis *being busy for the sake of being busy*. Nou pe al rod osi lenpak kot tou dimoun letan i dan son lavi toulezour, i kapab santi sa lenpak. Mon bezwen santi poudir i annan en sanzman dan pei.

Mon bezwen santi poudir i annan en keksoz pli byen ki pe vini. Kantmenm ou kapab koze montre mwan lo papye, si mon pa santi dan mon lavi toulezour, dan mon fanmir, ler mon kot travay mon pa santi sa, mon krwar nou pa ankor pe koz sa kantite parol e nou pa pe fer.

I annan en kantite bon plan dan Gouvernman, kantite bon plan. Nou bezwen prezan enplimante e annan plis *trust* ladan. Mersi.

MR SPEAKER

Mersi Mrs Zialor. Onorab Uranie.

HON ROCKY URANIE

Bonzour Mr Speaker. Bonzour tou Manm Onorab. Bonzour tou Digwa a lekout. E bonzour Mrs Marie-Celine Zialor.

Mrs Marie-Celine mon konn ou, nou ti NYS ansanm. E ou'n menm ansarz mwan koman *headteacher* kot lekol Mont Fleuri. Mon konnen ou en dimoun ki annan bann karakter for. Ler mon pe get ou *skills* avek *qualities* ki ou'n mete lo ou CV, ou en dimoun ki kontan war rezilta.

E ou menm ou dir ou travay vit, pou fer sir ki bann *tasks* ki ganny konplete dan en *delay* letan rezonnab. Me si ou war ou avek en tim, kot Minister ou'n ganny mete ou war ou ek en tim ki *slow*. Ki ou anvizaze fer? Mersi.

MR SPEAKER

Mersi Onorab. Mrs Zialor pa bliye gard repons direk e bref.

MRS MARIE-CELINE ZIALOR

Mersi Mr Chair. Ou konnen ou en *teacher* sa i bann labitid. En *occupational hazard* kontan koze. Mersi Onorab.

Nenport ki dimoun ki annan nenport ki karakteristik, nou pa la pou nou vini pou vin *overnight* fer dimoun sanze. I annan bann lenstans kot ou

bezwen pran letan fer keksoz dousman.

En dimoun si napa kapasite en *skill*, i annan. Sa i mon domenn pou devlopman dimoun. E nou kapab met bann program pou devlope ouswa si neserer i annan bann keksoz ki bezwen ganny fer vit, kot i annan bann dimoun an deor ouswa lezot landrwa ki kapab ganny fer.

Mazin byen i pa neseriman ki dan en Minister si i annan en keksoz ki la kapasite, ki napa dan en lot Minister. Mon krwar nou merit kapab pli byen zer nou bann resours ki nou annan an komen, e kapab fer en diferan formil dan Gouvernman kot nou kapab si en dimoun i dan en serten Minister i kapab petet al ede pou li fer keksoz marse en pti pe pli byen.

Petet sa be i pa pou al *bully* zot pou fer zot degaze prezan fer en keksoz vitman. E i annan osi bann diferan zouti ki ou kapab servi pou fer, petet lafason akoz zot dousman se petet zot pa pe travay *smart*.

Fer lodit, rode akoz keksoz i dousman apre letan nou'n ganny rezilta anploy stratezi ki pli bon pou kapab fer sa arive. Mersi.

MR SPEAKER

Mersi Mrs Zialor. Onorab Roucou.

HON CLIVE ROUCOU

Mersi Mr Speaker. Bonzour tou koleg Onorab. Mr Speaker permet mwan pou felisit Mrs Zialor mon *classmate* depi premye ziska segonder.

Alors felisitasyon Mrs Zialor. Alor Mrs Zialor ler mon pe get ou *CV* mon vwar ki ou annan en *strong leadership skill*.

Premye kestyon eski ou konsider ou koman en *change agent*, pou nenport ki portfolyo ki ou ganny met ladan? E ki manner ou pou *deal* avek okenn sityasyon kot nou war bann travayer pe anpese oubyen retenir sa sanzman ki ou kapab anmennen? Mersi.

MR SPEAKER

Mersi Onorab. Mrs Zialor.

MRS MARIE-CELINE ZIALOR

Mersi Mr Chair. Mersi Onorab pou kestyon. Briyevman mon ava reponn tou le de ansanm mon krwar.

I annan stratezi sanzman *change management* ki nou anplove bokou avek bann Lorganizasyon. E mon krwar sa moman letan i ideal ki mon'n vini pou kapab anmenn sa. Mon ti krwar mon pou kapab

anmenn sa an deor Gouvernman.

Be in desid *otherwise* ki mon pou fer li dan Gouvernman. E i annan de senp, de prensip ki nou kapab servi. Enn se *of course famous John Kotter* ki annan 8 prensip ki manner ou anmenn sanzman.

Ou rode koalisyon, ou fer vizyon, ensidswit. Apre osi i annan enn ki mon *favorite* ki mon pa konnen si zot familiarize avek, ki *Lewin's model*, ki dir premyerman ou bezwen pas dan en peryod si ou anvi dimoun i sanze. Ou bezwen *unfreeze*. Nou zis bouze annandler nou. Si ou annan en *cube ice*, ki ou anvi sanz en laform ou pa ale degaze al kros, kros li, konpran?

Ou bezwen kapab fer li *defrost* avan, pran en pe letan apre nou bouze, nou met dan en lot moul apre nou bezwen re *freeze*. Briyevman vwala e sa i annan son tou son sipor ki vin avek sa. Mersi bokou.

MR SPEAKER

Mersi Madanm. Onorab Loze.

HON JOHAN LOZE

Mersi bokou Mr Speaker. Mrs Zialor *happy to have you in the House amongst us*. Nou'n rankontre zis en fwa nou de

mon krwar. *Unlike* lezot ki'n pas dan ou lanmen *and everything*. *But it was a very pleasant meeting spend* dan Lofis LGB, mon ti fek vin MNA sa letan pou la premyer fwa. E nou ti diskite lo bokou keksoz. I annan en size ki ase pros ek mon lekor ki mon ti tal devan ou en vizyon sa zour.

That of en *decentralized online economy*. Nou'n diskite lo *decentralized digital currencies*. E mon ti pe sey pous ou dan direksyon ou ti kot ESA sa letan, kot en zenn Seselwa en Seselwa nenport Seselwa, i kapab asiz dan son lasanm e *conduct* li en *business online*. *Whether* i pe *fer drop shipping*, *whether* li menm li i pe *borrow* from sa model *xc.com* kot en Seselwa ki dan *crafts* i vann son prodwi *online* e i *dropship to other countries*. E mon ti *bring up* sa zour legzanp *Grey Goose the company and how it was built and sold*.

Mon anv'i demann ou eski ou santi *genuinely* ozordi, dir mwan ki ou kapab servi ou pozisyon lo *Cabinet*, pou sey pous sa azanda kot Seselwa i ava nobou maksimiz sa de *SAFE cable* ki nou'n mete pou anmenn *internet* Sesel?

Akoz nou'n pas de *SAFE cable* nou'n anmenn Sesel e

mwan mon poudir nou zis get kat *videos* avek. Nou pa pe servi pou fer larzan nou kapab fer larzan, atraver *internet* si ou kapab *assure* nou ...

MR SPEAKER

Onorab pas lo kestyon silvouple.

HON JOHAN LOZE

Si ou kapab asir nou ki ou pou kapab pous sa azanda. *Regardless* ki portfolyo ou ete, lo *Cabinet* pous sa azanda dan direksyon ki Seselwa i ava nobou demen anmenn sa revolisyon, kot nou pou annan nou *at least* en santenn en 500 Seselwa pe *earn hard currency* atraver *internet*. Sa i mon premye kestyon madanm.

Mon annan zis en dezyenm pti kestyon, mon'n tann ou mansyon *neurosciences* avek *quantum physics*. Eski ou ti pe refer lo sa *theory Richard Feynman of the human consciousness?* Sa i zis en *aside* mon anv'i konnen si ou pe al dan sa direksyon. *Thank you very much*.

MR SPEAKER

Mersi Onorab. Mrs Zialor.

MRS MARIE-CELINE ZIALOR

Mersi Mr Chair. Mersi Onorab pou ou de kestyon tre

enteresan. Ou premye kestyon definitivman, larepons i wi mwan mon krwar senserman. Sanmenm sa mon'n koz taler lo *work life balance* lo *family friendly policies*, ki en kantite fwa mon'n ganny dir dan lepase pa kapab fer. E en fason fer li se atraver teknolozi, e teknolozi osi en kantite keksoz sa ki ou'n koz lo la sirtou lo kote biznes e sirtou nou bann zenn.

Ki mon krwar se sa lavenir, lavenir biznes mon krwar *COVID* in vin pez en bouton *reset, whether or not*. Nou anvi al ladan in pez akselerasyon, so definitivman mon sipor total pou sa.

Dezyenmman i annan en kantite i wi, i sa *theory* ki ou pe dir. Selman la in ganny devlope en pti pe plis, pou fer anliny. Ou konnen en kantite teknolozi ki nou war dan lemonn, nou servi li plis avek lekipman avek lenfrastruktir.

I annan bann nouvo teknolozi *neurosciences, quantum physics* pe servi pou devlopman imen. Pou fer imen *even modern medicine* parey nou konnen la. Dan detrwa lannen mon krwar kekfw nou pa pou vwar i pou sanze, aköz nou pe al avek sa bann lavansman.

Vwala ki mon'n anmenn li aköz mon pa anvi nou ganny kit

deryer. Koman Sesel e en kantite keksoz i kapab ganny fer, san bezwen gran, gran resours. Si nou annan *smart ways*, nou annan teknolozi, e nou azour avek bann resers ki pe ganny fer.

Resers pa zis pou devlopman, lezot keksoz. Primordyalman pou fer nou lavi pli fasil. Pou fer nou lavi pli byen pou nou kapab tou sa probleman ki nou annan, pou nou kapab rezourd pli fasilman. Mersi.

MR SPEAKER

Mersi Mrs Zialor. Onorab Ghislain.

HON CHANTAL GHISLAIN

Mersi Mr Speaker. Bonzour tou dimoun. Bonzour Mrs Zialor. Mrs Zialor en kantite dimoun in koz lo ou karakter. Mwan mon ti anvi konnen eski ou'n deza dan ou letan travay pe enport kote ou'n ete, ou'n deza rantre dan konfrontasyon direk avek okenn dimoun e ki mannyer ou'n *deal* avek sa sityasyon?

E mon lot kestyon i ki en kantite fwa mon'n tann ou pe koz lo fortman lo *service delivery*, menm lo ou bann pti program ki ou fer lo radyo.

Eski ou kapab dir nou omwen ki ou pou fer vreman pou amelyor *service delivery*

,ouswa pou anmenn sa sanzman radikal dan *service delivery*? Mersi.

MR SPEAKER

Mersi Onorab. Mrs Zialor.

MRS MARIE-CELINE ZIALOR

Mersi Mr Chair. Mersi bokou Onorab pou kestyon. Mon pa tro petet asire, petet si mon pou reponn ou kestyon la lo kote mon karakter.

Mon pa pou fer krwar sa ki mon pa ete. Mon en dimoun fran, tre fran. De wa i pa en keksoz ki petet dimoun i apresye. Mon fran mon dir keksoz parey i ete, selman san *être* dezagreab. San ki mon *disrespect* personn.

Mon krwar nou tou nou annan nou rol dan lavi. Mon en *disruptor*. Mon *disrupt*, mon brouy en ta labou. Sa i mon rol. Taler mon'n dir nou pa kapab fer pwason grenp pye dibwa. Mwan mon la i annan mon letan ki mon bezwen fer li, e mon annan en matirite la.

I annan bann konfrontasyon ki mon'n gannyen, definitivman. Mon'n diferan konfrontasyon mon'n *deal* avek diferaman e aköz mon telman vokal. Mon telman fran, mon ganny en kantite.

E a la longer ditan mon'n aprann ki mannyer mon pou

zere. Mon travay lo mon lekor mon ankor pe travay lo mon lekor, defwa plis ki mon travay lo nenport ki proze mwan.

Akoz nou krwar *self-discipline*, dir bonzour, mersi, silvouple. Disiplin se sa;- konn ou pwen feb. Parey mon pou ale tanto mon pou al reget sa ki mon pe dir la ozordi. Mon pou al evalye kwa mon'n dir, kwa ki mon kapab fer pli byen *next time*, ki mon vin la anndan. Aköz mon pe vin pou premye fwa e mon fer sa tou le swar. I bann devlopman personnel ki mon pe koz lo la.

E lo ou dezyenm kestyon vwala ki mannyer sa *service delivery* nou pou aranze si nou bezwen premyerman lenformasyon egzaktaman kwa.

Akoz an deor ler ou deor i fasil dir en kantite keksoz. Ler ou al anndan ou al vwar, petet sa ki ou ti krwar i en problenm, pa li. Ou bezwen al regarde e get tou dimoun san eksepsyon, enkli mon lekor kwa egzaktaman ki nou pe fer ki napa *service delivery* e kote prezan pou nou kapab amelyore.

Mon annan en pe sizesyon, en pe lide lo ki mannyer nou kapab fer sa. Enn se bann prensip travay *smart*, bann prensip prodiktivite ki nou travay bokou avek sirtou lo

kote. Ou konnen ou pa kapab dan lavi donn sa ki ou napa. Annandler dimoun ou war li kekfwa i pa pe *smile* pe donn servis. Li menm li i pa *happy* koman en dimoun dan sa landrwa. I pa kapab fer son kliyan *happy* ou vwar? Si i annan serten keksoz ki mankman se sa devlopman ki mon pe koz lo la.

Ki nou kapab anmennen dan *service delivery*. Apre i annan bann gran, gran prosedir ki mon krwar ki nou kapab koupe ki petet i pou napa okenn lenpak.

Mwan mon i annan diferan *leadership style* ki bezwen ganny anmennen transformasyon, wi. Mentenir sa ki bon, be selman i annan bann ki bezwen evalye ki i zis la akoz i en labitid. Akoz i en labitid nou bezwen regarde kwa sa bann ki nou kapab tire pou fer keksoz.

Taler mon krwar in ganny dir poudir mon en dimoun ki vit, vre. Ki tire sa ki nou kapab fer la ozordi Vandredi, sa ki nou kapab fer Mardi, akoz nou pe esper Mardi prosen. Annou fer la. Tir en pe bann fristrasyon anndan avan. Akoz mon mazine dimoun bann fristrasyon, en pe anndan al regarde. Konmsi al avek en lespri ouver, pou vreman al

ekoute sa bann dimoun. Balanse. Mon kontan servi sa mo balanse e regarde egzakteman. E ansanm e mon krwar en kantite larepons i avek sa bann dimoun menm zot laba.

Zot konnen ki pou fer mon asire. Se donn sa motivasyon, donn sa pouse pou fer keksoz, tir kot anpaye. Louvraz Minis al depaye. Ki mannyer pou fer sa bann dimoun i konnen zot bann teknisyen zot in *trained* zot, en ta leksperyans. Mersi.

MR SPEAKER

Mersi Onorab Doyace Porice.

HON DOYACE PORICE

Mersi Mr Chair. Bonzour *a tous*. En bonzour spesyal pour Mrs Zialor e felisitasyon. Apre ki mon'n ekout ou, ki ou plan pou ankouraz bann travayer dan ou Minister spesifik, pou kontinyen donn zot devlopman akademik?

Mon dezyenm kestyon. Eski ou pou promot *leadership* akote lazene ek spor si ou arive ganny portfolyo sa Minister? Akoz i annan en mankman *leadership* sirtou dan spor? Mersi.

MR SPEAKER

Mersi Onorab. Mrs Zialor.

MRS MARIE-CELINE ZIALOR

Mersi Mr Chair. Mersi Onorab pou ou kestyon. Premye kestyon ti lo lankourazman akademik. Mon krwar i pa zis lankourazman akademik ki nou bezwen. I plito en kantite devlopman skil. I enportan lakademi selman i annan bann dimoun ki li i pa dan son *field*. Pa tou dimoun ki bezwen swiv en parkour akademik. I annan bann dimoun ki swiv en parkour ki devlopman kapasite ek skil. E fodre ki nou balanse nou pa kapab pran enn fer pli enportan avek lot pa enportan.

E la mon krwar nou pou bezwen sa tradisyon kot zis bann etidyan ki fer byen dan *A Level* ki al *State House*. Petet fer tou etidyan partou dan nou sant profesyonnel kapab al *State House*. Akoz tou skil, tou louvraz dan pei i enportan. So, wi lankourazman i pou la pou regarde e sa bann dimoun fer zot menm zot, *assess* gete ki zot bezwen. Kapasite zot bezwen dan plas detrwa fwa nou vini nou dikte nou dir ek zot vwala ki *available*.

E ou dezyenm kestyon. Ki manner pou *promote leadership* dan spor avek lazenes? Mon en dimoun ki kontan spor en kantite definitivman. Lazenes ankor e sa mon vwar definitivman e si

mon fer en pti komanter permet mwan Mr Chair, i annan osi parey sa bann sant profesyonnel kot annandler nou'n grad zot, met en pe pli o en pe pli ba. Mon krwar annandler dan bann Minister osi nou'n fer sa. Nou'n fer sa kot nou'n met enn pli o detrwa apre i annan bann ki petet i pa enportan.

E vwala *disengagement* nou bann dimoun, nou ban zenn spor, lagrikiltir, lafanmir tousala. E vwala ozordi degradasyon sosyal dan pei. Mon krwar ki definitivman i bezwen e i depan lo ki kantite motivasyon. Ki kantite lenspirasyon nou mete dan sa bann domenn. Be definitivman sa i pou ganny fer. Mersi.

MR SPEAKER

Mersi Mrs Zialor. Onorab Gill.

HON CHURCHILL GILL

Mersi Mr Chair. Bonzour Mrs Zialor. Vi ki ou pe ganny propoze pou en Minis. Koman en Minis e ozordi i annan en konpetisyon tre for ant sekter prive apre bann travayer dan Gouvernman. E bokou fwa sekter prive ki *prevail*. Zot ki tant pou ganny plis travayer.

E parmi ou bann lentere, mon vwar pour ki ou kontan angaz ou dan revolisyoniz

leadership apre *management training*. I tre probab ki petet dan sekter piblik i mank en pe *career path*, kekfwa bann dimoun ki la zot santi zot zis la, pe repet menm keksoz toultan. E eski ou pou kapab anmenn dan *Cabinet* petet en lapros kot nou reevalye nou Minister, ki manyer vreman nou pe *take care* avek nou bann *public servant* e an menm tan *PSO* pou vwar si i pa demann revize?

Akoz petet i annan en pe letan, i pa ankor ganny revize. Eski sa i en keksoz ki ou kapab anmenn dan ou *Cabinet*, pou ede retenir bann travayer dan servis piblik? Mersi.

MR SPEAKER

Mersi Onorab. Mrs Zialor.

MRS MARIE-CELINE ZIALOR

Mersi Mr Chair. Mersi Onorab pou ou kestyon. Mon krwar en kestyon tre enportan. Definitivman, definitivman san poursan sipor pou revolisyonz pou transformasyon sekter piblik. Mon krwar i nesese e kekfwa. E vwala aköz taler sa kestyon ti monte pour *service delivery*. Enn bann rezon aköz mon krwar sistenm in ekspire son letan.

I ti bon pou en serten letan, pou en serten group dimoun. I annan en revolisyon

lo later ki pe arive, en revolisyon lo Sesel ki pe arive, mon krwar ale avek sa i bezwen annan en revolisyon dan sistenm, so definitivman 100 poursan sipor. Mersi.

MR SPEAKER

Mersi Mrs Zialor. Onorab Romain.

HON GEORGES ROMAIN

Mersi Mr Chair. Bonzour tou koleg Onorab. En bonzour spesyal pou tou zabitan Anse Etoile.

Bonzour Mrs Zialor. Si mon kapab dekrir ou Mrs Zialor. Ou en dimoun ki *full of life*, aköz mon kontan ekout ou aköz ler ou koze ou koz konnen avek sa lafors dan ou lavwa.

Mon konnen osi atraver ou kontribisyon ou'n ed bokou lakonpanyen pou fer pli byen pou kapab prodwi plis.

Mon kestyon pou ou, eski ou kapab dir nou ki ou bann lafors ki ou kapab anmennen personnelman dan sa pozisyon Minis? Mersi Mr Chair.

MR SPEAKER

Mersi Onorab. Mrs Zialor.

MRS MARIE-CELINE ZIALOR

Mersi Mr Chair. Mersi Onorab. Senp mon en *disruptor*. Mon pa vin zis aksepte keksoz parey i

ete. Apre mon krwar *la franchise*. Mon pare pou dir mon krwar mon'n demontre pou mon pare pou dir keksoz parey i ete. Apre keksoz mon krwar pli enportan se mon spirityalite. Mon baz tou keksoz ki mon fer for lo spirityalite, ki mon krwar ki sa pei i bezwen. Mersi.

MR SPEAKER

Mersi Mrs Zialor. Onorab Phillip Arissol.

HON PHILLIP ARISSOL

Mersi Mr Chair. Bonzour tou dimoun. Dabor felisitasyon Mrs Zialor. Koman en zabitan Anse Boileau ou fer nou vreman fyer. E lo lapar tou zabitan Anse Boileau mon ti ava kontan swet ou bonn sans dan ou nouvo parkour. E mon dir ou kont lo mon sipor. Mon kestyon i koumsa ki ou pou fer pou redwir okenn form viktimizasyon, dan okenn Minister ki ou ganny *allocate*?

Swa travayer ant travayer ouswa viktimizasyon piblik ki bezwen servi sa Minister? Mersi.

MR SPEAKER

Onorab mersi. Mrs Zialor.

MRS MARIE-CELINE ZIALOR

Mersi Mr Chair. Mersi bokou sa bann zoli mo Onorab. Ankor briyevman senpleman, mon krwar letan nou'n fer bann resers mon en dimoun ki fer bokou resers, e mon bann etidyan i fer bokou resers ki mon bezwen korize.

E enn parmi bann rezon akoz dimoun pa kontan dan landrwa travay, se *unfairness* avek en kantite lenzistis ki i annan. Pa neseserman politik, be selman i kapab parey nou apel bann *micro politics* ki arive.

Savedir sa i deza lenformasyon ki mon annan. E definitivman sa bann lenzistis i bezwen ganny korize. Ou konnen parfwa nou pa ase.

Vwala kot nou karakter *franchise* i vini, kot ou bezwen en kalite karakter koumsa ki vini. Mon pa bon pou tou keksoz i annan bann larestan dimoun ki ava fer sa ki mwan mon manke, ki mon pa kapab fer.

Be vwala kot ou bezwen en dimoun fran ki kapab. Akoz en kantite fwa i annan dimoun ki pe fer martir son kanmarad dan bann landrwa travay. Napa personn ki ase brav e fran, e pou dir parey i ete e pou met li devan. Pou korize ki kapab anpes en ta lanmertim, en kantite keksoz ki pe deroule mon krwar dan sekter piblik.

I annan en kantite bann pti lanpir, bann pti *empire* ki'n ganny kree en pe partou ki pe ganny soutire, e definitivman sa i en keksoz ki pa pou ganny tolere.

E i en keksoz ki dan *Cabinet*, mon krwar poudir nou pou fer sir ki nou pou al *tackle* li. Selman dan en fason agreab osi, akoz si ou al *tackle* li dimoun pa vwar kwa ki'n fer mal letan ou al avek li, dan en fason dezagreab.

Ou bezwen kapab donn en ledikasyon. 2 lanmen, ou konpran fer sa ki byen avek en kote lanmen osi edike. Dimoun in abitye serten fason, edik zot ki mannyer diferaman e kwa bann lavantaz ki i kapab vin avek. Mersi.

MR SPEAKER

Mersi Mrs Zialor. Onorab Conrad Gabriel.

HON CONRAD GABRIEL

Mersi Mr Speaker. Bonzour tou Onorab e tou dimoun a lekout. Bonzour Mrs Zialor. Dabor mon oule felisit ou pou ou nominasyon e swet ou bonn sans e bon kouraz. Mon'n konn ou pandan ki ou ti pe *teach* kot Lekol Pointe Larue. Mon annan zis de pti kestyon.

Mon'n tann ou koz bokou lo *productivity* dan lefase a

plizyer repriz. Kwa ki ou pou fer pou *increase productivity* dan sekter piblik? Vi ki la nou pe pas dan en peryod vreman difisil, e tre delika pou Sesel.

Mon dezyenm pwen se ki eski ou'n deza form parti okenn *Board* isi Sesel? Si wi lekel? E donn nou e pe detay lo ki rol ou ti zwe briyevman? Mersi.

MR SPEAKER

Mersi Onorab. Mrs Zialor.

MRS MARIE-CELINE ZIALOR

Mersi Mr Chair. Mersi Onorab pou sa de kestyon. Lo kote prodiktivite, mon pou bref akoz i annan en kantite keksoz mon anvi dir lo sa size.

Premyerman nou'n fini mon'n travay bokou avek Sekter Prodiktivite kot Lanplwa, pou nou anmenn en plan. Savedir plan i la li. I annan stratezi nou bezwen regard en pe stratezi ki nou pe ki dan sekter piblik. *Leadership* enn parmi bann ki *top*, inovasyon, kreativite ki bezwen les dimoun fer. E *performance management system*. I bezwen annan en sistenm kot nou regard performans, enn pti pe pli konkret. E si ou permet mwan, mon ti ava kontan osi azout, nou bezwen annan nou en koneksyon avek lanatir imen.

Ki annandler mon krwar nou fer bann sistenm pou *robot*, pa pou dimoun. Nou bezwen mon krwar retourn *back* tou lanatir imen, avek bann modernite ki nou vwar pe vwar dan bann letid, kot nou bezwen azour avek vwala premye. E dezyenm wi, mon ti *chairperson Board Enterprise Seychelles Agency, ESA*. Ziska resaman letan mon ti demisyonnen. Mersi.

MR SPEAKER

Mersi Mrs Zialor. Onorab Kelly Samynadin.

HON KELLY SAMYNADIN

Mersi Mr Chair. Bonzour Mrs Zialor. I en lafyerte pou mwan vwar ou pe asiz la parmi nou. E mon konsider ou koman en madanm en *role model*, sirtou atraver ou bann *motivational session* ki ou fer lo radyo e mon asire ki ou enspir en kantite dimoun dan nou sosyete.

Mon kestyon i viz plizoumwèn ver nou bann zenn. Nou bann zenn i fer fas avek en mankman motivasyon, ki fer ki serten i pa tenir dan zot landrwa travay, dan zot lanplwa. Kwa ki ou panse i sours sa mankman motivasyon?

E ki ou krwar i bann solisyon pou remedye sa

sityasyon, afen ki nou kapab amelyor produktivite e anmenn sa bon transformasyon dan nou bann landrwa travay? Mersi.

MR SPEAKER

Mersi Onorab. Mrs Zialor.

MRS MARIE-CELINE ZIALOR

Mersi Mr Chair. Mersi Onorab pou ou bann konpliman e kestyon. Pou bann zenn motivasyon i annan en kantite keksoz. Me solman mon krwar nou merit al demann zot. Mon krwar nou merit senserman al kot zot, al demann zot egzakteman kwa ki pe marse. Selman mon lobservasyon en pe mon krwar i mankman *purpose*. Ou konnen nou bezwen refer nou bann zenn reve, refer zot ganny enspire par zot bi ki zot vin fer lo later.

Re ganny enspire par sa pei ki pou akeyir zot, ki pou *nurture* zot e bann dimoun, bann adilt *role model* ki pou atrap zot lanmen. E pa zis fer zot krwar ki loportinite i egziste;- demontre e donn legzanp bann loportinite vreman ki egziste e fer zot santi lenpak. Fer zot santi zot annan en plas.

En plas dan tou keksoz ki zot pe fer e sirtou les zot anmenn sa modernite dan nou pei. Akoz taler mon krwar

Onorab Loze in koz lo la, e mon krwar se bann zenn senserman ki pou anmenn sa bann modernite. E ansanm avek bann keksoz ki tradisyonnell ki la i ava en bon balans. Mersi.

MR SPEAKER

Mersi Mrs Zialor. E nou ava termin sa sesyon kestyon avek *Leader* Lopoziyon Onorab Pillay.

HON SEBASTIEN PILLAY

Mersi Mr Chairman. Bon apre midi tou koleg Onorab. Bon apre midi Mrs Zialor byenveni dan Lasanble Nasyonal pou reponn nou bann kestyon.

Mon'n ekout ou atantivman mon'n regard ou CV, mon'n not serten mo ki ou'n servi e ki mon pou sey ganny serten klarifikasyon lo la.

Ou'n dekrir ou lekor koman en *disruptor*. En *Cabinet* i travay lo en baz *collective responsibility*. Savedir kolektivman zot pran responsabilite pou sa ki sa *Cabinet* in decide.

Ki mannyer ou alors koman en *disruptor* ou pou rekonsilye ou lapros, ou karakter avek lefe ki ou pou bezwen pran responsabilite kolektiv, ler *Cabinet* i pran, i fer en desizyon? Savedir ou pa pou kapab blanm Prezidan

Ramkalawan pou en desizyon. Zot pou bezwen asim responsabilite sa desizyon ansanm. Sa i mon premye kestyon.

Mon dezyenm kestyon ki mon ti ava kontan ou klarifye, ou'n dir nou koumsa poudir ou pe koz lo bann sanzman oubyen bann transformasyon personnel.

Savedir mwan baze lo sa ki ou'n dir mwan baze lo en *leading question*, ki mon'n tann en Onorab lot kote latab demann ou, i paret ou pe al kot *Family Affairs Youth and Sports*. I paret, *ok*? Kwa ki fer ou kalifye oubyen kwa ki fer ou kwa ki *set* ou *apart from* en lot kandida, ki'n vini ki osi i annan leksperyans dan sa domenn. Ki abitye *deal* avek sa bann sityasyon, probableman pli kalifye ki sa dimoun ki si ou ganny mete dan sa Minister par egzant, pou ou asim sa responsabilite? Mersi Mr Chairman.

MR SPEAKER

Mersi Onorab. Mrs Zialor.

MRS MARIE-CELINE ZIALOR

Mersi Mr Chair. Mersi *Leader* Lopoziyon pou ou kestyon. Mon konnen sa mon *disruptor* i fer en pe dimoun enkonfortab. Be letan ou reste konfor

lanmenm ler ou pa fer progre. *Disruptor* parey oportinite, parey bann mo parey politik, tou i bann mo ki nou krwar i bann move mo, i pa neserman en move keksoz. I lafason ki mannyer ou enplimante, lafason ki mannyer ou persepsyon de sa i ete, e ki mannyer ou *behavior*. Ou aksyon, akoz en ta fwa bann mo 26 let alfabet, annandler i pa ase pou eksplik bann keksoz.

E defwa ki mannyer nou persevwar keksoz nou vwar sa koman en keksoz negativ. Ler ou pe fer transformasyon, letan i annan sanzman pou ou kapab avans devan ou bezwen *disrupt*. Ou bezwen fer ou enkonfortab pou ou kapab bouze. Letan ou enkonfortab ki ou bouze.

Toultan ou konfortab ou pa bouze. Me selman mon annan en *self-discipline* ki mon konnen keler pou *disrupt*, apre keler letan keksoz i *ok* pou pa *disrupt*. E sa mo ki mannyer i pou ganny enterprete, i pou ganny zize par bann program. Bann *Policy* bann keksoz ki nou pe dir. E letan i annan en kantite labitid, akoz labitid i pran 3 mwan. I pran en mwan pou sanz en *habit*. I pran 3 mwan pou sanz en *behavior*. Si napa en *disruption* ki vini swa enteryerman. En ta fwa avek dimoun i vin swa en troma i pas

ladan, ouswa en sityasyon difisil, ouswa i vin en keksoz an deor ki anmennen.

Vwala ki mon pe dir en *disruptor*. En *disruptor*. I pa neserman en gro keksoz. I zis petet sanz enn pti aksyon en prosedir dan en lorganizasyon i vin koman en *disruptor*, ou vwar? Sa ki mon le dir i vin zis parey ki bann *Wright brothers* letan zot ti pe *disrupt* lafason zot nou *travel*. Tou dimoun, tou syantis ti prouve poudir non nou pa pou zanmen anvole. Nou pa pou zanmen servi *aerodynamics* pou anvole. Zot ti *disrupt*. E la konmela nou tou nou pe *enjoy travel* dan avyon. I parmi enn bann transportasyon ki pli *safe* ki annan. Vwala e si mon pa'n reponn ou kestyon apre ou ava dir mwan.

Pou dezyenm kwa ki fer mwan kalifye? Mon konnen i annan dimoun ki pli kalifye ki mwan ek en ta kantite keksoz.

Kantite keksoz zot pli kalifye. Mwan sa ki mon pou aporte, mon konnen ki portfolyo ki mon kontan, ki portfolyo mon'n swazir, selman mon napa pouvwar administrativ pou vin devwale. Sa i Prezidan ki ava fer sa. E nenport keksoz ki annan pou fer avek devlopman imen, ki annan pou fer avek *leadership*, mon vwar

mwan koman kalifye pou fer. Eski i annan dimoun pli kalifye ki mwan? Definitivman wi.

Pou annan ki pou fer pli byen ki mwan? Definitivman wi. Mon'n ganny sa loportinite la, sa sans, desizyon tou ki mon'n pran pou mwan anmenn mon sipor, anmenn mon kontribisyon devan. Mon pou fer li. Kot mon pe fer mal mon ava ekoute, mon ava rod bann dimoun ki kapab vini pou ed mwan. Ki pou siport mwan.

E letan ou ganny sa bann kritik, ki i ed ou pou ou avans devan. I fer ou reflexir. I fer ou al rod- Mwan mon pare pou travay avek dimoun ki konn 10fwa plis. Kontrer sa bann dimoun obor ou. Ou konnen ou *exude* dimoun ki ou met toultour ou. Bann dimoun ki konn plis ki ou. Definitivman met zot o bor ou zot pous ou pli devan. So, fotespere mon'n reponn sa de kestyon Mr Chair.

MR SPEAKER

Mersi Mrs Zialor. E avek sa nou'n ariv a lafen sa seri. E mon ava repet mon remersiman e mon ava envit Mrs Zialor pou pran son depar dan lasal.

(MRS MARIE-CELINE ZIALOR WAS EXCUSED FROM THE HOUSE)

MR SPEAKER

Avek sa nou ava retourn dan Staz Lasanble pou deba. Ankor enn fwa si mon ti kapab ganny en nonm limite lo bann entervenans i ti pou ede pou nou avanse. Mersi mon annan 3 isi e mon pou annan 4 kote isi. Sa i balanse alor mon ava konmans kote isi avek enn. Onorab Waven William.

HON WAVEN WILLIAM

Mersi Mr Speaker. Mr Speaker ankor enn fwa mon annan gran loner pou siport sa Mosyon pou apwentman Mrs Marie-Celine Zialor koman Minis.

Mr Speaker mon ava dir letan mon'n ekout Mrs Zialor i en madanm ki vreman *down to earth*, senp. E mwan apresye son bann kalite ki'n sorti dan son bann konversasyon avek nou.

Par egzanp mon vwar ki i annan en lespri inovativ, analitik e *smart*. E mon krwar ki lefe ki in ganny swazir, i demontre ki an fas avek bann *challenge* ki nou annan, sa bann kalite nou bezwen pou kapab enspir pep Seselwa pou reve. E pour reste angaze pou nou kapab sorti dan sa bann difikilte ki nou ladan.

Mr Speaker mon vwar osi ki Mrs Zialor i en *leader* dan son prop fason e mon santi ki in

dekouver atraver son leksperyans travay ki bann lakin ouswa bann bezwen ki bezwen ganny adrese, parmi popilasyon par egzanp.

Enn ki mon'n vwar in fer sorti ki mon atas gran lenportans avek, dan mon parkour koman en Manm Parlman se sa size lenzistis, ki mon santi ki wi i annan bokou e labi drwa imen. Ki merit ganny adrese e san dir bokou, ankor enn fwa mon pou aport mon sipor pou sa lapwentman. Mersi bokou.

MR SPEAKER

Mersi bokou Onorab. Onorab Aglae.

HON EGBERT AGLAE

Mersi Mr Chair. Parey mon ti konmans mon kestyon avek Mr Vidot, Mrs Zialor. I en dimoun ki dan mon parkour edikasyonnel mon'n ganny sans rankontre li.

E i en madanm ki parey in dir ki fran i pa per pou dir ou son *avis* parey nou dir an Angle, se a *piece of her mind*. I pa per pou donn ou sa. E i pou gid ou osi dan semen kot si i war ou pe al mal.

E sa i bann kalite dimoun mon panse ki nou bezwen plis dan nou lavi dan sa sosyete. E osi staz ki nou'n arive dan sa

pei ozordi. E Mrs Zialor i pa en dimoun parfe mon konnen. In fer bann fot, in arive bann moman kot in anrose avek imen e i pou kontinyen arive dan son parkour.

Akoz sa i bann *challenge* ki lavi i anmenn ki met devan nou, parey nou la anndan nou tou koman bann Manm Lasanble nou fer fas avek. Me sa ki pli enportan se aksyon ki swiv apre ki sa bann evantyalite i arive ki pli enportan. E se sa ki defini en imen e ouswa en *leader*. Ki ou fer apre ki ou pas atraver bann dilenm.

E mwan mon napa dout poudir Mrs Zialor kontribisyon ki annan pou Sesel i gran e pou kontinyen kapab deservi sa pep. *Be it* dan ki portfolyo me son forte avek laspe imen edikasyonnelman transformasyon parey in fer sorti. I annan sa kapasite, i annan sa abilite pou li kapab fer sa ziska li menm li i ava fatige deservi.

E mon krwar i en madanm ki'n *stood the test of time* dan diferan mon kapab dir bann tranzisyon zenerasyonnel ki'n pas atraver e i pa neserman en dimoun ki'n ne avek en *golden spoon* dan son lanmen me in persevere in swiv sa ki meyer.

E si ozordi mon pare pou mwan siport li koman en Minis, mon pe fer li avek en grander lespri, ki i pou reisi i pou kapab fer li. Menm si i pa en dimoun ki'n perfe dan son parkour. E avek sa Mr Chair mon pou donn Mrs Zialor tou mon sipor. Mersi.

MR SPEAKER

Mersi bokou Onorab. Onorab Desheila Bastienne.

HON DESHEILA BASTIENNE

Mersi Mr Speaker. Mon ava dir bonzour ankore enn fwa tou bann Onorab, bann dimoun ki pe ekout nou dan lakour lo *TV* e osi en pli gran bonzour pou tou bann zabitan Ile Perseverance.

Mr Speaker ankore enn fwa mon pou repete ki mon fyer pou war bann madanm ki pe antre dan nou Gouvernman pou vin kontribye pozitivman pou son pei.

Mr Speaker Mrs Zialor i en madanm vreman kouraze. For, persistan e i fran. Mwan mon menm mon'n pas dan son lanmen kot *SIM* dan en *course Leadership Skills* ki ti en moman letan vreman *fruitful*.

Mr Speaker ler Mrs Zialor i dir ki i kontan pratik e avek son gran pasyon pou devlopman imen, i vre ki i en madanm ki'n toultan le vwar

dimoun pe kontinyelman bouze, pe devlope e kot zot ava kapab benefisye dan zot prop fason dan lavi.

I en madanm ki pa per *challenge*. San dout mon santi ki Mrs Zialor pou anmenn en gran diferans ek en lot stil travay dan sa Minister kot i pou ganny *assign*, pou pran son responsabilite. Nou bezwen en madanm parey Mrs Zialor. Alor avek sa pti rezimen mon pou dir mon ki pou donn Mrs Zialor mon konfyans, e mon vot pou permet li zwenn *Cabinet of Ministers* dan Gouvernman Prezidan Ramkalawan. Mersi.

MR SPEAKER

Mersi Onorab. Onorab Lemiel.

HON SYLVANNE LEMIEL

Mersi Mr Speaker. Mr Speaker tre bref. Mon'n konn Mrs Zialor personnelman. Mwan osi mon'n ganny sans pas atraver lanmen Mrs Zialor. Mrs Zialor wi i en dimoun avek en karakter tre for. E Mrs Zialor i en dimoun ki vreman, vreman, vreman pasyonnen avek transformasyon imen. So, mwan mon swet Mrs Zialor sikse e mon swet li bonn sans dan son travay ki i pou al fer koman Minis. Nou pa konnen vreman kot i pou ete me selman mon ti ava kontan petet Mrs

Zialor i ganny en pozisyon petet kot i pou kapab aranz en pti pe.

Nou'n toultan antann kritik lo *service delivery*. Nou'n toultan antann kritik lo kote devlopman imen. In annan bokou ki'n ganny fer me selman nou pe toultan antann kritik lo la. Mon panse ki Mrs Zialor i ava antre koman en Minis, i ava kapab vin avek bann lide en pe pli inovativ. I dir ou poudir i en dimoun i pa en *yesmen*. I fran e avek sa karakter ki mon konnen i annan mon konnen i pou kapab fer bouze son Minister ki i pou ladan.

Me selman mon ti ava kontan osi ki Mrs Zialor i pran konsyans ki i pou pe travay avek diferan kalite dimoun, diferan karakter, dimoun avek diferan karakter dan son Minister.

E mon espere ki i pa ava tro vif dan serten desizyon petet ki *as* koman Minis i pou bezwen pran. Mon konnen ki i en dimoun ki analiz byen. E mon espere ki i servi sa bann kalite ki i annan pou li anmenn plis dibyen dan sa Minister ki i pou ganny met ladan. E ki nou ava kapab vwar en serten revolisyon lo kote servis dan son Minister ki i pou al ladan.

E mwan mon pou siport nominasyon Mrs Zialor aköz mon *believe* dan konpetans

bann madanm. E mon *believe* dan donn tou madanm en sans se sa ki mon pou siport Mrs Zialor. E mon swet li tou de bon dan sa Minister ki i pou al fer. Kot i pou ganny plase e mon konnen petet nou koman bann Manm Lasanble petet i annan de letan ki nou pou bezwen enterakte osi ek bann Minis.

Give them a call pou nou ganny en koze osi avek zot. E mon panse ki lo sa kote osi keksoz i ava fasil. Sirtou la ler nou pe gete tou sa bann Minis ki pou antre enteraksyon ek nou koman bann *MNA*, mon krwar i vremen enportan.

E Mrs Zialor nou swet ou tou de bon dan ou parkour, ou travay ki ou pou al fer. E mon espere ki dan sa Minister kot i pe ale osi, kot bann dimoun osi i vremen konpran Mrs Zialor e zot vremen donn li sa korperasyon ki i pou neserer. So Mrs Zialor ou annan mon *full* siport pou ou nominasyon. Mersi.

MR SPEAKER

Mersi bokou. Onorab Rosie Bistoquet.

HON ROSIE BISTOQUET

Mersi Mr Chair. Mwan mon pou annan plezir ek loner pou siport nominasyon Mrs Zialor aköz enn premye i en fanm. E i

pa zis en fanm i en fanm ki for. I en fanm ki determinen e en fanm ki fran.

Mon pa'n war li en fanm *disruptive*. En fanm ki krwar dan li menm. E an menm tan mon'n trouve ki bann letan ki mon'n parwaz avek li dan diferan sironstans i en *pull factor* ki fer dimoun atrakte ek li. E i fer dimoun reste dan son letablisman. I pa en *push factor*, ki toultan nou'n trouve dan lepase kot nou'n dir nou'n tande laport i ouver si ou anvi ale ou ale. E mon krwar i pou fer tre byen.

E an menm tan mon war li parey en masin avek en moter ki toultan an mars. I annan sa *great leadership*. Apre i pa zis en *human being*, be selman i en *human doings*. Akoz en bon pe travayer ki mon konnen i pa zis *human being*, be selman zot travay sitan dir avek diferan, dan diferan sironstans, dan diferan pozisyon.

Sa ki'n tous mwan avek Mrs Zialor, se ki in koz lo en panse revolisyoner. E mon krwar sa i en gran rezon pou mwan kapab siport li. E akoz nou annan en latitud isi Sesel kot *well* dan lepase, kot ou'n trouve dimoun ki bezwen servis i vir an ron, i vir an ron ziska i fatigue.

E apre zot fristre e a lafen dizour zot pa konnen kote zot pou bite. Be avek sa lespri revolisyoner, mon santi ki pour sekwe serten group dimoun sirtou bann *leaders* pou zot kapab revwar zot *planning*. Revwar zot *plan of action*, revwar zot stratezi. Sirtou lot kot i konsern zot performans, pou zot pli byen kapab administre bann diferan sekter dan Gouvernman.

E sa mon krwar i pou ed en kantite bann anplwayer, *employees*, bann travayer kot i pou kapab zot pou kapab siport zot bann *employees* zot sekter.

E pou sa bann rezon swivan mon krwar mon pou siport nominasyon Mrs Zialor, akoz mon konnen i pou pous devan akoz Sesel i pou tou son zanf. Mersi.

(APPLAUSE)

MR SPEAKER

Mersi Onorab. Onorab
Sebastien Pillay.

HON SEBASTIEN PILLAY

Mersi Mr Chairman. Bonn apre midi tou koleg. Bon apre midi tou dimoun ki pe a lekout. Mr Chairman depi bomaten ek la nou'n vwar 2 kandida, 2 prodwi nou pei sistenm ki'n la oubyen si ou kapab dir de prodwi ki'n

pas atraver diferan parkour, diferan letap nou pei.

Enn pli zenn ki'n montre ou ki'n demontre en o nivo konpetans, se abilite pou analize *think* vitman lo son lipye.

Enn en pli en pti pe pli eksperyans ki'n montre nou sa tenasite, son abilite pou fer fas avek adversite. E mon krwar sa i bann kalite ki ler de dimoun i prezant zot lekòr devan Lasanble Nasyonal, ki nou bezwen aprann apresye. Nou bezwen nou pa kapab *deny*.

Sa ki mon swet Mrs Zialor se ki mon swete ki son tenasite, e ler mon'n demann li sa kekyon i pa ti'n en lentansyon pou mwan pri li. Me pou plito kosyon li ki i pou al travay dan bann dan en ladministrasyon kot pou annan dimoun avek plizyer panse plizyer fason war keksoz, plizyer fason fer keksoz. Dimoun ki pou annan osi menm tenasite ki li, e nou lo nou kote nou napa okenn lentansyon pou anpes Gouvernman fonksyonnen.

Gouvernman i bezwen fonksyonnen pou li *être* a laoter lekspektasyon Lepep Seselwa. E akòz ler Gouvernman i fonksyonnen Lepep i benefisye.

So i enportan ki nou koman Lasanble Nasyonal, ansanm nou zwe sa rol, pou

asire ki Gouvernman i fonksyonnen koman en kolektif.

E non pa napa okenn endividi dan Gouvernman. Pa endividi neserman, me napa okenn group dan Gouvernman ki rod fason pou *disrupt* travay Gouvernman.

Akòz nou tou nou'n war ki ler i annan *disruption* dan travay Gouvernman lenpak apre, i pa pe neserman sa bann ki pe fer *disruption* me plito sa bann ki bezwen sa bann servis.

So, mon panse sel *advice* ki mwan mon kapab donn Mrs Zialor, se ki i pou bezwen asire ki *wherever* kot i ale, in donn nou en lendikasyon annefe Mr Chairman ki ler in dir nou mon pa konnen si en pti *slip*, ki i konnen ki Minister in swazir me selman i pa administrativman i pa dan son lanmen.

Byensir sa i en pwen *prérogative* Prezidan pei. Me mon konnen ki i pou neser pou li annan adaptasyon, akòz ler ou en *disruptor* e ou pe *disrupt* e ou annan en *ceiling* par lao ou ki pe tenir sa. Me ler ou'n ariv lo sa nivo e si ou pou annan ankòr annan *disruption*, ou pou bezwen kapab osi marye sa avek annan serten koezyon.

E mon krwar Marie-Celine i annan sa abilite pou kapab fer sa. Mon swet li tou le meyer

dan son parkour. Mon krwar i en gran loner pou son fanmir.

Mon'n ganny sans *teach* son pti ser. Zot toultan bann dimoun vreman talante. Zot bann dimoun ki konnen kote zot anvi ale. E mon swete ki parey bann entervenans lo sa kote lata e lot kote lata in koz lo la.

Ki sa i form en sours lenspirasyon pou bann madanm, bann zenn fiy dan nou sosyete ki i enportan ki zot kapab travay dir dan en karyer ki zot swazir. Akoz i annan posibilite pou bann madanm kontinyen avanse pa zis isi Sesel, me zot a kapab osi retrouv karyer dan plizyer landrwa, si zot met sa zefor pou zot kapab avans devan. Avek sa mon remerci ou Mr Chairman.

MR SPEAKER

Mersi Onorab. Onorab Georges ou annan laparol.

HON BERNARD GEORGES

Mersi Mr Speaker. Mr Speaker mon pa pou long. Mon'n rankontre Mrs Zialor nek 2 fwa dan mon lavi. Premye fwa se enn pti sesyon *training* ki mon ti asiste e i tir war mwan.

E dezyenm fwa se ozordi la, e tou lede fwa, mon'n arive konpran ki sa ki nou pe *deal* avek se en dimoun san parey. I

pa en dimoun ki ou vwar toulezour. I i *unique in fact* dan son lespes. E mon krwar se sa *uniqueness* ki pou anmenn en gran kontribisyon dan sa *Cabinet* Prezidan Ramkalawan.

Alor tou sa ki devret ganny dir lo sa madanm, nou tou nou'n viv en moman ekstraordiner avek li bomaten. I difisil annan defwa pou *keep up* avek li, e sa i en bon keksoz nou konpran. Son lespri i mars a en vites ekstraordiner. I artikil son bann pwen dan en fason merveye.

Mon pa konnen kote Prezidan Ramkalawan pou anvoy li. Me mon absoliman sir e serten ki sa landrwa kot i pou ale non selman en motivater me bann *staff* ki i pou travay avek, pou annan sa ki nou apel an Angle en *accelerating ride*.

E mon en pti pe, mon en pti pe zalou ki mon pa pou en dimoun ki travay anba li dan son Minister, akoz *I'm sure the ride is going to be really exiting*.

Alor avek sa detrwa mo, mon ti ava kontan remerciye li pou aksepte sa demann ki'n ganny ofer. E swet li tou le meyer, la ki nou pe al aprouv son nominasyon. Mersi Mr Speaker.

MR SPEAKER

Mersi Onorab. Nou'n ariv lo moman pou pas o vot. E mon ava lir Mosyon ki nou pe vot lo la: -

In accordance with Articles 63(1) and 69(2) of the Constitution, this Assembly approves the proposed appointment by the President of the Republic of Mrs Marie-Celine Zialor to the office of Minister.

Nou ava pas o vot. Tou bann ki pour lev lanmen silvouple? Tou bann ki kont? Mersi. Wi Madanm Clerk.

Mosyon pou lapwentman Mrs Marie-Celine Zialor koman Minis, in ganny aprouve par 30 vot pour, 0 vot kont e 2 abstansyon. Alor i mon plezir pou deklare ki Mosyon in pase. Mersi.

Nou'n fer en pti gin lavans lo letan e mon sipoze i ava en bon moman apropiye pour nou pran *break*. Eskiz mwan les mwan zis korize pour rikord lo *advice* Madanm Clerk. 30 vot pour 0 vot kont e 3 abstansyon. Mersi.

Zis en pti lanons avan zot kite, Madanm Deputy Clerk in organiz *photoshoot* pou zot foto ofisyel. E sa i devret komans 1er, e mon konpran zot tou zot in ganny averti ler ki zot sipoze arive.

Si zanmen zot annan okenn kestyon petet rod Ms

Elna Etienne ki *PR officer* e ki pe organiz sa *photoshoot*, ok?

Avek sa nou ava pran en *break* nou ava retourn. Vi ki *photoshoot* pou pran nou en pe letan pou pran en pe zot letan *break*, nou ava retourn 2er. Ki ou propoze? Wi, Onorab Georges ou annan.

HON BERNARD GEORGES

Mersi Mr Speaker. Wi eski nou pou'n fini oubyen-? Akoz mon krwar ki *some of the* en pe *photoshoot* i al pli lwen ki 2er, si mon pa tronpe? I al ziska 3er? Akoz si *photoshoot* i sipoze dan sa *Chamber*.

Nou ava prosede mannyer mon ti pe anonse. Nou ava komans *photoshoot* 1er, nou ava pran Mosyon ki reste nou lo soz. Nou pou regarde letan nou pran *break* si i annan okenn *photoshoot*, okenn dimoun ki pangar soz petet nou pou bezwen aziste nou *break* si nou pa ankor fini pou nou kapab termin avek *photoshoot*.

Alor program i ava konmsa. *Photoshoot* pa bliye e petet mon krwar sa ki mon ti ava sizere osi, se ki si nou kapab konmans *photoshoot* en pti pe avan 1er. Annefe si nou ti kapab komans 1er mwen en kar direkteman serten zot *move* dan *photoshoot*.

Mon ava demann Madanm Clerk pou regarde avek Ms Etienne si nou kapab bouz *photoshoot* boner e nou komanse. Nou fer otan ki posibil. 2er nou ava komans nou ava pran nou sesyon. E nou a regarde si nou kapab aziste nou *break* pou nou kapab fini avek *photoshoot* ozordi, *ok?* Donk mersi bokou e nou ava *adjourn*.

(BREAK)

MR SPEAKER

Bonn apre midi tou Manm Onorab. E bonn apre midi nou bann telespektater an deor. Eskiz nou pou sa pti retar, me la nou a konmans. E fotespere *photoshoot* in al byen e ki tou dimoun in annan zoli portre souriyan. Mersi.

Onorab Georges nou a kontinyen avek Mosyon.

HON BERNARD GEORGES

Mersi Mr Speaker. Bonn apre midi Mr Speaker. Bonn apre midi tou bann Manm. Bonn apre midi tou dimoun ki pe swiv nou. Mr Speaker nou prosen Mosyon.

In accordance with Articles 63(1) and 69(2) of the Constitution, this Assembly approves the proposed appointment by the President of

the Republic of Mr Jean-Francois Gabriel Ferrari to the office of Minister. Mersi Mr Speaker.

MR SPEAKER

Mersi. Eski nou pe ganny segonde? Onorab Loizeau.

HON NORBERT LOIZEAU

Mr Speaker, *Motion seconded.*

MR SPEAKER

Mersi Onorab. Avek sa nou a bouz Lasanble dan *Committee Stage* e nou ava demande ki Mr Ferrari i antre dan Lasal.

Bonn apre midi Mr Ferrari, e byenveni dan Lasanble. Mon asire ou kontan pou war landrwa kot ou'n pas telman long letan dan sa bann lannen ki'n pase. Nou pou antre premye dan sesyon kestyon par bann Manm. E pou komans sa nou demann ou pou fer en bref lentrodiksyon, 2 minit, pa plis ki 3 minit lo ou menm personnel, lo ou karyer, e ou nominasyon.

E apre letan nou antre kestyon, mon pou fer sa lapel ki bann kestyon, osi ki bann repons i reste direk, e bref otan ki posibil. Mersi. Mr Ferrari ou a komanse.

MR JEAN-FRANCOIS FERRARI

Mersi Mr Speaker. Mr Speaker mon prezantasyon pou ase bref. Akoz mon mazine ki tou bann Manm isi, ou laplipar bann Manm isi i konn mwan. I konn mon parkour. Me zis pou dir zot mon annan 60an. Mon'n ganny 60an sa lannen. E mon'n ne Lopital Victoria. Mon'n marye, mon reste Au Cap. Mon annan de zanfan. E mon'n fer tou mon ledikasyon ziska *A Levels* kot *Seychelles College*. E mon ti fini avek *A Levels* dan Angle, Franse avek Listwar.

E apre sa mon ti ganny en labours pou mwan al etidye *La France*. Annefe sa labours ti pou al etidye Lalwa, me selman mon'n deswit, tre vit realize poudir Lalwa i pa mon domenn. Alors mon'n sanze pou mwan fer sosyoloji, e lekonomi politik. E mon ti fer sa Liniversite *Aix-en-Provence*. E apre sa mon ti retourn Sesel. Mon ti travay mon krwar apepre 2an NYS koman en *staff training officer*.

E answit mon ti retourn *La France* lo mwan menm pou mon fer en lenskripsyon dan en *maitrise Sciences de l'Education*, ki mon pa ti terminen akoz en loportinite ti prezante, pou mwan al *Nairobi* pou mwan fer *attachment* avek *United Nation Environment Program*, dan seksyon

Environment Education and Information. E apre mon'n retourn Sesel.

E donk mon'n dir zot mon'n travay en pti moman NYS. E osi koman en *lecturer* dan *Human Services Department, Polytechnic*. E mon'n fer serten biznes apre. Mon'n kite dan Gouvernman. Mon'n fer serten biznes, e pli gran travay ki mon'n fer se koman *co-editor* avek ou menm Mr Speaker.

E Regar en zournal ki nou'n fer. En zournal hebdomader ki nou'n fer pandan 20an. E an menm tan mon ti annan en karyer politik ki ti devlope. E zot konnen mon'n dan Lasanble pou 3 manda.

E mon karyer politik, mon pa ava al tro an detay lo la. Zot konnen mon'n komans avek Parti Seselwa. Mon'n fer tou bann parkour. E mon pa'n ganny en Doktora dan liniversite, me kekfwa mon'n ganny en Doktora dan politik isi. Akoz nou'n fer 30an dan sa domenn. E mon'n servi dan sa Lasanble avek bokou lafyerte.

Mon mazine poudir sa i apepre mon parkour. E mon met mwan a zot dispozisyon pou eksplik en pe rezon akoz mon la. E ki mon krwar mon

kapab fer plis ki sa pou Sesel. Mersi.

MR SPEAKER

Mersi Mr Ferrari. Nou a pran lalis pou kestyon. Tre byen, mersi bokou. Mersi bokou nou a komanse. E mon a komans avek enn kote isi. Onorab Aglae.

HON EGBERT AGLAE

Mersi Mr Chair. Bonn apre midi Mr Ferrari. E tou dimoun ki a lekout. Mr Chair mon premye kestyon annefe. E mon krwar i premye fwa osi ki mon pe adres Mr Ferrari se atraver en *micro* ozordi. Mr Ferrari ou pe ganny apwente koman en Minis dan Gouvernman di zour, petet mon premye kestyon mon a demann ou, kwa ki ou krwar i kalifye ou pou nou aprouv ou pou vin en Minis dan sa Gouvernman di zour? Prenon kont ki mon kapab dir ou annan en pti pe karakter en pti pe vif. Parfwa mank serten respe. E ou pa'n osi egzers bokou bann, letan ki mwan mon'n konn ou, ou pa'n vin en dimoun ase egzampler mon kapab dir.

Dezyenmman, ler ou pou pran en portfolyo Minis, ou pou annan bann responsabilite e bann resours imen ki pou anba ou portfolyo, ou responsabilite, eski ou pou kontinyen avek sa

kalite latitud, ouswa eski ou pou deside pou ou *tone down* en pti pe, pou rann lavi sa bann ki anba ou en pti pe pli ere? Mersi.

MR SPEAKER

Onorab mersi pou ou kestyon. Zis les mon a demann lezot Manm Onorab, Mr Ferrari i la koman en kandida Minis. Nou merit li respe. Kwa ki'n pase dan Lasanble avan, kwa ki ou lopinyon lo sa ki in fer avan, si ou annan keksoz pou revandike, mon pa krwar i bon. Mon krwar i en mank respe pou ou adres li dan sa fason. Me selman toudmenm mon a permet. Ma le Mr Ferrari reponn sa kestyon.

Selman mon lapel i pou lezot Manm, annou silvouple montre respe pou sa dimoun ki la. I annan tou mannyer pou ou demann ou kestyon ki i pa montre mank respe. Mersi. Mr Ferrari.

MR JEAN-FRANCOIS FERRARI

Mersi Mr Chairman. Mr Speaker. I vre ki mon en dimoun ase kontroversyel, me mon realize ki si mon pa ti en dimoun kontroversyel, mon pa ti pou la ozordi!

(APPLAUSE)

MR JEAN-FRANCOIS FERRARI

Se akoz kekfwa mon koz en pe for, mon annan en gro lavwa. Mon pa per eksprim mon lopinyon. E parey nou dir, mon enn sa dimoun *who speaks truth to power*.

E ki mon pa'n zanmen ezite pou mwan dir avek bann dimoun ki o pouvwar ki sa ki mon mazine. E sa zot pran li koman en larogans. Me mwan mon pran li koman en legzanp ki, i annan en zennonm 2020an pase ti donn mwan son legzanp, ler i ti antre dan en tanp, e i ti met en pe lord. E zot ti dir poudir i ti arogan.

E alors, me tousala ti ganny fer dan en bon lespri. E i ti ganny fer dan lentere rod lazistis, e met demokrasi dan en pei. Alors kekfwa akoz mwan mon'n la dan en serten sans avek mon zanmi, e mon sef ozordi, Mr Ramkalawan nou'n lavwa bann ki'n napa lavwa. Sanmenm sa nou'n bezwen koz for.

(APPLAUSE)

MR JEAN-FRANCOIS FERRARI

Sirtou dan sa peryod kot ti annan en diktatir Sesel, e kot zot ti pe fer bokou dimoun soufer en kantite. Alors ti

enportan ki ti annan bann dimoun parey mwan.

Me selman mon ava azoute toudswit lo ou dezyenm kestyon Onorab. Ki de ki Prezidan Ramkalawan ti apros mwan, i ti ofer mwan sa sans pou mwan servi mon pei dan en lot dimansyon, mon ti realize ki mon lavi pou sanze. Ki mon pou bezwen annan en lapros mwen konfrontasyonnel. E en pe plis linite avek bann dimoun ki mon travay. Mon byen konsyan sa.

Parkont sa ki mon osi war se ki zot, zot pa'n sanz ditou. Zot, zot ankor parey menm! Me in ler pou nou sanze, e pou nou adopte sa nouvo latitid ki nou Prezidan in dir.

(Interruption)

MR SPEAKER

Onorab Pillay. Onorab Pillay silvouple. Sa ki Mr Ferrari in dir, in en remark ki reste bokou pli lwen avek sa ki Onorab Aglae in dir. So mwan mon pe demande, lo tou kote. E sa sityasyon i kapab repete si nou les li ale, e i pa devret repete.

Alors annou koz sivilman avek respe. Nou tou isi nou'n angaz nou. Nou'n donn en langazman pou respe. E nou bezwen tenir sa langazman. Rezon akoz nou pe dir koste Sesel pou tou son zanfan, i

enplik respe. E dan mon ladres bref ki mon ti fer zour inogirasyon isi, sete ki en devwar Lasanble, se ki i vin en model respe.

Si nou le montre nou popilasyon ki nou pe respekte kanmarad, fodre nou ki isi ki montre sa legzanp respe. Eskiz mwan pou sa long ladres ki pli long ki mon'n fer isi. Me selman la i leka. Silvouple si ou kapab fer en komanter bref. Nou pa anvè aret oubyen prolong dele sa deba.

HON SEBASTIEN PILLAY

Mersi Mr Speaker. Ou komanter ki ou'n fer i totalman byen plase. Napa naryen mal dan sa ki ou'n dir. Me selman sa ki mon krwar i bezwen arive, se ki si ou *admonish* enn mon Manm lo sa ki in demande, mon espekte ki ou annan menm prensip *fairness* pou *admonish* sa *witness*, si son komanter i al an deor. Ki nou *maintain* en balans.

So si enn in al an deor, ou dir sa enn in al an deor. Ou bezwen osi kapab dir sa enn in al an deor. Pa akòz i sorti dan menm parti! Sa i mon komanter bref ki mon ti le fer. Mersi Mr Chairman.

MR SPEAKER

Dan mon avi, sa ki Mr Ferrari in dir, i lwen avek sa ki Onorab Aglae in dir. Me selman mon a demann Mr Ferrari pou annou fer sa *extra step* pou nou envit sa bann komanter ki provok ensansibilite ki nou pa oule. Ki nepli ler pou nou annan. Mersi Mr Ferrari. Kontinyen.

MR JEAN-FRANCOIS FERRARI

Mersi Mr Speaker. Mon ava termin la. Mon ava zis apresye ki Onorab Pillay i aret enteronp mwan ler mon koze. Akòz sa i pa permet mwan delivre ki mannyer mon ti a kontan delivre! Alors silvouple Onorab Pillay.

MR SPEAKER

Kontinyen Mr Ferrari.

MR JEAN-FRANCOIS FERRARI

Non, mon pe zis dir li.

MR SPEAKER

Kontinyen.

(Interruption)

MR SPEAKER

Onorab Aglae, non, mon pa pe permet ou laparol. Mr Ferrari.

MR JEAN-FRANCOIS FERRARI

Mon'n terminen Mr Speaker.

MR SPEAKER

Mersi bokou. Nou a pas lo lot kestyon. Onorab Clive Roucou.

HON CLIVE ROUCOU

Mersi Mr Speaker. Bonn apre midi Mr Speaker. Bonn apre midi Mr Ferrari. Mon abitye dir ou Onorab Ferrari. Felisitasyon pou ou nominasyon. Mr Ferrari, Onorab Ferrari parey nou tou nou konnen ou en politisyen ki'n toultan koz for, koz drwat. E ou'n en bokou legzanp pou nou tou la anndan.

(APPLAUSE)

HON CLIVE ROUCOU

Mon kestyon ki mon anvi demann ou premye, mon'n war ki ou annan en kote ki osi *soft*. Mon anvi demann ou kwa dan ou lavi ki portre oubyen ki fer ou annan sa *softness*, vin sa mouton parey nou'n war ki ou'n vini, espesyalman lo televizyon?

Mon dezyenm kestyon;- parti ki'n ale in pres en kantite lo latransparans, bon gouvrenans, rann kont. Ou koman sa politisyen for, rezonnab, entelizan, dir nou Lasanble e Lepep Seselwa deor ki pe ekout ou, ki ou annan avek ou koman sa zonn ki pou permet Gouvernman anba

Prezidan Ramkalawan anmenn sa devan? Mersi.

MR SPEAKER

Mesi Onorab. Mr Ferrari.

MR JEAN-FRANCOIS FERRARI

Mersi Mr Chairman. Mr Chairman, mon ava pou detann en pe latmosfer zis dir zot ki bann voter dan Mont Fleuri, ki mannyer zot dekrir mwan. E kekwfa i ava montre en lot laspe mon karakter. Zot dir ou "pou ou ganny en larzan ek Ferrari fodre ou lev boner. Pa tro fasil! Selman, kot i annan en bezwen, kot i annan en maler, li menm li premye pou arive."

Sa se en *legacy* ki mwan mon port bokou lenportans avek. Akoz mon santi ki mon'n mark en pe sa travay politik ki mon'n fer dan mon distrik. Akoz mon'n anvi tous dimoun la kot i enportan. Pou ed zot si zot perdi zot louvraz, si zot perdi zot lakaz, si zot perdi en dimoun ki zot kontan, la dan bor zot pou ede pou soulaz zot lavi kotidyen.

Alors sa, kekwfa i zis en legzanp. Me mon ava osi dir ki mon koz bokou, mon koz for. Me selman finalman mon pa mord sa degre for. Mon koz pli for ki mon morde. Me, rapel

mwan ou dezyenm kestyon Onorab?

HON CLIVE ROUCOU

Mon dezyenm kestyon Mr Ferrari, se mon dir parti ki'n ale in pres en kantite lo latransparans, bon gouvernans, e rann kont. Ou koman sa *nominee* ki pou antre dan nou *Cabinet*, ki mannyer ou pou fer sir ki sa i arive dan nou Gouvernman? Mersi.

MR JEAN-FRANCOIS FERRARI

Mersi Onorab. Onorab, latransparans, rann kont, bonn gouvernans zot ava rapel zot tou ti en seri prensip, ki ti ariv devan nou ler 15 lo 10 ti ariv dan pei. Alors sete nou osi nou annan par ladan. E nou annan en gran par ladan. E se nou ki'n, se Prezidan Faure ki'n anons sa bann prensip koman bann prensip ki pou gid son travay pandan sa 4 dernyen lannen.

E se nou, mon osi mon ti dan sa group, se nou ki'n met an aplikasyon sa bann prensip. Konmsi nou'n sorti lo zis koze nou'n al lo laplikasyon sa bann keksoz. E nou'n fer en bon pe travay ladan. E mwan mon vremen tre fyer avek mon bann koleg ki'n asiz avek mwan dan sa Lasanble lo bann Komite.

Sirtou dan Komite Finans dan Lasanble, pou fer sir ki i annan transparans, i annan rann kont dan finans piblik.

Akoz pou mwan, larzan piblik i en keksoz ki sakre, ki vremen enportan. Alors mwan mon annan par ladan, e mon kontan pou dir ki dan program Gouvernman Prezidan Ramkalawan, sa bann prensip i tre for, i tre o lo sa azanda. Me selman azout avek lazistis e lefikasite. Si ou met sa trwa ansanm, plis ou azout lazistis ek lefikasite, ou ganny ou en bon konbinezon pou en reisit ki mon krwar nou pou kapab anmennen pou sa pei. Mersi.

MR SPEAKER

Mersi Mr Ferrari. Onorab Vidot.

HON AUDREY VIDOT

Mersi Mr Chair. Mr Ferrari bonn apre midi. Mr Ferrari mon pou komans lo ou bout kot ou'n dir ou annan, petet ou annan en Doktora 30an dan politik. Ou parkour dan politik ki mwan mon'n konn ou, ki mon'n ganny sans ler mon'n dan Lasanble. Mon'n tann ou a plizyer repriz kot ou'n kritik bokou bann profesyonnel ki'n sorti dan parti *US*, ki'n ganny en pozisyon dan Gouvernman. San respekte petet zot

kalifikasyon, oubyen zot konnesans e lekspertiz.

Eski ou kapab asir pep Seselwa, ki bann profesyonnel ki ou konnen zot *US*, pe enport zot afilyasyon politik, ou pou respekte zot? E nou pa espekte baze lo ou, dan zot kanpanny zot in dir, Sesel pou tou son zanfan, ki zot pou ganny pouse travay?

E eski ou kapab sey asir pep Seselwa poudir ozordi ou pe ganny apwent koman Minis, e byensir avek zot mazorite, ou pou pase. Ou pou asir avek sa bann dimoun ki ou, ozordi pou demen, ou pou sanz ou karakter pou ou vin en dimoun ki pli bon, pli sen ki tou. Ki mannyer ou kapab asir pep Seselwa sa ou pou fer? Mersi.

MR SPEAKER

Mersi Onorab. Mr Ferrari.

MR JEAN-FRANCOIS FERRARI

Mersi. Onorab mon pa dakor avek ou poudir ki mon'n tret mal bann profesyonnel dan sa pei. Mon'n tret zot avek bokou respe. Bann ki'n dan Gouvernman. E mon krwar ansyen Minis Cosgrow i la, i konnen poudir mon'n tret li avek enormeman respe. Menm ki ler mon'n al fer konpanny

mon'n sot son lakaz, aköz mon pa'n anvi al *disturb* li.

So, mon santi, e mon annan bokou zanmi ki'n dan Gouvernman, ki bann profesyonnel. Ki ozordi i ankor bann zanmi pou mwan ki mon respe en kantite. Aköz Onorab sa ki mon respe plis dan bann politisyen, se lefet ki zot in vin dan politik. Aköz politik i en travay difisil. I difisil, i *very demanding*, i en keksoz nob. Alors mon respekte zot. Sel keksoz ki mon demande se ki zot fer zot travay byen, avek lazistis, avek dwatir. Apart sa napa problem.

Byensir, in annan bann ka kot mon'n kritik serten profesyonnel ki mon'n santi zot pa ti pe delivre alaoter. E mon krwar ki mon'n annan rezon fer sa bann kritik. E pou lavenir, mon pa tro krwar mon pou sanze, aköz mon pa pou kapab vin bonbon! Me mon pou fer mon travay avek tou konsiderasyon pou lazistis, pou *fairness*, e pou respe pou tou dimoun. Ki i en prensip ki'n gid mwan. Mon'n toultan per ki koman enn sa bann dimoun ki pa'n ganny respekte, ki'n ganny maltrete, ki'n ganny ensilte, ki'n ganny bate. Mon'n toultan per ki mon vin parey enn sa bann dimoun ki'n fer mwan sa bann ditor.

Alors mon toultan priye ki mon pa vin parey sa bann dimoun. E mon krwar ki Bondye in pitye mwan dan en sans ki mon, kantmenm mon ankor koz en pe for, e mon pou kontinyen koz for. Mon pou annan sa metod travay koman en Minis dan Gouvernman. Mersi.

MR SPEAKER

Onorab Vidot ki ou annan en siplemanter oubyen kwa?

HON AUDREY VIDOT

En siplemanter lo sa ki in dir. Mr Ferrari eski ou pe dir nou baze lo ou larepons, si i annan en politisyen, pe enport son bagaz, kalifikasyon, demen i vini i *apply* en louvraz dan ou Gouvernman, ou pou regard li baze lo son kalifikasyon, me pa akoz i ti en politisyen? Mersi.

MR JEAN-FRANCOIS FERRARI

Absoliman. Mersi.

MR SPEAKER

Mersi Mr Ferrari. Onorab Esparon.

HON REGINA ESPARON

Mersi Mr Speaker. Mr Ferrari ou pe ganny demande pou vin en Minis dan Gouvernman LDS. E si ou ganny plase dan en

Minister kot i annan bann proze ki'n ganny retar akoz Gouvernman US pa'n delivre, e in dezapwent elektora, ou dan ou kapasite koman Minis, ki mannyer ou pou travay pou donn lespwar nou bann dimoun laba deor, e fer bouze bann proze dan benefis tou zanfane Sesel? An dot mo ki mannyer ou pou fer ki sa Minister kot ou ganny plase i delivre? Mersi Mr Speaker.

MR SPEAKER

Mersi Onorab. Mr Ferrari.

MR JEAN-FRANCOIS FERRARI

Mersi Onorab. Mon krwar ou pe koz avek *the right person* dan sa sans. Akoz mon fyer pou dir ki pandan sa dernyen 4an, distrik kot plis proze in ganny realize se distrik Mont Fleuri. E sa pou mwan i en gran lafyerte.

E sa in arive akoz en travay tre kolaboratif ant mwan menm e tou bann lazans Gouvernman. Enkli Gouvernman Lokal, enkli Ladministrasyon Distrik. Bokou kolaborasyon in ganny met an plas. E mwan mon krwar poudir se atraver kolaborasyon ki sa bann keksoz i kapab materyalize.

Me selman parey zot konnen i annan de keksoz la, i

annan enn, se sityasyon ekonomik ki pa bon. E ki pe montre nou ki i kapab dir ankor en pe letan. Donk, pou annan en pe presyon lo pou annan bann finansman pou fer bann proze. Me selman mon krwar i pou devwar sa Gouvernman ki vini, pou gete lekel bann priyorite. Lekel bann proze ki priyoriter. Lekel bann proze ki tous lavi nou pep pli profondeman. E ki fer plis dibyen pou nou pep.

Nou ava regarde, nou ava priyoritize. E nou ava komans pou fer sa bann ki pli enportan. Bondye pitye nou ava kapab fer en bon pe. Me si i pran en pti pe letan, parey zot konnen kof i en pe vid. So nou ava fer li dapre nou mwayen. Mersi.

MR SPEAKER

Mersi Mr Ferrari. Onorab Cosgrow.

HON WALLACE COSGROW

Mersi Mr Speaker. Bonn apre midi tou dimoun. Bonn apre midi spesyal pou Mr Ferrari. Mr Ferrari, mon ti krwar ler ou'n pase pou fer kanpany ou pa'n pas kot mwan, akoz ou ti krwar preski dir enposib pou vir mwan.

An dizan sa Mr Speaker, mon ti a kontan dir Mr Ferrari an vi ki dan dernyen Lasanble

ou ti en dimoun ki'n *advocate* bokou, lo lefe ki e an vi ki mwan osi mon ti dan *previous Cabinet*. Ou'n *advocate* bokou ki politisyen pa devret vin Minis a sa letan, omwen. Me apre in annan serten langaz ki'n sanze, ki ler nou ti anvoy dimoun ki pa politisyen e la mon pe mazin spesifikman Mr Patrick Payet ki dan Minister Finans. Tre kalifye dan son domenn e i ti osi ganny rezete.

Dan sa moman difisil ki nou ete la ozordi, ki pei pe pas ladan ekonomikman, mon krwar nou bezwen bokou bann profesyonnel pou kapab donn en koudmen rod solisyon, en? Mon vwar ou CV, ou en politisyen Mr Ferrari, ou en politisyen e kwa ki fer ou krwar poudir a sa moman la, nou bezwen en dimoun koman ou, en politisyen pou antre dan *Cabinet*? Kwa ki fer ou krwar poudir ou kapab fer sa louvraz koman en politisyen dan *Cabinet*?

E dezyenm kestyon, Mr Ferrari, eski ou *hold* en lot nasyonalite e si wi, ki mannyer ou krwar petet sa i ava enpakte lo ou lwayote, lo ou louvraz koman en Seselwa dan sa nouvo *Cabinet* Mr Ramkalawan? Mersi, Mr Ferrari.

MR SPEAKER

Mersi Onorab. Mr Ferrari.

MR JEAN-FRANCOIS FERRARI

Mersi Onorab Cosgrow. Mon ava reponn sa dezyenm keston. Mon non mon mazin en i dir ou poudir si mon annan en dezyenm nasyonalite i bezwen Italyen. Wi, mon annan en paspor Italyen e i fer en bon pe letan ki mon pa ankor al *Italy*. Mon mord morde en pe Italyen, me selman i pa en keksoz ki o lo mon latib, i pa en keksoz ki dan mon konsiderasyon.

Sel keksoz ki bon avek sa paspor, se ki i permet mwan al Lerop san bezwen rod en *VISA* e mon kapab reste osi lontan ki mon oule. Me *apart* sa mon'n erit sa nasyonalite, pa mwan ki'n rode e mon en sitwayen lemond, alors mon pe reste Sesel. Mon annan 3 ser ek 1 frer, zot in ale pou zot rezon. Akoz zot lavi in anmenn zot dan en lot pei, e mwan mon'n reste isi e mon lentasyon reste.

Dezyenm, Onorab, wi ou'n byen dir ou'n byen kalifye a sa letan. A sa letan e Prezidan Ramkalawan ti fer byen kler ki dan sa peryod tranzisyon kot ti neser trouv en balans pou nou travay avek Gouvernman Mr Faure, nou ti demande ki Mr

Faure pa *load* son *Cabinet* avek bann politisyen. Akoz i pou polariz pei ki ti'n deza polariz en pe plis ankor.

E alors se la kot nou ti pran sa lapros. Me apre sa nou'n travay byen avek tou bann Minis ki Mr Faure, in swazir. Nou ti refiz serten wi, byensir, me nou'n swazir en pe ki vreman, ti bon. Menm nou'n swazir son Vis-Prezidan ki nou'n aprouve.

Alors i ti en moman dan letan. Ozordi ou ava aksepte ki probableman sel vre politisyen ki pe antre dan *Cabinet* Prezidan Ramkalawan se mwan. Donk i fer vreman en gran diferans, akoz i montre ki priyorite pe ganny donner pou bann teknisyen, bann *technocrate*, bann spesyalis.

Mon rol ladan se vreman akoz mon'n partisipe aktivman dan preparasyon manifesto Prezidan Ramkalawan pou son eleksyon, ki en dokiman politik, pou mwan kapab tenir ansanm en lekip lo bann lobzektif, lo bann target, lo bann misyon ki ganny detaye dan sa manifesto.

E alors mwan mon pou enn pou enn sa bann dimoun ki pou kontan *remind*, mon bann koleg ki bann gran prensip ki pe gid nou Gouvernman. E ki bann gran prensip ki nou'n met devan elektora. Zot in vot pou

serten keksoz e fodre nou delivre.

Alors mwan mon rol se en pe sa. E mon santi ki mon kapab fer li, akoz mon'n ansarz lekip dan Lasanble, mon'n travay bokou avek bann manm dan mon parti. E koman en *mentor*, en dimoun ki kapab anmenn lezot ansanm e mon mazine poudir i ava gard nou *on the straight road*, pou nou delivre lo sa ki nou'n promet. Mersi.

MR SPEAKER

Mersi Mr Ferrari. Onorab John Hoareau.

HON JOHN HOAREAU

Mersi Mr Chair. Bonn apre midi zot tou. Bonn apre midi Mr Ferrari. E dabor mon oule felisit ou koman en koleg, ki in ganny nomen pou vin en Minis.

Mr Ferrari, an vi ki ou ti dan Lasanble, ou ti toultan pe pouse, pe demande, me la ou'n ganny demande pou pran en lot rol kot ou pou dirize. Ou pou dan parey nou dir, *the driving seat*. Ki valer ideal ou krwar ou bezwen annan koman en Minis, eski ou krwar ou annan sa bann valer ?

Dezyenmman mon oule konnen, mon konnen poudir ou okouran tre byen bann

problenm dan nou *civil service*. E ler ou pou a latet en Minister, ki bann mezir ou pou anmennen, ki pou *translate* sa ki Prezidan Ramkalawan ti deklare dan son diskour sermantasyon, kot i ti dir ki, 'fer ou travay parey ki ou biznes e tret ou kliyan koman priyorite.' Mersi.

MR SPEAKER

Mersi Onorab. Mr Ferrari.

MR JEAN-FRANCOIS FERRARI

Meri. Mersi Onorab. Onorab enn bann mo ki mon pli kontan dan vokabiler Franse, Kreol, Angle, mon pa konnen, tou le 3 i aplike. Se sa mo, fortitud, *fortitude*. Se en mo ki mwan mon met devan koman sa kalite ki mwan mon santi, i pli enportan pou mwan. *Fortitude* dan sans ki ou toultan rod sa lafors, pou ou kapab gide, pou ou kapab reisir, pou ou kapab *achieve* serten keksoz. E *fortitude* parey zot konnen i osi, kekfwa an Kreol nou kapab tradwir li koman pa les tonbe.

Donk, mwan mon pe antre dan Gouvernman Mr Ramkalawan avek en lide ki nou annan en manifesto, nou annan en serten lalis keksoz ki nou anvi fer e nou pa pou kapab les tonbe, nou pou bezwen kree

loportinite, nou pou bezwen rod lefikasite, nou pou bezwen met an plas sa bann gran prensip ki gid nou travay. *Ok*, e mwan mon santi ki mon annan sa kalite, *I mean* pandan 30an, mon krwar kantmenm i annan ki pa tro, tro kontan mwan. Me zot bezwen omwen rekonnet ki pandan 30an mon pa'n les tonbe.

E alors dan sa prosen 5an, mon pa vwar ki mannyer mon pou les tonbe dan 5an kan mon pa'n les tonbe dan 30an. Donk, sa se sa kalite lenerzi ki mon annan lentansyon anmennen.

E dezyenm keksoz se travay pou lezot. *Selflessness*. Mwan mon kapab dir zot Bondye in bon pou mwan. Mon'n ne dan en fanmir ki'n annan, ki pa'n bezwen *struggle* e mon rekonesan pou sa. Me selman mon osi konnen ki ler ou, ou'n gannyen ou bezwen donner osi. Alors sa travay *selflessness*. Annou. E mon vwar mon bann koleg ki'n kit bann plas enportan dan zot biznes, ki pe ganny en kantite larzan, ki'n deside ferm zot biro, vin travay pou Sesel e ganny bokou mwens. Se sa, sa kalite *selflessness* ki mwan on oule vwar dan Gouvernman. Alors, vwar la 2 kalite deza ki mon ti a kontan met devan zot, ki mon krwar ki i ava gid mon travay.

Rapel mwan ou dezyenm kestyon Onorab ?

HON JOHN HOAREAU

Ki fason ou pou *translate* sa ki Prezidan Ramkalawan ti deklare dan son diskour, kot i ti dir ki, "Fer ou travay parey ki ou biznes e tret ou kliyan koman priyorite."

MR JEAN-FRANCOIS FERRARI

Onorab. Mon krwar i *self-explanatory*. Ler ou annan ou biznes, si en tiyo pe koule e ou *bill* delo pe monte, ou bezwen aranz sa tiyo. Ou pa kapab, napa en lot dimoun ki pou pey sa *bill* delo pou ou. Si ou annan en kliyan ki ariv kot ou laport e ou pe dezennen lot kote dan *store*, ou bezwen ki ou dezennen pou ou al zwenn sa kliyan. Donk, kliyan e sa bann kliyan ki nou pe servi e sa lenfrastriktir ki Gouvernman, ki pep Seselwa in travay, in transpire pou prodwir larises pou nou fer, se bann keksoz ki nou bezwen valorize.

Alors nou bezwen met tou sa ki nou travay avek, sa lenfrastriktir, sa kliyan koman premye e ki tou lezot pou nou servi zot. Se sa pou mwan ki pou pli enportan e pou bann ki konn mwan en pe. Mr Speaker, i konn mwan. Mon depi sa

dernyen 20an mon ariv dan mon biro 7er bomaten tou le zour, apart Sanmdi, Dimans e mon vwar otan dimoun ki mon kapab vwar toulezour, akoz mwan mon napa lalis dimoun ki pe espere pou vwar mwan. E sa se enn bann keksoz ki mon partaz avek mon bann koleg.

Ler ou travay dan Gouvernman, ou travay dan piblik, ou napa ler e sirtou ler ou lo sa nivo la, ou napa ler. Ou bezwen met ou o servis bann dimoun e ou pa kapab ou osi annan en latitud be ale pran en papye dokter, vini vin vwar mwan. Oubyen vini mon a donn ou en pti *attendance slip*, konmkwa ou'n sorti kot mwan. Non, vin avan. Mwan mon a vin avan ler travay, ou a vin avan e nou a met lefikasite pou ki ler nou antre dan nou louvraz nou pe delivre! Se sa kalite latitud ki mon anvi vwar. Mersi.

MR SPEAKER

Mersi Mr Ferrari. Onorab Ghislain.

HON CHANTAL GHISLAIN

Mersi Mr Speaker. Bonn apre midi tou dimoun. Mr Chair, Mr Ferrari in dir ki i premye politisyen dan sa *Cabinet* ki sa i pa korek. I annan Mr Derjaques ki osi en politisyen. Mr Ferrari koman en zonm ki'n

dan politik depi lepok koudeta, e apre dan lopoziyon, eski ou krwar ki tou dimoun ki anvi fer politik e partisip dan politik i kapab fer li? E ler ou vin Minis, ki garanti ou donn nou ki ou pa pou met presyon lo bann travayer anba ou, pou fer sir ki zot siport ou parti, si non zot pou dan problem. E ki ou pou tret tou dimoun san okenn faver, san okenn diskriminasyon?

An vi sa leksperyans ekstrememan partizan ki ou annan, ki ou'n toultan manifeste, ki mannyer ou kapab asir sa Lasanble e piblik an zeneral, ki ou pou kapab a lavenir rasanble en lekip dan Minister, dan linite e an pwennvi Nasyonal?

Dan ou repons lo kestyon Onorab Vidot, ou'n dir ki nenport ki dimoun ki politisyen, ki pa siport menm parti ek ou ozordi, zot kapab wi ganny aksepte dan Gouvernman. Eski ou pe dir nou ozordi ki ou ti fer en lenzistis ler ou avek ou parti ti anpes 6 zanfan Sesel, Dokter Herminie, Mr Dick Esparon, Mr Billy Rangasamy, Mr Patrick Payet, Mrs Louisiana Lagrenade ek Mrs Marie-Louise Potter, eski ou ti kree en lenzistis a sa bann dimoun pou anpes zot ganny en pozisyon Minis, akoz zot ti bann

politisyen, apart ki enn e ki sa menm pozisyon ki ozordi ou pe vini?

E finalman, deza serten travayer *State House* in fini ganny met a laport, eski nou espekte ki sa osi pou leka osi dan bann lezot Minister, enn fwa ki bann nouvo Minis i antre? E ki lasirans ou kapab donn pep Seselwa ozordi ki ou pou onor e menm ou bann Minis pou onor promes eleksyon, ki personn pa pou ganny met deor? Mersi Mr Chair.

MR SPEAKER

Onorab, ou'n demann apepre 12 kestyon. Mon ti a demande ki lezot Onorab i fraz zot kestyon ki i vin konpreansiv koman 1,2 oubyen 3 kestyon.

HON CHANTAL GHISLAIN

Napa 12 kestyon ladan, Mr Chair.

MR SPEAKER

Mersi Onorab. Mr Ferrari.

HON CHANTAL GHISLAIN

I annan zis 3 kestyon dan mon kestyon, napa 12 kestyon. Mersi.

MR SPEAKER

Mr Ferrari.

MR JEAN-FRANCOIS FERRARI

Ok, mersi Mr Speaker, mon ava reponn 3 kestyon. E premye kestyon ki mon ava reponn se sa enn konsernan bann Minis ki Prezidan Faure ti propoz e ki nou pa ti aksepte. Mon krwar mon'n fini reponn sa kestyon. Donk sa enn la nou'n fini avek.

Dezyenm kestyon, partisipasyon dan politik. Wi, mon krwar ki tou Seselwa i devret ganny sa posibilite, sa loportinite pou partisip dan politik. Enn bann keksoz ki mon kontan, ler koman en zenn zournalis, mon ti ganny sans al Lanmerik lo en *study tour* e zot ti aprann mwan laba ki tou bann pti baba ki ne Lanmerik, sa dokter i lev li anler i dir, "*Here is the next President of the United States!*" Tou dimoun i kapab vin Prezidan Lanmerik. Sesel si ou ti dir sa, sa lepok, sa pti baba ti kapab en pe problemn.

(laughter)

MR JEAN-FRANCOIS FERRARI

Me mwan mon krwar ki tou dimoun i devret kapab partisip dan politik. Lo size tret tou dimoun avek *fairness* e rasanble tou dimoun dan en Minister. Mon pa kapab preziz

lavenir, me mon'n dir zot i sertennman mon lentansyon akoz mon vremen krwar, tre, tre for ki Sesel i pour tou son zanfan.

Me mon ti a zis kontan Onorab ki ou esper en detrwa mwan pou vwar ki mannyer mon perform. Sel keksoz, sel levidans ki mon kapab donn ou se ki ler mon ti *MNA* dan sa 6em Lasanble, dan mon premye rankont avek Ladministrasyon Distrik Mont Fleuri, mon ti dir avek zot mon pa oule konnen kote zot vote. Sa i zot swa personnel, fer zot travay, kot zot pa kapab fer vini mon ava ed zot. E mwan kot mon bite, zot ava ed mwan. E nou'n form en lekip formidab. Ziska ozordi mon pa ni tro konnen kote zot vote, akoz mon'n fer sir poudir dan kanpany, mon pa pase kot Ladministrasyon Distrik, akoz mon respe tou dimoun ki travay dan en servis Gouvernman. Mersi.

MR SPEAKER

Mersi Mr Ferrari. Onorab Andre.

HON CHANTAL GHISLAIN

Mr Speaker, i annan mon kestyon ki pa'n reponn silvouple.

HON CLIFFORD ANDRE

Mersi Mr Speaker. Bonn apre midi Mr Ferrari.

MR SPEAKER

Atann en pti moman silvouple. I annan kestyon dan sa 3 kestyon ki i pa'n reponn. Re fraz ou kestyon.

HON CHANTAL GHISLAIN

Mr Speaker, mon ti anvi konnen ki lasirans ki son Gouvernman i donner ki bann dimoun pa pou ganny met a laport, deza i annan ki'n fini. E an sa ki konsern mon kestyon ki in dir poudir in reponn, i pa'n reponn.

Mwan mon ti anvi konnen, wi ou non, si i ti kree en lenzistis? Sa ki mon anvi konnen. I pa'n reponn.

MR SPEAKER

Sa ki'n arive nou napa okenn lenformasyon si i annan. Esper en pti kou, les mwan reponn apre ou a *resume* ou *point of order*.

Nou pa konnen si in annan keksoz ki'n pase *State House*, alor mon a demann Mr Ferrari reponn sa bout ou kestyon ki napa naryen pou fer avek *State House*. Mersi. Wi, Onorab Arissol

HON SANDY ARISSOL

Mr Speaker, mon ti a kontan gannyen en pwen klarifikasyon.

MR SPEAKER

Wi.

HON SANDY ARISSOL

Parski mon krwar sa ki Onorab Ghislaine in dir i enportan an relasyon avek i annan dimoun ki'n ganny met a laport. Kekfwa ti a bon i *substantiate* son lenformasyon, si i konnen dir nou. Mon ti a kontan konnen, parski li i konnen. Parski letan nou ti koze la, parski sa i en rimer. Ou konpran? Nou koman bann dimoun entelizan dan Lasanble, parey toultan Onorab Pillay ti *remind* nou letan i ti asiz lo sa kote latab, pou *substantiate* nou lenformasyon. I ti a byen si i dir si annan en frer ou ser ki'n ganny pouse. Dir nou, nou ti a konnen. Mersi bokou.

MR SPEAKER

Pardon, eskiz mwan. Mon santi poudir sa napa naryen pou fer avek kestyon ki Mr Ferrari i devret reponn. Mr Ferrari reponn kestyon Onorab Ghislain silvouple.

MR JEAN-FRANCOIS FERRARI

Non Mr Speaker, mon pa vwar li koman en lenzistis. Mersi.

MR SPEAKER

Mersi. Onorab. Wi mon ti'n fini pas lo Onorab Clifford Andre.

HON CHANTAL GHISLAIN

(Off-Mic)

Mr Speaker, *what about* sa bout?

HON CLIFFORD ANDRE

Bonn apre midi Mr Speaker. Bonn apre midi Mr Ferrari.

(Interruption)

MR SPEAKER

Silvouple Onorab Ghislain, mon krwar ou kestyon in ganny reponn. Nou a pas lo lot kestyon. Onorab Andre.

HON CLIFFORD ANDRE

Mersi Mr Speaker. Bonn apre midi Mr Speaker.

HON CHANTAL GHISLAIN

(Off-Mic)

MR SPEAKER

In reponn.

HON CHANTAL GHISLAIN

(Off-Mic)

MR SPEAKER

Onorab Andre, ou kestyon.

HON CLIFFORD ANDRE

Mersi Mr Speaker. Bonn apre midi tou Manm Onorab. Bonn apre midi Mr Ferrari, bonn apre midi tou dimoun ki a lekout. Mr Ferrari, mon premye kestyon i letan ou ganny *allocate* avek en portfolyo, ganny donnen en portfolyo. Ou'n en dimoun ki letan ou'n dan Lasanble koman *Chairman IAC*, ou'n toultan *advocate* dan nou Lasanble, ki i enportan ki Manm Lasanble i ganny enkli dan bann negosyasyon, ki ganny fer par Gouvernman. Pour ki nou osi nou ava kapab partisipe e konnen letan bann Trete, bann Lagreman, bann Protokol i vin kot Lasanble, pou nou kapab konnen ki nou sinyen.

Eski ou pou fer sa arive, pour ki sa 7enm Lasanble a kapab partisip aktivman dan sa devlopman.

Mon dezyenm kestyon i en pe relye Mr Ferrari, avek sityasyon ki mon sir ki ou vwar in pase yer en pti pe lo bann dimoun ki annan diferan pwennvi politik, e sa i spesifikman dan *Air Seychelles*. Ki ou, ou pou fer pou dekouraz sa kalite pratik ant bann *staff* pour ki zot pa ava annan, pe montre ledwa, sirtou bann ki annan bann pozisyon kle dan bann departman oubyen dan bann lorganizasyon?

E trwazyenm kestyon Mr Ferrari, se pandan sa dernyen kanpanny elektoral ki ou osi ou'n partisipe ki annan bokou nou ki'n partisipe ladan. In annan bann zenn ki'n ganny plase dan bann lanplwa e zot in ganny peye anba *URS*. E i annan bann ki'n *cast* zot vot dan en fason ki zot, zot anvi. Parey ou'n dir, ou'n toultan dir ki ou pa oule zot dir ou kote zot vote. Zot in *cast* zot vot ki mannyer zot anvi, e la zot pe ganny met deor, zot pe ganny retire dan sa bann pos ki zot ti'n ganny mete anba *URS*.

Eski ou krwar sa i *fair*? Eski ou koman en Minis ki pe vini pou dekouraz sa. Pou ki sa bann zenn i ava ganny sans kontinyen travay, e eski sa pa i montre ki zot ti pe ganny en lanplwa e zot ti pe ganny peye anba *URS* senpleman pou zot vot en parti politik? Mersi.

MR SPEAKER

Mersi Onorab. Mr Ferrari.

MR JEAN-FRANCOIS FERRARI

Mersi Mr Speaker. Mr Speaker, mon ava reponn sa dernyen kestyon i Onorab Loze i permet mwan. Sa dernyen kestyon lo *URS*. I posib Onorab Andre e nou'n vwar la pratik dan lepase ki larzan Gouvernman, larzan

leta, larzan *welfare* i ganny servi pou bann politik, pou ankouraz en dimoun pou vot en fason ou en lot. E sa i mal e anba ladministrasyon Mr Ramkalawan i pa pou arive.

Si sa in arive, akoz i en alegasyon ki pa ankor ganny prouve, si sa in arive, mon krwar ki sa bann dimoun ki'n fer sa i bezwen tre dezapwente. Akoz menm si zot in servi larzan piblik, rezilta eleksyon in montre poudir i annan keksoz ki'n pase. Sa premye.

(laughter)

MR JEAN-FRANCOIS FERRARI

Dezyenm keksoz, lo partisipasyon bann *MNA* dan bann negosyasyon. Sertenman Onorab Andre. Mon'n enn bann dimoun ki'n tre, mon'n en aktivis pou sa *cause*. E mon ti a kontan dir ou ki i pou en prensip nou Gouvernman, ki ler i annan bann negosyasyon enportan kot Lasanble i annan *input* enportan pou anmennen ladan, Lasanble i ava ganny reprezante. E mon konnen ki mon Gouvernman pe al tre vitman demann en serten revi lo Lakor Lapes ki nou'n sinyen. E sa i en lakor tre enportan ki nou ti a kontan revwar. E sa i enn

bann *areas* kot Lasanble i ava ganny *involve*. E enkli Lopoziyon akoz zot annan serten konpetans dan sa domenn zot osi.

Trwazyenm pwen ;- wi en pe sa bann keksoz ki pe sirkile. Mon ava dir ou Onorab Andre, mwan mon an faver laliberte lekspresyon menm lo *Facebook*. Mon pa kontan bann lensilt, mon pa kontan bann *fake profiles*, me selman i drwa bann dimoun pou zot eksprim zot. Me selman i pa byen ler en sef dan en departman, sirtou en *Human Resource Director* i ankouraz son *staff* pou ensilte lezot Direkter, lezot o zofisye. I pa zoli. E i en keksoz ki mwan mon denonse. Mon pa kapab fer naryen pou sa moman apart denons li e demande ki sa i ganny met ladan e en aksyon i ganny pran si vreman malapropo ki sa in ganny fer. Mersi.

MR SPEAKER

Mersi Mr Ferrari. Onorab Loze.

HON JOHAN LOZE

Wi Mr Speaker. Mersi Mr Speaker. Bonn apre midi Onorab Ferrari, e *welcome to your House* mon ava dir ou. Onorab Ferrari mon'n annan apepre 3 ou 4 kestyon.

Mon premye kestyon pou Onorab Ferrari, se eski ou'n deza a okenn moman investir dan okenn propriyete La Misère ouswa okenn par konzwentman avek Speaker Roger Mancienne? Sa i mon premye kestyon.

Mon dezyenm kestyon, ou'n mansyonn ou labours ki ou ti al etidye, mon ti ava apresye si ou dir nou sirkonstans egzakt anba ki ou ti ganny sa labours? Si sa labours si ti pou ou menm, ouswa ti pou kelken dot? E mon ti ava apresye en repons laverite.

Mon lot kestyon pou ou Mr Ferrari, mon trwazyenm kestyon ofet i konman en dimoun ki'n sorti dan en fanmir ki'n aktivman ede pou planifye, e egzektit koudeta 5 Zen ' 77, eski ou santi ou konsyans i gid ou, lefe ki ou en kretyen pratikan i anmenn ou dan direksyon *tender* en *public apology* avek Lanasyon Seselwa ki ou aksyon personnel, e aksyon ou fanmir in blese?

Mon katriyenm kestyon, pou ou se kan egzaktman ki ladministrasyon Prezidan Ramkalawan i *plan* pou komans antre dan negosyasyon avek bann *drug dealers*? Mersi Mr Speaker.

MR SPEAKER

Mersi Onorab. Mr Ferrari.

MR JEAN-FRANCOIS FERRARI

Mersi Mr Speaker. Mr Speaker avek ou permisyon, mon krwar ki mon madanm avek madanm Mr Speaker, i propriyeter en morso later La Misère. E ki mon'n deklare dan mon komanler ou fer ou *declaration of assets*, so ou bezwen dir, aköz si ou *partner* oubyen bann fanmir pros i annan. E mon krwar i en bon pe lannen nou'n aste sa avek en mon krwar Mr Bill Jackson ki ti siny sa lavant. Lannen? Lannen 2000 kekfwa.

Me i fer en pe 20an pase ki ase enteresan, pa ankor ganny letan fer en lakaz. Me byento mon mazine mon ava konmans fer lakaz. E fotespere ler mon ava'n fer lakaz zot pa dir poudir mon en voler, *ok*? Sa i premye keksoz, sa i premye keksoz.

Dezyenm keksoz, labours, mwan mon'n ganny labours avek Gouvernman *Français*. E mon remersye Gouvernman *Français* pou mon labours mon pa konnen si Mitterrand oubyen Jacques Chirac ki'n donn mwan. Me selman mon'n ganny en labours ek Gouvernman *Français*.

An sa ki konsern, an sa ki konsern 5 Zen, yer mon ti donn en *call* mon ti telefonn ansyen Onorab Simon Gill pou mwan demann li, “Be ki’n arive ek ou *SPUP?*” Akoz toultan nou ti dir i annan zis 2 *SPUP* la dan sa Lasanble, Onorab Gill avek mwan.

E, e sa *joke* antre nou se ki, tou bann *SPUP* in ganny kit ater e tou bann, bann lezot ki’n vini apre in gat tou sa kari.

(laughter)

MR JEAN-FRANCOIS FERRARI

Alors mwan mon pa renye mon pase. Mon pa renye mon pase. Mon dezaprouv, e mon’n toultan regrete ki mon fanmir in partisip dan koudeta li menm. Mon’n toultan regrete tou sa soufrans ki’n ganny ki’n ganny, ki ganny fer. Mwan mon ti annan 17an. E ler ou annan 17an ou pa mazin sa bann keksoz.

Me mon mon’n apre sa mon’n dedye, konbyen lannen 43an mon lavi, pou mwan repar sa bout ditor ki mon’n fer mon pei. E in pran mwan 43an.

(APPLAUSE)

MR JEAN-FRANCOIS FERRARI

E mon espekte, mon *hope* ki mon konnen ki bann *SPPF* pa pou zanmen pardonn mwan. Me selman bann lezot dimoun ki mon’n fer soufer, mon krwar zot konpran, zot konpran ki mon senser dan mon demars.

E finalman mon pa, mon pa konn sa zafer *drug dealers*. Mon konnen poudir ou Onorab Ramkalawan in dir ki in apel bann *traffickers* pou zot *come out* e, e sanz zot latitud e, e ki bann *dealers* ki la ater bann ptipti dimoun, ptipti *dealers* se bann viktim. E mon mazine ou’n konn en bon pe zot, akoz ou ti dan konpanyy Mont Fleuri ou, ou pa’n pase lo -?

(laughter)

MR JEAN-FRANCOIS FERRARI

Non, non be non mon pe demann mon pe demande kekfwa se bann viktim nou’n vwar zot nou vwar zot la pe *kick*. E nou anvi rod en solisyon pou nou kapab soulaz en pe zot soufrans. Mersi.

MR SPEAKER

Onorab Loze. Mr Ferrari in reponn ou kestyon. Nou a pase. Onorab Adelaide, Onorab Adelaide. Kestyon.

HON FRANCOIS ADELAIDE

Mersi, mersi Mr Chairman.
Bonn apre midi Mr Ferrari.

(Interruption)

MR SPEAKER

Sorry mon pa'n tann li. Mon pa'n tann li.

HON FRANCOIS ADELAIDE

Bonn apre midi Mr Ferrari.

MR SPEAKER

Kontinyen, kontinyen Onorab Adelaide.

HON FRANCOIS ADELAIDE

Ok bonn apre midi Mr Ferrari. Kontrer mon pe, mon le felisit ou dan ou pos nominasyon pou en pos Minis. Mwan mon kestyon i vreman senp, vi ki ou annan ou 60an, mon anvi konnen pandan ou 60an, 60 lannen ki moman dan ou lavi konmsi ki ou'n pli zwaye, e ki moman ki ou, ou dekrir konman pli difisil, e pli tris dan ou lavi? Mersi.

MR SPEAKER

Mersi Onorab. Mr Ferrari.

MR JEAN-FRANCOIS FERRARI

Ok briyevman, anfen mon krwar ki le 25 le 25 Oktob 2020 ti sa moman ki ti, ki ti pli zwaye.

(APPLAUSE)

MR JEAN-FRANCOIS FERRARI

Mon akoz sa in zour ki'n kouronn parey mon'n dir bokou lannen travay. E pou sa mon remersye tou dimoun ki'n partisip dan sa lavantir dan sa, dan sa levennman ki i en levennman istorik.

Kwa ki fer mwan ki fer mwan pli tris? Vreman mon napa bann moman tris mwan. Ler mon ti dan kaso mon ti mon'n kont tou kaso apard mon krwar, apard La Digue avek Anse Etoile, mon krwar ki mon pa'n ki, ki zot pa'n met mon ladan.

Me sak fwa ki zot in met mon dan kaso mon ti vwar sa konman en moman refleksyon. E non tou sa ti form par en konba pou lazistis, e mon'n fer li avek bokou lazwa, e mon pa regret nanryen. Mersi. Onorab.

MR SPEAKER

Mersi Mr Ferrari. Onorab Gill.

HON CHURCHILL GILL

Mersi Mr Chair. Bonn apre midi Mr Ferrari. Nou tou nou konnen poudir nou lendistri

touris in ganny *badly affected*. E nou *inflow foreign exchange*, i tre limite. Eski tou bann reprezantasyon ki nou annan an deor Sesel, eski ou pou ankouraz ou *Cabinet* donnen ki nou limit, nou limitasyon lo *foreign exchange* pou revwar nou bann reprezantasyon dan plizyer pei ki nou annan ozordi?

Aprè parey ou konnen nou pei i afileye ek diferan *body* enternasyonal, e sa nou i annan bann *fees* ki nou bezwen peye toulezan, e sa i an *forex*, eski ou pou anmenn dan *Cabinet* pou revwar sa bann diferan *bodies* ki nou pei, swa i annan Lakor oubyen afileye avek? Ki kout nou en bon pe larzan ki nou bezwen peye, donnen nou sityasyon *foreign exchange* si sa i en keksoz ou pou anmenn dan ou *Cabinet* pou revwar pou zisteman redwir lakantite *foreign exchange* ki nou bezwen tire dan sa letan ki nou napa? Mersi.

MR SPEAKER

Mersi Onorab. Mr Ferrari.

MR JEAN-FRANCOIS FERRARI

Mersi Onorab. Onorab lo ou premye kestyon mon krwar ki napa okenn dout okenn risk, ki okenn resours ki nou kapab met ansanm, nou pa pou

donnen pou *tourism marketing*. Nou pou vremen - akoz Prezidan Ramkalawan in eksplike, ki nou annan dan nou pei en lenfrastriktir ki egziste deza. E la lenfrastriktir touris nou pa bezwen re kree li ankor. Sa ki nou bezwen se ranpli sa bann lasanm lotel. E osi vit ki posib. Me nou napa kontrol lo la.

Me selman nou bezwen, nou bezwen kontinyen gard nou prezans medyatik lo lasenn enternasyonal, e tou sa pti Roupri, tou sa pti sou tou sa pti Dolar ki nou annan, ki disponib pou *marketing*, nou ava kontinyen met devan.

Dezyenm keksoz ki Prezidan Ramkalawan in koz avek mwan lo la, se ki se son lentansyon pou rod en sinerzi ant Minister Zafer Etranzer notaman bann Lanbasad, Sesel aletranze, e bann biro touris.

Sey gete ki mannyer nou kapab met re regete ki mannyer Zafer Etranzer osi kapab anbank lo sa zefor. E se pou sa rezon ki probableman nou ava espere ziska ler i ganny konfirman ki Minister Zafer Etranzer pou aprezan Minister Zafer *Ministry of Foreign Affairs and Tourism*. Konmsi ki nou met tou nou zefor lo nivo enternasyonal dan relans nou lendistri touris.

So sa mon santi i en mark bonn volonte e en mark ki nou pe rod lefikasite e ki nou pe rod donn nou tan sipor pou nou kapab gannnen, ki nou kapab donner pou lendistri touris. Me mon konnen Onorab ki Praslin i, Praslin ek La Digue i 2 pei, 2 landrwa ki depan bokou lo touris e nou santi sa difikilte bann popilasyon. E nou ti a kontan vremen fer tou e envit tou bann akter dan sa lendistri pou *join* ansanm pou nou fer en zefor *concerté* pou trouv sa bann solisyon. Mersi.

MR SPEAKER

Mersi Mr Ferrari. I annan en kestyon i pa'n reponn?

MR JEAN-FRANCOIS FERRARI

I annan zis en kestyon lo bann Lorganizasyon Enternasyonal ki nou afilye avek. Onorab, nou annan bann kontrent bidzeter ou menm ou rekonnet, e mon krwar ki Gouvernman i ava fer en lalis priyorite. I annan deza malerezman sa lannen Lasanble in bezwen sispann son *membership* serten lorganizasyon avek an kolaborasyon avek sa bann lorganizasyon pou zot konpran difikilte. Donk kekfw a i ava enn de ki ava ganny sispann tanporerman, me i annan

serten ki nou pa kapab nou pa kapab *walk away*.

So Gouvernman i ava tir en lalis priyorite e parey mon'n dir avek Onorab Andre Lasanble i ava osi ganny son mo pou li dir ladan. I pa pou zis en *one-sided decision*. Mersi.

MR SPEAKER

Mersi. Onorab Sandy Arissol.

HON SANDY ARISSOL

Mersi Mr Speaker. Bonn apre midi tou dimoun. Bonn apre midi Mr Ferrari. Mr Speaker mon ti a kontan demann Mr Ferrari, an vi ki annan tou sa bann, tou sa bann parol lo ou, an relasyon avek ou karakter, ou karakter ovif, ou kalite fason fer. Mon apel en fwa dan Lasanble isi menm ti annan en Manm ki ti dir ek ou poudir ou rasis, e la nou'n aprann poudir ou'n maltret bann profesyonnel.

Me mon ti a kontan zisteman demann ou, kwa ki'n fer ou *win* Mont Fleuri 3 fwa avek tou sa bann, tou sa bann kritik ki'n annan lo ou? E la ozordi ou en kandida pou vin Minis? E ou pou vin Minis sa i kler. E kwa ki'n fer bann dimoun bann dimoun an deor kontan ou, menm dan Mont Fleuri in fer ou elekte 3 fwa?

E mon'n menm tande la poudir ou ou'n tant pou ou

maltret en pe bann profesyonnel, me selman sa ki enportan pou nou *remind* dimoun se ou konman en profesyonnel, Gouvernman *US/SPPF* ti organize, pou kas ou latet konman en profesyonnel, sa ti en mank respe pou bann profesyonnel.

So dezyenmman, dezyenmman mon ti a kontan zis lo kestyon ki Onorab Ghislain ti demande, mon ti a kontan zis met dan latansyon Mr Speaker, poudir komanter ki Onorab Ghislain in fer an relasyon avek Onorab Ferrari, mon anvì reasir Mr Speaker ek tou bann dimoun ki pe ekoute dan lakour, poudir mon annan kontak avek *State House* napa personn *State House* ki'n ganny pouse.

(APPLAUSE)

HON SANDY ARISSOL

Mon anvì reasir bann dimoun dan lakour Mr Speaker lo sa kestyon mon annan kontak avek Vis-Prezidan napa personn sel dimoun ki'n ale *State House* se bann travayer ki Mr Faure in negosye avek Ramkalawan pou li pran pou li al avek se bann dimoun ki kontan pou reste travay pou li.

Mon ti a kontan reasir tou dimoun ki pe ekout nou deor,

poudir sa ki Onorab Ghislain in dir set en mansonz e en keksoz ki bezwen *retract* e antre dan Lasanble Nasyonal.

(APPLAUSE)

HON SANDY ARISSOL

E mon osi mon anvì dir poudir napa okenn travayer Lasanble ki'n ganny met deor letan nou'n pran ladministrasyon Lasanble. Tou travayer i ankor la. Alor Mr Ferrari dir nou kwa ki fer ou.

MR SPEAKER

Mersi pou sa klarifikasyon Onorab.

HON SANDY ARISSOL

Mersi Mr Speaker. Kwa ki'n fer bann dimoun kontan ou laba deor pou vot pou ou 3 fwa? E la byento nou pou vot pou ou ankor pou vin Minis menm avek tou sa bann kritik ki'n pase lo ou, enkli koudeta? Mersi bokou.

MR SPEAKER

Mersi Onorab. Mr Ferrari.

MR JEAN-FRANCOIS FERRARI

Onorab ou ek mon nou konnen ki travay politik pa fasil. E ki nou bezwen, nou bezwen annan sa lendirans. I annan ki al dan

politik zot pran zis bann *automatic promotion*, zanmen zot met kandida selman ou vwar zot dan Lasanble.

(laughter)

MR JEAN-FRANCOIS FERRARI

Bann ki mete, bann ki mete ki al tap laport dimoun ki ganny ki ganny tou bann agravasyon devan laport dimoun zot, zot ganny kit ater zot. Bann ki pa mete i zot ki rekolte bann benefis.

Parkont mwan dan sa parti ki mon ladan, nou *Leader* in toultan dir nou ki nou bezwen prouv nou lekor. E mwan mon'n ganny ou'n dir mwan mon'n ganny Eleksyon bokou 3fwa me mon'n osi kapab dir ou poudir mon'n perdi Eleksyon 3fwa.

E mon'n espere. Mon'n perdi 3fwa monn rekonmans ankor. Mon'n perdi en dezyenm fwa mon'n rekonmans ankor. Alors mon krwar ki i en pe ki bann dimoun i kontan mon osi ki bann dimoun i vwar poudir mon enn ki pa ki pa les tonbe.

Donk sa i en keksoz ki mwan ki mwan krwar i definir en pe mon karakter. Ou dernyen ou dezyenm kestyon ti kwa Onorab? Anr *ok*, mersi. Be mon krwar i en pe i en pe

koumsa. E akoz mwan mon kontan pous dimoun devan. E ozordi mon nepli *MNA* Mont Fleuri mon kontan vwar mon, mon ranplasan isi Onorab Michel Roucou, ki mon ti dir ki mon ti donn li en target mon ti dir li fodre i bat mon rikord, i kas mon rikord. E in kas mon rikord.

(APPLAUSE)

MR JEAN-FRANCOIS FERRARI

Akoz nou kontinyen fer pli byen toultan. Mersi.

MR SPEAKER

Mersi Mr Ferrari. E kestyon pou Onorab Pillay Sebastien.

HON SEBASTIEN PILLAY

Mersi Mr Chairman. Bonn apre midi. Bonn apre midi tou koleg Onorab. Bonn apre midi Onorab Ferrari, *once* Onorab, Onorab byenveni dan Lasanble Nasyonal. Mon kontan pou vwar ou pe ganny en pti pe en meyer *welcome* ki ou, ou ti donn lezot dimoun ki ti vin dan Lasanble pou reponn kestyon pou vin Minis. Mon krwar i si Lepep Seselwa i pa oule admet sa, mon krwar Lepep Seselwa alors i pa'n regard Lasanble pandan sa bann dernyen 5an

ki'n pase. Me en se swatil ki ou ki dan Lasanble ozordi pe debout konman en nomen kandida pou vin Minis dan Gouvernman Mr Ramkalawan.

E mon felisit ou pou ou nominasyon byensir. E mon annan detrwa pti kestyon pou ou pou ou donn mon detrwa klarifikasyon. Ou'n dir *à haute voix* e ou'n akse ou'n menm aksepte fer en *statement* poudir i pa ti en lenzistis, ki ti arive ler ou, e mon rapel tre byen akoz mwan mon ti lot kote pe *counter* sa ki ou pe dir, vizavi lapwentman lezot dimoun pou vin Minis.

Me apre sa nou'n vwar Onorab *Leader* Zafer Gouvernman, in menm dir nou poudir i en i en drwa konstitisyonnèl, i en eleman Konstitisyonnèl ladan. Me ou ti enn bann ki ti ki ti reste lo en baz vreman politize, partizan ki sa bann dimoun pa pou antre dan Gouvernman.

E lenzistis ki mon pe vin lo ou la se ki Gouvernman Mr Faure ti bezwen fonksyonn avek 9 Minis avek plizyer portfolyo. La menm dan letan *COVID* Gouvernman Mr Ramkalawan i pe al ganny li 13 Minis ek ou bann portfolyo pou ase *evenly spread*. So sa kestyon i al ver ou karakter konman en politisyen, eski ou santi poudir

lefe ki ou pa ti *allow* Prezidan Faure pou annan Minis adisyonnèl pou *lighten load* bann portfolyo? E *allow* bann Minister pou fonksyonn pli byen, ou'n kree ou'n ede pou kree en defayans ki Gouvernman Mr Ramkalawan pa'n kapab delivre alaoter ki ou menm ou ou'n toultan egzize delivre? Sa i en premye kestyon. Mon konnen ou pou kapab reponn sa tre byen.

Mon dezyenm kestyon Mr Chairman, ou'n plizyer fwa dan Lasanble a plizyer repriz dir avek plizyer koleg ki ou personnelman ou pa zanmen enterese pou vin en Minis. Sa in en *statement* ki ou'n fer toultan. Akoz ou ou'n dir poudir ler ou vin en Minis ou perdi e ou'n koz sa ou koz sa byen akoz ou en dimoun ki konpran, konpran byen teren parey, ou'n dir ou perdi en eleman fondamantal sa koneksyon.

Me la mon vwar ou pe prezant ou lekor konman en kandida pou vin Minis. Kwa ki'n sanze? Kwa ki'n fer o sanz sa lapros ki ou ti annan avan, kot ou pa ti anvè vin en Minis ki aprezan ou dir la ou pou vin en Minis?

E mon trwazyenm kestyon, yer mon'n tann Onorab Deputy Speaker lo lot

kote latab atraver ou Mr Chairman, fer en *statement* kot i ti dir nou ava *rubber stamp* nou, nou *Cabinet* si fodre.

Nou ava *rubber stamp* nou *Cabinet* si fodre. Sa ti sa ti Onorab Deputy Speaker ki ti dir yer. Mon ti a kontan ou konman, ou konman en dimoun ki'n toultan akiz okenn parti ki an mazorite ki dan Gouvernman, pou pa *rubber stamp* son *Cabinet*, oubyen pou pa *rubber stamp* bann Minis, eski ou santi poudir sa i lafason ki ou konman en Minis ki pou annan en plas *prominent*, petet dan *Cabinet* Prezidan Ramkalawan, i lafason ki zot, zot pou zot pou fonksyonnen avek en mazorite dan Lasanble?

Oubyen eski ou konman en dimoun ki'n vwar poudir ou bezwen modere dan ou karakter, ou pou *allow* serten lendepandans bann Manm ki ou mon konnen ou annan bokou kontrol lo la, pou zot eksprim zot lekor menm parfwa kont ou Minister, oubyen kont Gouvernman, pou ki zot a kapab realiz sa rol enportan ki Lasanble i sipoze annan?

E mon dernyen kestyon, Mr, Mr Ferrari, ou'n annan en tandans mon'n asize dan plizyer renyon avek ou, kot ler en dimoun pa le aksepte poudir ou ki an mazorite oubyen ou ki

an kontrol sa *meeting* ou, ou nerve, e ou ankoler ek sa dimoun, e ouswa ou *walk out* dan sa *meeting* oubyen. E nou'n vwar la kot ler keksoz pa pe al dan ou faver, ou'n fer serten reaksyon serten zestikilasyon.

Mon napa okenn dout ki ou pou ganny aprouve, akoz i annan, i annan en mazorite *LDS* dan Lasanble konman, konman en Minis.

Me eski ou kapab dir ek nou si ou pou pare, si ou pou pare pou ou annan en moderasyon dan ou karakter, tre politize, tre partizan, pou *allow* lezot dimoun *challenge* ou pwennvi lo bann keksoz ki kapab vin devan ou? Akoz ou menm ou'n dir e mon *quote* ou parol, "ou pou al tenir ansanm en lekip," ki donn mon lenpresyon ki ou pe vin Minis Dezinyen, e si sa i leka si sa i leka, se eski ou pou pare pou *allow* sa bann profesyonnel ki nou'n vwar in vin la parey Manmzel Devika, Marie-Celine, Mr Flavien Joubert pou zot *challenge* ou lotorite lo serten size ki zot santi zot, zot pli konnen? Mersi Mr Chairman.

MR SPEAKER

Mersi Onorab. Mr Ferrari.

MR JEAN-FRANCOIS FERRARI

Mersi Mr Speaker, non i annan 4 kestyon. Mon ava reponn kestyon 3 ek kestyon 4 ansanm si ou pa *mind*, kestyon *rubber stamp*, apre moderasyon bann keksoz koumsa.

Onorab mon pa konnen si ou'n ou pa'n remarke, me isi lo sa kote latab napa en po fler la. Napa enn ki po fler!

(APPLAUSE)

MR JEAN-FRANCOIS FERRARI

Mwan mon pa kontrol okenn sa bann Manm ki la. Nou travay ansanm, nou rod en platform kot nou kapab agree, e nou avanse.

Mwan mon pa kapab donn lord okenn sa bann dimoun, e personn pa donn lord lo sa kote latab. Nou, nou tou nou, nou avans ansanm, e i annan serten keksoz ki nou pa dakor avek, me selman ler nou pa dakor nou diskite nou trouv en teren kot nou kapab ganny lantant.

Alors mon pa kapab, mon pa kapab dir ki mon'n annan kontrol, oubyen mon pou annan kontrol oubyen ki nouvo *Chief Whip* pou annan kontrol. Non.

Se en Lorganizasyon Demokratik ki nou annan isi e

mon pa konnen kekfwa en pti pe difisil pou zot konpran, akoz kekfwa kot zot i pa koumsa. Me selman kot nou koumsa ki i marse.

Anyway lo sa kestyon annan moderasyon, mon krwar ki osi dan sa *Cabinet* ki Prezidan Ramkalawan in swazir, napa okenn dimoun ki bann ki bann ki ou kapab *walkover*. Napa. Sirtou bann dimoun ki annan bann karakter vreman tre for, e mwan mon napa, mon napa lentansyon diriz zot parey ou diriz en *platoon* solda.

Me mon parey ou konnen tou lorganizasyon i bezwen annan en striktir, e pou nou fer sir ki nou pe mars dan en fason *synchroniser* e nou pe al dan menm nou pe al dan menm direksyon. E mon ava mon krwar ki Prezidan Ramkalawan i, i rekonnet sa kalite dan mwan, pou mon kapab fer sa *achieve* sa lobzektif.

Aparaman, mon'n deza dir ki zanmen mon pou vin en Minis. Mon pa tro krwar mon'n dir sa, selman mon'n probableman dir i pa mon gran dezir, i pa mon rev pou mon vin en Minis i pa mon en keksoz ki mon pe sey *attend* a tou pri.

Me selman parey mon bann lezot koleg e mon asire tou bann ki isi e zot osi demen zot

ganny demande pou servi zot pei, zot fer li. E mwan parey *Anglais* ti ava dir “ *I am serving at the pleasure of the President.*”

In apel mwan. I ti’n kapab apel mon dan konman Komisyoner Lapolis oubyen konman sef prizon, me in apel mwan konman en Minis e mon ava, mon ava fer sa travay otan ki mon kapab. Mon pa krwar ki mon pa pou fer fot. Mon pou fer fot, mon pou tap mon lipye ek, ros ennler. Mon pou demann zot lendilzans, ler mon fer sa fot. Mon pou demann konsey mon bann koleg, mon pou demann sipor. E mon pou espekte ki sa Lasanble ki nou annan isi, tou le de kote, se en Lasanble ki anvi ki Sesel i reisi. Alors mwan mon ava espekte ki i annan bann kritik for. E lo mwan parey ou konnen Onorab ou kapab anvoy, anvoy sa bann kritik otan ki i annan mon ava pran li. Me selman si i mon ti a kontan ki dan en lespri kritik, pozitif.

E finalman mon ava pran sa premye kestyon ki ou ti’n demande lo size ou’n revin ankor dan sa size ki nou pa ti aprouv serten Minis. Onorab mon krwar ki ou bezwen realize ki an 2016 ler 15 lo 10 ti arive, Lepep Seselwa ti fek donn nou en manda. Ti’n fek dir nou la i

la kote mon oule nou oule sa pei i ale. I pa’n dir nou an 2015, i ti donn en manda Prezidan James Michel.

An 2016 pep Seselwa ti’n fini sanz son nide, apre lan Prezidan Michel. Ti en lot manda ki’n donn nou. I pa’n donn nou en manda pou nou al apiy Gouvernman Mr Faure. In vot en mazorite lo en platform diferan. Se pou sa ki nou ti demande nou ti espekte ki Prezidan Faure i vwar lo nou kote, oubyen i vwar dan bann fason endepandan bann dimoun ki kapab rapros li avek sa manda ki Lepep Seselwa in donner.

Me o komansman, Mr Faure ti anvi reste lo sa manda Prezidansyel 2015. Me ti’n fini sa lepok. 15 lo 10 ti’n fini arive. So mon pa kapab konpran, akoz ou ofanse ki nou pa’n aksepte bann dimoun ki pe vin enplimant manda 2015 ki Lepep Seselwa ti’n fini rezete.

Nou pa’n fer nanryen mal! Napa nanryen enzis ladan. O kontrer nou’n respekte lavolonte Lepep Seselwa. E pli boner ou’n dir ou’n servi sa fraz nou pa konnen si Lepep Seselwa pa oule admet sa. Be Lepep Seselwa fek admet la, la, la konbyen semenn. La, la i fek dir. I fek donn nou rezon la. So mwan mon krwar ki se koumsa

ki nou bezwen gete. Ler nou ler nou ganny en eleksyon nou servi sa manda ki sa platform ki nou'n ganny lo la. Ler nou perdi eleksyon nou fer nou kritik, me nou esper lot Eleksyon pou nou prezant en lot program pou nou ganny kekfwa eleksyon.

Alors mwan mon pa vwar Mr Onorab okenn keksoz ki mal. Mon ava zis terminen lo la poudir ki ou bann kestyon i bon, akoz ou menm ou plizyer fwa, plizyer fwa ou'n dir mon poudir ou vremen apresye mon travay. Ou vremen apresye mon karakter. Ou vremen ou'n swiv mon ou'n aprann en kantite ek mwan. Me kekfwa ou devret dir sa avek ou bann koleg. E kekfwa zot ava osi kapab aprann en pe avek mwan. Mersi.

MR SPEAKER

Onorab Pillay, eskiz mwan esper en pti moman. ou'n demann 4 kestyon mon vwar Mr Ferrari in reponn ou 4 kestyon kler.

HON SEBASTIEN PILLAY

Non Mr Chairman.

MR SPEAKER

Akoz ou *Leader* Lopozisyon mon pou permet ou fer en komanter si ou krwar. Me selman mon pa

anvi prolonz en deba ant ou avek Mr Ferrari. I pa sa le bi. Me silvouple konpran mon lo la e mon donn ou dernyen laparol. *Thank you.*

HON SEBASTIEN PILLAY

Mersi, Mr Chairman mon krwar ou, ou pe ou pe *preempt* sa ki mon pe al dir e ou pe ...

MR SPEAKER

Ou'n demann 4 kestyon.

HON SEBASTIEN PILLAY

Wi Mr Chairman kekfwa ou pe antisipe. Ou pe antisipe mon pe anmenn keksoz dan en *area* ki ou santi petet i kapab i kapab kree serten *contention*. Mon krwar ou pa devret annan okenn krentif. Akoz mon krwar mon pa ti konnen poudir Onorab Ferrari i annan sa gran ladmirasyon pou mwan osi mon byen kontan, pou vwar. I sertenman pa'n montre li pandan sa dernyen 4an. Me i byen mon konnen. Me selman sa ki bezwen ganny dir mon krwar Mr Chairman se ki, Mr Ferrari in vremen, in vremen fer lekonomi avek laverite ozordi.

Mr Ferrari in konsantre lo sa 3 Minis ki ti ganny propoze konman bann kandida, e wi ki ti bann politisyen. Mon kestyon ek Mr Ferrari, sete pou admet ki i ti obliz en *Cabinet* pou

fonksyonn avek plizyer portfolyo lo en menm Minister, san ki i ti donn sa bann lezot Minis ki sa Gouvernman ti pe rode.

E sa ti andikap sa Minister. E se sa mon, mon, mon pwen ki mon ti le ki Mr Ferrari i admet. E Mr Ferrari i admet sa. In admet ki konman en politisyen sete son azanda, sete son azanda pou fer ki Gouvernman pa fonksyonn alaoter, zisteman, pou ki nou ganny sa rezilta ki nou la ki'n dir ki Lepep Seselwa in admet. Sete sa ki Lepep Seselwa i bezwen realize, ki Mr Ferrari in aktivman pran en azanda politik.

E prezan Mr Chairman, mon pa pe mank respe pou ou mon annan gran respe pou ou. Mr Chairman sa ki mon oule fer Mr Ferrari konpran, se eski la ki pe al dan en Gouvernman, eski i pou sanz sa latitud ki i annan pou ki nou kapab travay ansanm? Oubyen eski, eski i pou zwe en azanda parey in zwe?

Akoz Mr Ferrari i en bon politisyen li Mr Chairman, i en bon politisyen li. E sa ki mon pe mwan mon lenkyetid ki mon annan se ki *the leopard never change in its spots!* Se ki Mr Ferrari pa pou sanze ler i al dan

en *Cabinet!* Mersi Mr Chairman.

MR SPEAKER

Mersi, ou'n poz ou kestyon. Mr Ferrari reponn li lo sa dernyen pwen silvouple.

MR JEAN-FRANCOIS FERRARI

Me mon krwar pa mon napa nanryen pou mon dir li. Mon'n, eksprim mon ki lo mon pozisyon politik e mon krwar ki Onorab i bezwen aksepte ki ler ou gannyen, ou annan en mazorite.

Si ou annan en mazorite, pa kapab vin lager. Ou bezwen aksepte. Se sa larealite politik. Ler nou'n vini nou'n met en politik ater, e Lepep Seselwa, in siport nou in dir nou *go ahead* nou pe donn zot 15 lo 10. Ou pa kapab vini apre ekspekte ki nou pe al fer zot politik. Se sa keksoz ki mon pe sey mon pe sey fer ou konpran Onorab.

Donk mon pa, ou demann mwan si mon pou sanze, a lavenir. Non mon pa pou sanze. Mon pou toultan respekte sa manda ki Lepep Seselwa in donn nou, i donn mwan. Si Lepep Seselwa i donn mwan en manda pou travay dan Lopozisyon, mon'n travay, mon'n travay tou sa bann lannen dan Lopozisyon mon

pa'n plennyen, mon pa'n, mon pa'n sey fer mon pa'n sey fer rebel mon pa'n sey fer sa. Nou'n aksepté.

E se sa ki mon krwar la demokrasi i devret se koumsa ki devret ete. E mon swete prezan ki, ki a lavenir ler nou ler mon vin dan sa Lasanble avek laprouvasyon Lasanble, zot ava vwar mon konman en Minis Larepublik Sesel ki pe vin rod sa ki bon pou Sesel, e ki e ki tou i byen zot dir i byen, kot i mal zot dir i mal. Se sa, sa kolaborasyon ki mon pe rode. E mon espekte ki mon ava gannyen avek tou le de kote latab. Mersi.

MR SPEAKER

Mersi Mr Ferrari. Avek sa nou'n termin sesyon kestyon. E mon a remersi Mr Ferrari ankor, e mon a envit li pou fer son depar.

(MR JEAN-FRANCOIS FERRARI WAS EXCUSED FROM THE HOUSE)

MR SPEAKER

Tre byen. Mr Georges ou pe al konmans lo deba? Eski nou, nou retourn dan Lasanble avan? Apre ou a prosede. Yes Onorab. *Carry on.*

HON BERNARD GEORGES

Mersi Mr Speaker. Mr Speaker avan ki nou al pli lwen. Mon eskiz mon lekor avek Lasanble. Me mon'n mank en pti fraz dan Mosyon ki devan nou la. E mon ti ava swete anba *order* 44 fer en amannman a mon Mosyon e demann ou *waive requirement* ki mon bezwen donn 48 erdtan pou sa. Akoz i en *simple amendment*.

MR SPEAKER

Eksplik mwan.

HON BERNARD GEORGES

Wi Mr Speaker ler Prezidan in ekri ou pou donn lalis Minis, i ti dezir Onorab Ferrari, Mr Ferrari pou vin *Designated Minister*.

E i annan en lartik Konstitisyon Lartik 75 ki pa direkteman dir ki nou bezwen aprouv sa dezinyasyon. Me dan en fason endirek Lartik 75 (3) i sizere ki sa dezinyasyon osi bezwen ganny laprouvasyon Lasanble.

E donk avek ou permisyon, mon pe *move* pou amann sa Mosyon ki devan nou, *comme* swivan;- pou *delete* sa mo 'and' ant 63 (1) ek 69 (2) e ranplas li par en *comma*. Pou azout apre 69 (2) and 75, 75 in *figures* 'and 75.' E a lafen ant sa dernyen mo *Minister* avek sa *full stop* pou *insert and his designation as Designated*

Minister;- capital D capital M. Dan en fason ki si nou aprouv sa Mosyon nou pe osi aprouv son designation as Designated Minister. Mr Speaker, I move that this amendment be allowed.

MR SPEAKER

Mersi. Eski sa Mosyon i a kapab ganny segonde? Segonde par Onorab Sandy Arissol. Tre byen. Alor sa ki mon konpran se ler nou met sa apre i ava sa nouvo Mosyon.

Nou bezwen pran en vot lo sa Mosyon. Ok Mosyon in ganny segonde? Nou a pran en vot lo amannman dan sa Mosyon *please*. Sa ki an faver sa amannman lev lanmen silvouple? Mersi. Okenn Manm ki kont? Madanm Clerk donn mon rezilta.

Ok amannman ki konsern apwentman Mr Ferrari *as Designated* amannman wi ki azout Mr Ferrari *as Designated Minister* in ganny aprouve par 22 vot pour, 0 vot kont e 9 abstansyon. Mersi alor mon deklare ki amannman in pase.

Prezan nou kapab prosede? Alor nou pou prosed avek deba. Wi silvouple zis tenir lanmen anler ziska ler mon kapab ganny bann non. Kapab bes lanmen kote isi. E Onorab *Leader* Lopozisyon mon

sipoze ou le mon anons mon azout ou non lo la. Mersi nou a prosede. E mon a konmans kote isi Onorab Norbert Loizeau.

HON NORBERT LOIZEAU

Mersi Mr Speaker. Bonzour tou dimoun. Bonzour tou dimoun a lekout. Mr Speaker mersi pou donn mon ankor en sans pou mon kapab koz lo Mosyon an siportan nominasyon Mr Ferrari.

Mr Speaker mon pou konmans koumsa. Ler mon get Mr Ferrari ozordi i fer mon mazin *way back* 20an pase, ler mon ti fek antre dan politik. Sa letan mon ti'n zis ganny anvoye dan en kannal dan en kannal delo kot ti annan bokou, bokou predater otour mwan.

Mr Speaker mon ti pe anpandan avek en pti bout *straw* sa letan Onorab Arissol i a rapel byen. Me Prezidan Larepublik ozordi ki ozordi Mr Ramkalawan ti dir avek Mr Ferrari, "Sov sa boug ki laba."

E Mr Ferrari ti vini, i ti tyonbo mon lanmen ti dir mwan, "Frer vini ma sov ou lavi." E mon remerci li pou sa Mr Speaker.

I ti tir mwan kot mon pe noye Mr Speaker sanmenm sa mon annan en gran ladmirasyon pou li. E si ozordi

mon sa Norbert ki mon ete, se gras a Mr Ferrari.

E pandan sa bann letan sa ki mon ti kontan ek li, sa bann letan mon ti parey en pti lagrenn dan en po Mr Speaker. Kot Prezidan Larepublik tanzantan ti dir avek Onorab Ferrari zet en pe delo li. E Onorab Ferrari tanzantan ti aroz mon pou fer mon grandi e vin sa politisyen ki ozordi mon ete. Se sa ki mon annan gran ladmirasyon pou Mr Ferrari.

Mon'n annan gran ladmirasyon Mr Speaker, akoz Mr Ferrari in travay dan Lasanble e osi an deor Lasanble. Nou tou konnen. Son travay ki'n fer dan Lasanble e an deor Lasanble, i menm fer li raport lopital sa mon pa pou al lo la. In fer bokou, akoz mwan pou mon Mr Ferrari Onorab Ferrari bougla i en *fighter*.

E ansanm avek Prezidan Larepublik ki ozordi i Prezidan Sesel, zot in travay dir pou ki Lopoziyon in ganny rekonnet dan Sesel. E la Mr Speaker permet mon *quote* en keksoz dan en diskour ki mwan mon ti fer dan 6enm Lasanble.

Mon rapel mon ti dir ki sa travay ki nou, nou pe fer dan Lopoziyon sa letan ki ti nou, nou pa ti pe fer li zis pou nou mazorite dan Lopoziyon. Me

nou ti pe fer li zot osi ler zot pou vin dan Lopoziyon. Ozordi zot dan Lopoziyon. Sa en keksoz ki mwan mon ti dir. Nou ti anvi ki Lopoziyon i ganny rekonnet, parey ozordi zot pe ganny rekonnet e zot travay konman en Lopoziyon i bokou pli fasil ki nou ler nou ti dan Lopoziyon. Mr Speaker mon rapel ti annan 11 nou an 2007. Parfwa mon ti antre anba latab manyer serten zot ti pe pil lo nou lo sa kote latab!

Mr Speaker sa letan menm en gran riye ki Onorab Charles ti riye ti le fer ou taye la anndan. Me nou konman en Lopoziyon nou ti debout *firm* pou fer sir ki lavwa Lopoziyon i vremen ganny tande.

E sa travay ki, ki Prezidan Larepublik, Onorab Ramkalawan in fer konman *Leader* Lopoziyon ozordi, i pe permet zot travay dan en later mou mon kapab dir Mr Speaker. Akoz mon dir sa?

Akoz ozordi lontan *Leader* Lopoziyon i ganny bate. *Leader* Lopoziyon pa ti ganny sans, televizyon ti *ban*, televizyon pa ti montre travay Lasanble zis akoz pou Seselwa pa tann *Leader* Lopoziyon kot i koze.

MR SPEAKER

Onorab ou pe vin lo karakter Mr Ferrari byento? Mersi.

HON NORBERT LOIZEAU

Mr Speaker i enportan ki nou tras sa zistwar aköz Onorab Ferrari ki'n en Manm dan Lopozisyon ansanm avek Prezidan Larepublik, e ansanm ek nou, bann lezot Manm nou fer bokou ki zot ozordi zot konman en Lopozisyon zot kapab koze.

E Mr Ferrari Mr Speaker, in enn ki'n fer bokou travay, sanmenm sa mon ladmirasyon. In travay pou fer sa later mou dan Lopozisyon. E la mon anvi an terminan mon anvi dir zot dan Lopozisyon vi ki later i mou profite plant en pti keksoz, ki zot kapab rekolte dan 5an, pa plant bann pye lagratel aköz i pou grat zot! I pou grat sa pti group dimoun ki ozordi pe siport zot e ankor dan 5an pou napa personn ankor, mwan mon pou bezwen desann al ouver en lot parti Lopozisyon, si zot pa fer atansyon!

E sa i en konsey ki mon anvi dir avek *Leader* Lopozisyon ki fek antre. Onorab Ferrari ansanm avek nou in fer en travay formidab, formidab en travay, pou ki ou ozordi ou travay i fasil. E pa plant dan sa later mou. Pa plant bann move lagrenn, parey bann lagrenn

mon ti anvi dir en lot soz lagratel, aköz i pou grat zot, i pou grat lezot dimoun e zot pou nepli egziste.

Mr Speaker mon anvi siport Onorab Ferrari, en zanmi, en *mentor*, en boug ki ti tir mon dan sa gran kannal delo antoure avek tou bann predateur ki ozordi dan Lopozisyon zot pa ti la. I ti tir mon e ozordi in fer mon vin sa politisyen ki mon ete ozordi. Mr Speaker mersi pou sa de pti mo.

MR SPEAKER

Mersi Onorab. Onorab Loze.

HON JOHAN LOZE

Mersi Mr Speaker. Mr Speaker i kondisyon ki nou tou nou konpran par en *interview* se ki nou vini nou koz laverite, tou laverite esansyelman e nou ganny zize par nou parol, nou karakter nou *demeanor*, lafason ki nou konport nou diran nou *interview*.

Sadly i annan keksoz ki ganny dir ozordi ki mon'n tann dimoun riye, dimoun bat lanmen, dimoun in aplodir, mon krwar zot aplodir lo *party line* zot aplodir i en *rubber stamp*, *it's an extension for the rubber stamp party* ki zot in vini.

Mr Speaker letan Onorab Ferrari i asiz la devan, e mon

kestyonn li lo negosyasyon ki en komitman ki Prezidan Ramkalawan in fer, en *Policy decision* ki Prezidan Ramkalawan in anonse, konsernan negosye avek *drug dealers*. E Onorab Ferrari in dir mwan koumsa mon'n *involve* dan konpany Mont Fleuri asire ki mon konn *drug dealers*. *The sad part* avek sa se, se sa bann manrmay Mont Fleuri ki nou pe apel *drug dealers*?

Lenterpretasyon Onorab Ferrari se en *drug dealer* ki nou bezwen negosye avek se sa manrmay Mont Fleuri? Seryezman? Se sa Polisi ki Gouvernman LDS pe al enplimante? Se sa manrmay Mont Fleuri la ki zot pe *label* konman en *drug dealer*. Se li konmsi *the threat* li. Li ki, ki menas pou nou sosyete. Li ki marsan pwazon *from what* Onorab Ferrari in dir mwan.

Mwan letan sa in ganny anonse, mon ti annan *genuine hope* ki zot ti konnen ki zot pe fer, zot ti konnen kwa ki zot pe koz lo la. Mon ti annan lespwar ki Prezidan Ramkalawan ti serye dan son demars. Akoz mwan pou mwan, i pa sa manrmay anba tanmaren Mont Fleuri ki bezwen ganny adrese. I sa enn ki pe fer vin sa zafer ki pe met ater par kilo, par tonn,

par *whatever*, ki antre Sesel. Mon pa konnen mwan.

Mwan mon ti toultan krwar se li, se li ki zot pe al *deal* avek. Letan ki *Minister* Fonseka ti dir avek mwan i annan plizyer mwayen ki kapab ganny aplike, pou *deal* avek sa sityasyon drog ozordi.

Mon senserman mon pa ti espekte ki *Minister* Fonseka ti pe adres sa bann manrmay anba tanmaren Mont Fleuri! Mon pa ti krwar sa mon. Mwan mon ti krwar zot pe koz lo sa enn dan son gro transpor, sa enn dan son gro lakaz, sa enn ki annan 4, 6 lakaz. Mwan sa ki mon ti espekte. Ki zot ti pe senserman vin *deal with the root of the problem!*

Pa asiz la dir mwan, mon asire ou konn bann *drug dealers* akoz ou'n dan konpany *involve* dan konpany Mont Fleuri. Mont Fleuri mon konn sa bann manrmay ki asize anba tanmaren! Sa bann manrmay mon konn zot byen, wi me zot *drug dealers*? Zot ki nou bezwen adrese?

Si se sa ki Onorab Ferrari pe dir mwan, pe dir nou sa Lasanble, pe dir Lanasyon Seselwa ozordi, i en zour tris. I en zour vremen tris pou nou pei. E i en zour pli tris ankor pou tou Seselwa ki ti *genuinely*

anvi en sanzman. Akoz sa ki'n dir nou la, se sanmenm sa ki'n ganny pratike pandan plizyer letan. Nou atrap sa pti sa zenn dimoun la nou atrap li swa nou larg li ouswa *whatever* nou fer. E nou *label* li konman en sikse.

Mwan mon ti krwar zot vreman konnen poudir probleman i pa la, i pa sa bann manmay Mont Fleuri ki mwan mon'n rankontre ki mwan mon'n konnen pandan sa kourt moman, so.

MR SPEAKER

So Onorab adres karakter Mr Ferrari silvouple.

HON JOHAN LOZE

This speaks to his character. This speak directly to his character Mr Speaker, akoz se li ki'n dir mwan mon'n konn *drug dealers* Mont Fleuri. *Speaks directly to his character. It's speak to a character flaw.*

MR SPEAKER

Ou'n fer sa pwen *move on*.

HON JOHAN LOZE

Yes Mr Speaker. Yes mon pou toultan bezwen *move on*, kan nou tous serten zerb dan ou kote laplenn parey Onorab LOTO in dir.

Mr Speaker, en lot kestyon ki mon'n adrese ozordi dan

karakter, zisteman karakter Onorab Ferrari, mon'n vwar en dimoun ki pa posed konpasyon pou son *fellow human being*.

Letan kestyon sa bann Minis ki ti ganny rezete, bann profesyonnel parey Mr Billy Rangasamy ki pe retourn dan zot *Cabinet* la parey SS Payet ti ganny *chucked out*. Li pou li sa ti zis *en jeu* politik sa. E lafason ki i dekrir sa, in *boil li down to en rapport de force* ki ti'n ganny vote 15 lo 10 e bann *en jeu jouer* politik ki'n dekoul *from* sa *rapport de force* ki ti'n vin *from* bwat vote.

Be oli sa bann imen? Oli sa madanm ki ti antre dan sa batiman depi avan 8er, i ti antre dan sa batiman asize anler, trankilman atann son *interview* avek Lasanble Nasyonal, zis parey Mr Ferrari ozordi in ganny son *interview*, i ti asize i ti atann i ti ariv boner, i en profesyonnel li, i konpran la ponktyalite. E ki Onorab Ferrari ti fer avek son *Banda Brazil*, se ki i ti deside ki ni bonzour, ni bonzour *not so much as a "by your leave"* pa pou dir sa madanm, ni bonzour pa pou dir li. Zis enform li *from wherever she was sitting* konmkwa ki *sorry* nou pa pou koz avek ou nou. Akoz lapolites Sesel in *expire*. Nou nepli dan en pei kot nou kapab dir

bonzour en *être humain fellow Seychellois* parey nou.

Selman li ozordi i vini, i fer son *interview* avek tou larogans ki'n kapab *muster* e i *walk out* en sourir lo son figir i *happy* in ganny sa ki i ti pe rode.

Be sa madanm li? *We do not even pay a thought* to sa madanm. Nou pa mazinen? Nou pa mazin li konman en imen. E klerman Onorab Ferrari pa'n mazin sa madanm. I pa mazinen poudir ti annan en imen e plizyer imen, letan mon dir plizyer imen ti annan fanmir pe asize la anler. Sa bann dimoun ki ti vin *interview* sa zour konman bann kandida pou pos ministeryel, zot fanmir ti pe asize la anler zot tou.

E ti pe asiz an fas avek Onorab Ferrari. E son group ki ti deside komet sa akt malelve sa zour. Ou pa ni menm dir bonzour sa madanm e bann lezot kandida ki ti'n vini. E pou ozordi lafason ki'n reponn i les nou konpran ki konpletman dekonekte avek tousala li.

I konpletman dekonekte avek sa laspe imen konmkwa ti annan imen *involve* pou li i pa en kestyon imen sa. I bann *en jeu* politik. I bann raport fors ki'n ganny atraver bwat vote. E la i le nou met li ansarz en Minister. Avek sa kalite fason vwala avek sa kalite fason

panse. Avek sa mank konpasyon pou en Seselwa, en Seselwaz parey li menm.

E Onorab Ferrari in asiz la devan ozordi in les nou konpran poudir li i espekte ganny *rewarded* pou son *misbehaviour*. I espekte ganny en draze, pou son move konportman. E li i pa konpran li kot in mal fer, i pa konpran kot in mal azir. Me en imen ki pa konpran kot in mal fer. Ou donn li responsabilite, ou donn li pozisyon ankor kan in deza ti pe abiz pozisyon ki ti deza annan fas avek son prop frer ek ser Seselwa? Se sa ki nou anvi enstri nou zanfan? Se sa lavenir?

MR SPEAKER

Onorab Loze ou'n al pou 10 minit.

HON JOHAN LOZE

Mr Speaker.

MR SPEAKER

ou'n al pou 10 minit, silvouple ou kapab *wrap-up conclude*.

HON JOHAN LOZE

Onorab Ferrari size son doub Nasyonalite in leve. Mr Speaker *am speaking to his character*. Size son doub Nasyonalite in leve in *wave it away* pa enportan mon en *Italien*, mon

hardly servi sa paspor. Be i annan en bout ki Onorab Ferrari pa'n dir zot. Zour ki Onorab Ferrari ti ganny son paspor *Italien* letan i ti vini, i ti mont kot *National House* kot *People's Assembly*, i ti debout anler i ti pran son paspor Seselwa i ti zete! I ti balans avek Minis Hodoul i ti dir i pa oule! Met sa byen dan zot latet. *This the kind of person that we are dealing with!*

E mon dernyen pwen, mon'n donn li loportinite pou koz lo son labours aletranze. Zot konnen aköz sa ti en labours pou en letid Lalwa? Aköz i ti en labours ki ti'n deza fini donneren avek en zenn Seselwa en *ex-Parlmanter* ki ti pe etidye Lalwa deza. Par kek mannigans en serten Minis lo *Cabinet*, sa labours ti ganny arase e donneren avek Onorab Ferrari. I konnen li. E i konnen mon konnen. I konnen mon konnen egzaktaman ki mannyer in fer pou li al etidye, i konnen

MR SPEAKER

Ou pe koz lo keksoz ki alegasyon, nou napa okenn posibilite pou baz li lo laverite. Silvouple *conclude* avek karakter Mr Ferrari. Mersi.

HON JOHAN LOZE

Mr Speaker, nou'n ariv en staz dan nou Lasanble kot nou annan en *eagerness* pou koup mikro Speaker, i koup son prop mikro tou. Be Onorab Ferrari Jean-Francois mwan mon pou dir *he does not meet the test*. E ozordi *if anything* in prouve, ki i pa *fit to serve as a Minister of the Republic of Seychelles*. Mon konnen zot pou *rubber stamp* li aköz sa i zot fonksyon ozordi. Zot in arive vin en parti po fler ki zis *rubber stamp* tou desizyon ki zot Prezidan i anvoy devan zot, e sa nou'n aksepte sa. Nou lo sa kote latab nou pa pe vin *rubber stamp* nanryen. Letan nou vwar en dimoun ki *unfit*, nou pou prononse konmkwa i *unfit for service* e la nou pe senm en bon fri, nou pe senm en bon fri.

E Onorab Loizeau mon konnen sa mo ki ou ti anvi dir ki ou'n perdi fodre ou devlop ankor en pe plis kouraz frer. Be avek sa Mr Speaker mon pou terminen e mon pou swet ou kouraz *in the Chair* e aprann koup mikro. Mersi Mr Speaker.

MR SPEAKER

Mersi. Onorab Rosie Bistoquet.

HON ROSIE BISTOQUET

Mersi Mr Chair. Mon pa pou kapab reste trankil san dir en mo pou siport kandidatir Mr

Ferrari, apre ki mon'n swiv son enteraksyon apre midi. Son parkour dan politik Sesel i vremen long. In form parti en mouvman ki pa'n zanmen les tonbe malgre i pa ti fasil. Me ozordi tou zanfan Seselwa pe benefisyé.

Zot dir Mr Ferrari pa kontan profesyonnel. Me mwan mon pou dir zot lekotrè. Mr Ferrari ti enn parmi le 3 *MNA LDS* ki ti sipòrt Lasosyasyon Ners pandan lamars an 2019. E nou trouve poudir akòz ki nou ti annan sa lamars, se akòz kondisyon bann ners zot lapey ti ba, e zot kondisyon travay osi pa ti tro bon. Ti napa okenn *MNA US* ki ti sipòrt sa lamars. Sirtou menm si i ti annan ners ki ti *US*.

De lot kote mwan mon pa'n travay ek Mr Ferrari de pros. Me mon'n dirize mon'n travay avek li, tre kourt sirtou, e mon'n trouv son parkour dan sa 6em Lasanble konman en *MNA*. Mon vwar li i vibran, i dinamik i fran e osi en dimoun teren e en *people's person*.

E mon'n vwar li osi i fasil pou diriz nenport ki kous travayer, ou profesyonnel. Alors mon pou sipòrt nominasyon sa zonm dan son kandidatur konman *Designated Minister*, sa zonm ki menm ganny kas son latet pou li

anmenn la demokrasi pou en meyer lavenir pou tou Seselwa. Mersi.

(APPLAUSE)

MR SPEAKER

Mersi Onorab Bistoquet pou entervansyon bref e *to the point*. Onorab Audrey Vidot.

HON AUDREY VIDOT

Mersi Mr Speaker. Bonn apre midi tou dimoun ankòr enn fwa. Mr Speaker, pep Seselwa ki'n swiv Lasanble Nasyonal ozordi apre midi, zot in tandè e vwar pou zot menm karakter e kalite personnalite zot nouvo Minis Dezinyen Mr Jean-Francois Ferrari.

Sa ki mon kapab dir avek tou sa bann dimoun, ki'n anvoy mon mesaz, e ki pep Seselwa ki pe swiv nou, se ki Mr Jean-Francois Ferrari in reazir e konport li, zisteman parey nou, nou ti espekte li reazir e konport li dan sa prosedir *interview* nou lo sa kote latab. E devan pep Seselwa, zot vwar e konpran pou zot menm.

E mon apresye ki Mr Jean-Francois Ferrari in onnet e fran pou dir avek pep Seselwa ki zot pe espekte de li e ki pa pou zanmen sanze.

Alors pou bann ki ti vot pou zot sanzman radikal, e ki

pe konmans konplent mon mesaz se tenir for, akòz i annan plis ki sa ki zot pou konplent pou vwar pou zot menm dan sa 5an. Pou bann ki konn li dan Lasanble Nasyonal mon swet zot kouraz dan servis piblik. Tenir for, akòz sa ki mon konnen a plizyer repriz dan sa menm Lasanble ki nou pe asize la ozordi plen de nou, espesyalman nou ki'n dan *US* nou'n temwen kot plizyer Minis ki ti dan Gouvènmàn *US* ti vwar, e tandè dan plizyer deliberasyon kot Mr Jean-Francois Ferrari in fer resorti klerman avèk nou bann profèsyonnel, ki'n vini bann teknisyen avèk ki'n akonpany bann Minis poudir sa msye in abes zot a plizyer repriz, par son bann komantr e i pa'n valoriz zot.

So zot pou vwar ankò pou sa 5an. Mon swet zot tou bonn sans, e mon pou la. Mersi.

MR SPEAKER

Mersi Onorab. Onorab Michel Roucou.

HON MICHEL ROUCOU

Mr Speaker mersi. Bonn apre midi tou bann Manm Onorab. Bonn apre midi spesyal pou tou zabitan Mont Fleuri. Mr Speaker mon pa pou kapab gat sa sans pou mwan koz lo enn

mon zanmi, en papa, en msye en zanfan ki'n grandi Mont Fleuri. Sa se Minis Jean-Francois Ferrari.

Pou sa 3an ki mon'n frekant li, mon'n vwar poudir i en msye ki annan en leker pou son pei, pou son distrik e pou tou bann ki dan 7er bomaten ti fer zot mye pou vin vwar li pou rod en fason pou *sort out* zot problemm.

E son laport ti toultan ouver. Mwan osi mon ti ganny dir plizyer keksoz lo sa msye oparavan. Be ler mon ti frekant li, mon ti vwar poudir i lekontrè. Mon ti vwar poudir i en zonn ki'n ouver son lebra gran pou montre parey bokou in eksplike.

Mon'n ganny sans pou mwan travay avèk li dan tou sord fason. Politik, sosyal e mon'n aprann bokou. E ozordi se gras a mon la se akòz li, li ki'n tyonbo mon lanmen e gid mon pou mwan vin en *leader*.

Mr Speaker lo non tou zabitan Mont Fleuri mon le dir li, mersi.

(APPLAUSE)

HON MICHEL ROUCOU

Mon konnen poudir menm ki pou ganny nomen konman en Minis i pou ankò la Mont Fleuri avèk nou, akòz son leker in

toultan avek zabitan Mont Fleuri.

Mon konnen poudir dan leo Rochon Terence pe mazin li, dan leba Rochon Titin pe mazin li, Corgate Mona, Mrs Sono, Nella e plizyer ankor dan Forêt-Noire Mrs Fanny pe mazin li. E mon le dir bonn sans dan son parkour kot in pran son nouvo letap e mon le dir li ki Mont Fleuri i pou toultan la deryer li. Mersi.

(APPLAUSE)

MR SPEAKER

Mersi Onorab. Onorab Aglae.

HON EGBERT AGLAE

Mersi Mr Speaker. Mon osi mon pa anvî gat sa sans pou mwan fer en pti kontribisyon lo lapwentman Minis Dezinyen dizour.

Mr Speaker sa ki mwan mon'n aprann an gran disan, se ki pou ganny respe ou bezwen montre respe. E mwan mon en dimoun ki ziz keksoz drwat. Kot i byen, mon pou dir i byen. Kot i mal mon pou dir i mal.

E mon rekonnet Gouvernman dizour i bezwen annan li en *Cabinet*, e kot i bezwen osi fonksyonnen pou delivre pou sa pep, parey zot konpanyi eleksyon in dir.

Mr Speaker dan sa parkour pou sa Gouvernman mon travay mwan se pou fer sir ki kot i byen mon pou dir i byen, e kot i mal mon pou bezwen kritike.

Mr Speaker Mr Ferrari mon napa dout ki i kapab *lead* en group dimoun, ki i kapab *lead* en Minister. Me mon lenkyetid se ki son aksyon ki i riske fer ler i dan son *leadership*. Premyerman eski i pou pare pou li ekout bann profesyonnel ki anba li, bann dimoun eksperyans ki pou donn li zot lopinyon teknikal an ver son Minister?

Eski i pou pare pou ekout zot e pran desizyon baze lo bann fe larealite ki ganny mete? Sa i enn mon lenkyetid aköz Mr Ferrari li menm li, parfwa i krwar dan zis sa ki i dir ki li i byen.

Mr Speaker dan sa pei osi ou bezwen konstate ki i annan 28,000 plis 28,000 siporter *US* ki ti vote dan sa dernyen eleksyon. I en sonm en sif ki sibstansyel ki fer ki zot annan en gran reprezantasyon.

E sa ki mwan mon ti a swete ki zot osi zot ganny trete avek respe aköz zot in dir Sesel i pou tou son zanfan. Sa 28,000 i zanfan Sesel.

Mr Speaker osi mon rekonnet ki dan ladres ki

Onorab Ferrari in vin devan in dir swivan aksyon ki son fanmir in enplike dan koudeta, ki in dir ki in pran li 43an pou li kapab refer byen ouswa tras sa laliny drwat swivan sa aksyon. E mon rekonnèt kantmenm in per pou li vini pou dir pardon, in rod tou fason pou fer le trou pou dir poudir in rekonnèt ki sa aksyon ki i ti fer ti mal. E mon apresye son fransiz dan sa laliny.

E se sa ki mwan prezan mon konman Mr Speaker mon pou montre li serten respe mwan osi, e, rekonnèt poudir ki i ti fer i ti mal.

Me Mr Speaker, responsabilite pou ou konman en Minis, i gran akòz ou pou annan en rol lo *Cabinet*. Mon pa ti ava swete ki i servi son pouvwat ki atase avek en karakter en pti pe vif, pou li kapab bouloz son *way* dan tou keksoz e fer ki serten lavwa ki ganny met devan pa pou ganny ekoute, ouswa akòz li i pou annan zorey Prezidan ki lavwa bann profesyonnel lavwa bann *technocrate* i ganny abese. E pa pran kont pou lavansman nou pei. E si i al dan sa laliny mwan pou mon sa i serye e grav.

Mr Speaker osi mon konpran poudir Mr Ferrari i en zanfan Seselwa, ki i bezwen travay pou nou pep, me nou konman Lasanble Nasyonal e

nou lo sa kote osi parey atraver ou Mr Speaker Onorab Loizeau in fer resorti ki ozordi Lopoziyon i annan lavwa pou li kritike koze, e sa travay ki nou bezwen pe fer e Lepep atraver sa 28,000.

MR SPEAKER

Onorab ou'n depas 10 minit en *please*.

HON EGBERT AGLAE

E atraver sa 28,000 mon pe *wrap-up* Mr Speaker.

MR SPEAKER

Mersi.

HON EGBERT AGLAE

Nou fer sir ki zot ganny en proteksyon san okenn form viktimizasyon ouswa opresyon. E mon swet Onorab Ferrari dan son parkour konman Minis Dezinyen tou de bon, e mon swete ki i *tone down* en pti gin son latitud, pou fer ki i ava vin en bon Minis. Mersi.

MR SPEAKER

Mersi Onorab. Onorab Waven William.

HON WAVEN WILLIAM

Mersi Mr Speaker. Mr Speaker ankor enn fwa i en loner pou mon kapab donn sipor sa Mosyon, ki pe apwent Mr

Ferrari konman *Designated Minister*.

Mr Speaker mon'n ganny sans travay obor Mr Ferrari letan i ti lo i ti *Chairman* Komite Zafer Etranzer. E mon ti vwar dan li serten kalite, ki en dimoun ki pasyonnen letan i annan en size ki konsern li e ki i anvi anmenn le meyer pou pep Seselwa. Mon'n vwar li en dimoun ki pouse. E i pa'n en dimoun ki'n les tonbe letan i vwar ki keksoz kapab vin pli meyer. In toultan pouse pou fer sa e mon'n apresye sa bann kalite dan li.

Mr Speaker mon osi apresye pandan bann moman ki mon ti pe pas dan serten difikilte, letan mon ti dan *US*. I enn parmi bann dimoun ki ti anvoy en lanmen drwat avek mwan poudir be ou kapab kont lo nou sipor, pou mwan kapab, avans devan mon bann kestyon, Mosyon ki parfwa i ti en pe difisil letan mon ti pas sa bann difikilte dan 6em Lasanble. E mon vreman apresye sa, e mon dir li mersi pou sa.

(APPLAUSE)

HON WAVEN WILLIAM

Mr Speaker, mon osi anvi mansyonnen ki lo Komite Zafer Etranzer, i annan bokou letan

osi ki mon ti vwar ki i ti *tone down* kot i ti kapab vreman met presyon lo Departman *Foreign Affairs* pou ganny serten keksoz, me i ti montre serten eleman konsiderasyon, kot i ti *tone down* e konpran sityasyon. So mon vwar poudir in annan sa balans dan son fason fer, lo sa Komite konman *Chairman IAC*.

Mr Speaker mon anvi dir osi ki i annan bokou dimoun deor la, ki'n apresye son bann entervansyon, malgre ki i annan mon pou dir ki pa tou dimoun ki pou apresye, akoz ou pa kapab fer plezir tou dimoun, me nou annan dimoun la deor ki apresye son limour dan lafason, ki in fer son bann kontribisyon dan sa Lasanble.

E i annan dimoun osi ki pe dir mon la poudir be ou konnen nou pou mank Onorab Ferrari la dan Lasanble, avek son fason ki fer son deba. Me mwan mon anvi dir ki Mr Ferrari mon krwar lalit ki'n anmennen vizavi drwa imen, vizavi en meyer Sesel, mon krwar i merite sa plas ki i pe gannyen Mr Speaker.

E mon pou swet li tou de bon. E i kapab kont lo mon sipor Mr Speaker. Mersi.

(APPLAUSE)

MR SPEAKER

Mersi bokou. Onorab Sebastien Pillay.

HON SEBASTIEN PILLAY

Mersi Mr Chairman. Mr Chairman pandan sa 2 dernyen zour nou'n pas nou letan pou nou diskite plizyè, plizyè nominasyon e i annan nominasyon ki lo nou kote latab nou'n aprouve apre ki nou'n ekout sa bann dimoun la anndan ki manner zot in prezant zot lekor.

Nou ti vot pou Mrs Marie-Celine Zialor, nou ti vot pou Mr Flavien Joubert, Mr Naadir Hassan, Mrs Devika Vidot lo baz zot klarifikasyon, lo baz lafason ki zot in prezant zot lekor.

Nou lantretyen avek Mr Onorab Mr Ferrari ozordi, i enn ki'n, ki'n fer mon konpran en keksoz vreman enportan. E pe fer mon demann mon lekor konmsi en kestyon baze lo bokou keksoz ki mon'n tann bann dimoun vin dir mwan depi zour ki mwan mon'n ganny, mon'n ganny apwente. Si oule ganny elekte pou vin *Leader* Lopozisyon par bann Manm lo sa kote latab.

Bokou dimoun i dir mwan poudir be ou bezwen aksepte poudir i annan en Gouvernman

LDS o pouvwar e ki ou bi se pou travay pou byennet pei.

E mon kontan sa. Mon pare pou mon travay pou byennet pei ek mon pep ki enkli sa 28,000 dimoun ki'n vot pou nou sa 35,000 dimoun ki'n vot pou zot ki vot pou Lopozisyon, ki enkli tou Seselwa.

Me en keksoz ki mon kapab rekonsilye mon lekor avek se ler, en Minis en *prospective Minister* i admet ek mon i admet ek mon poudir zot ti refize donn en Gouvernman ki ti la, ler zot, zot ti an mazorite konman Lopozisyon en *Cabinet* ki sa Gouvernman ti bezwen. Akoz zot santi poudir zot azanda sete pou anmenn en sanzman. E si sa i leka, dan fer sa zot in *deny* sa Gouvernman en *Cabinet* ki kapab travay.

E mon asire ki ler zot in fer sa desizyon zot in menm kontakte sa bann dimoun ki zot pa'n mete pou dir ek sa bann dimoun, rezon akoz zot pe fer sa e ozordi i annan enn parmi sa bann dimoun ki zot pe repran akoz zot konman en Gouvernman, zot dir zot bezwen sa dimoun.

E sa ki mon le sey fer Lepep Seselwa konpran, si sa bann dimoun ti'n ganny sans antre a sa moman, eski lavi sa bann ki ti ganny afekte par en

serten inefikasite Gouvernman pa ti pou'n sanze?

Eski par zot aksyon zot pa'n endirekteman konman Lopoziyon ler zot ti la afekte dimoun? E se sa kestyon ki mon pe demann mon lekor. E enn bann arsitek, enn bann arsitek enn bann arsitek e sa i al ver karakter enn bann arsitek, enn bann arsitek sa *move* akoz mwan mon annan menm en keksoz ki pe fatig mon enn bann arsitek sa mouvman, sete Onorab Ferrari.

Prezan kestyon ki nou bezwen poze se ki ler Onorab Ferrari pou dan en Gouvernman, kot i santi son Gouvernman pa pe performen kwa ki i pou *engineer* ankor. Kwa ki pou *engineer* ankor?

Mr Chairman mwan mon le zis mon le poz en pti kou, pou mwan demann ou en klarifikasyon. Ou konnen dan 6enm Lasanble ti annan bann Manm ki ti pli vokal ki vokal, ozordi sa bann Manm i zis mirmire. Zot in pli *move* ki bann po fler ki divan pe zis pas ladan.

So prezan mon ti a kontan konpran konmsi eski ou'n donn mon laparol akoz mon'n lev mon lanmen, sa bann Manm pa'n lev zot lanmen, eski mon kapab ganny sa kourtwazi pou mwan kapab fini mon

prezantasyon, sanmenm sa ki mon pe fer.

MR SPEAKER

Bann mirmirasyon in ariv plizyer fwa tou le de kote. Silvouple Onorab Pillay kontinyen. Selman mon ti a demann ou ankor ou'n pas en kantite letan revwar rikord *LDS* dan Lopoziyon. I pa sa size sa Mosyon. Size sa Mosyon se Mr Ferrari si i kalifye pou li ganny apwente Minis. Mersi prosede.

HON SEBASTIEN PILLAY

Mersi Mr Chairman. Me zisteman, zisteman sa rikord i baze lo travay ki Mr Ferrari in fer konman en Manm sa lekip, en Manm enportan sa lekip. E ozordi i pe pran en plas *prominent* dan Gouvernman Prezidan Ramkalawan.

E Prezidan Ramkalawan i donn pei en lasirans ki son Gouvernman pou travay pou tou pep Seselwa, mon napa rezon pou dout li akoz i pa ankor fer son travay.

So mon kapab dir si i pou fer si i pa pou fer. Mon bezwen donn li benefis dizour. Me sa ki mon pa kapab donn benefis dizour se ki Onorab Ferrari, ansyen Onorab Ferrari in admet avek nou Lasanble, ki zot ti vin avek en azanda dan Lasanble pou fer en travay. E

sa travay ki zot ti vin fer sete pou anpes Gouvernman fonksyonnen, e zisteman se sa rezon ki nou vwar sityasyon arive. Akoz i pa mon ki'n dir sa. Li ki'n dir sa.

E mwan e mwan ozordi mon apresye ki bann Onorab lo lot kote latab in dir zot in ede pou Lopozisyon fer son lavwa. Sert mon pou bezwen servi sa lavwa, e zot pou bezwen ankoler mon pa konnen zot pou bezwen pa kontan, zot pou bezwen mirmire, sa i pou zot pou zot *prérogative*. Me mon pou bezwen servi sa lavwa pou mon dir Lepep Seselwa kwa ki mon santi en laverite, e kwa ki mon santi dan en sityasyon kot lezot dimoun pe eksprim zot lekor lo la.

E zot pou bezwen aksepte. Si zot anvi *counter*, zot ava *counter* akoz zot respe mwan mon respe parlas Lasanble.

E an konklizyon Mr Speaker, an konklizyon mon bezwen dir en keksoz ki senp. Ler nou ti konmans sa legzersis, ler nou ti konmans sa legzersis, ti annan zis 3 Manm LDS, ki ti oze demann kestyon. Apre ki mon ti lev en kritik kont zot, zot ti retournen e zot tou konmans demann kestyon.

Mon krwar Lepep pe konmans vwar ki kalite Lasanble zot le vini. Be mwan

mon pa pou les zot vin sa kalite Lasanble. Mon pou *remind* zot a tou repriz ki nou rol dan Lasanble.

E mwan personnelman Mr Chairman, mon pa krwar mon pa krwar dan senserite Onorab Ferrari, ki i pou al dan Gouvernman e son *focus* i pou lo anmenn pei pli devan, dan plas lo travay lo en azanda politik. Se sa ki mon pa krwar. E sa i mon pozisyon.

E pa trakase mon, mon pou zet en pti git delo lo sa bann po fler lot kote latab tanzantan, pou zot fer sir mon fer sir ki zot kapab bouz zot en pti git. I annan, i annan 25 zot e en zour petet nou a tann 25 zot pe koze. E i gou Mr Chairman mon konnen ou'n donn mon en gran *leeway* mon remersi ou.

MR SPEAKER

Mon ti krwar ou pe al *conclude*.

HON SEBASTIEN PILLAY

I gou Mr Chairman. Vwar i annan sa soz Lasanble. I gou Mr Chairman pou vwar ozordi en Onorab Woodcock atraver ou ki pe lager lebra kase, pou defann Gouvernman e menm bliye poudir i pe defann Gouvernman ler i krwar i dan Lopozisyon!

Konmsi i pou gou pou vwar sa. E i enteresan pou

Lepep Seselwa vwar sa bann kalite keksoz. Pou vwar Onorab Adelaide. E byensir mon gran zanmi mon koleg lo lot kote latab. I pou gou pou vwar sa. I pou gou. Mersi Mr Chairman.

MR SPEAKER

Mersi. Onorab Gervais Henrie.

HON GERVAIS HENRIE

Mersi Mr Speaker. Bonn apre midi tou dimoun. Mon pran laparol ozordi apre midi. Dabor mon le re afirm mon langazman pou travay pou tou dimoun ki'n elekte mwan e mon bann koleg dan Lasanble Nasyonal. Kan i byen nou pou aplodir e dir ki manner pou anbelir, kot i mal nou pou dir kote pou amelyore. Reste asire sa bann dimoun Mont Buxton.

Ozordi apre midi nou'n vwar en keksoz, dan en kandida ki fizikman pou vin la devan nou, pou ozordi. E nou'n vwar latitud en parti Lopoziyon vizavi Mr Jean-Francois Ferrari ki senboliz tou bann karakteristik en group dimoun *in denial* zot in perdi eleksyon. Mon pe zantiy ek sa mo. Zot in ganny bate dan eleksyon!

E zot pa ankor oule aksepte. Alor bann dimoun ki pe ekout nou, annou pardonn zot. E alor zot in vin avek en latitud, kot zot konmsi zis pe

repros li aköz Mr Ferrari in en arsitek dan zot defet! E mon aplodir li pou sa.

(APPLAUSE)

HON GERVAIS HENRIE

E lontan in konmanse in pran nou letan, in ankouraz mon zenerasyon pou vin devan e pou evantyelman nou nou'n sa zenerasyon ki'n fer sanzman apre 44an ki lemonn pe aplodir Sesel, pou ki finalman nou'n kapab anmenn sanzman demokratik.

E zot in pe menm zot pe dir poudir zot pou retournen, zot retournen sa latitud ki zot in pran apre midi sirtou anba direksyon *Leader* Lopoziyon zot pe met zot parti an *voie* disparisyon.

(APPLAUSE)

HON GERVAIS HENRIE

Mon pe dir zot en. Zot pe met zot parti an *voie* disparisyon!

Mr Speaker dan zot bann rezimen zot pe dir ek nou poudir nou *rubber stamp*, nou pe *rubber stamp*, nou pe vin en parti ki pou *rubber stamp*. Be mwan mon'n sot kap dan Mont Buxton depi Roche Bois atraver Dan Lenn ziska Mont Signal, pou met sa Gouvernman la. E wi mon pou siport li. Mon pou

siport li si zot anvè apel sa sipor *rubber stamp*. *Too bad* pou zot. *Too bad* pou zot, akòz mon pe bezwen aprouv sa ki 35,562 ouswa 59, 54.9poursan Seselwa in met mwan la pou fer, pou donn li en Gouvernman ki pou marse ki pou anmenn sanzman ki in espere tou sa letan. Alors zot kontinyen reste dan zot *denial*. Zot pe pas dan bann faz, zot pou sorti evantyelman.

Prezan Mr Speaker. Mon ava dir poudir in napa en lekòl ki dimoun i ale pou li vin en Minis, ouswa napa en travay ki prepar person pou vin en Minis. Me i enportan ki en endividi letan i pran sa rol, i annan 2 keksoz, dabor bon zizman lo en kote, apre i bezwen pare pou li annan bann *far reaching vision*.

E mwan depi ler mon'n konn Mr Ferrari depi ler mon'n vin dan Parti *SNP* an 2007, mon'n vwar sa dan li. E dan plizyer konversasyon ki nou'n fer in etabli a plizyer lenstans, kot i anvè etabli annou apel li en *legacy*, pa pou li personelman me pou Sesel e bann zenerasyon ki pou vini.

Savedir mwan mon pou napa difikilte pou donn li mon vot, akòz mon krwar poudir Mr Ferrari i sa dimoun ki pou batir lo sa ki'n konstri dan lefase. I

pou batir lo sa ki'n konstri. E i pou kontinyen pouse pou ki plis keksoz i arive.

Aprezan Onorab Georges dan en entervansyon, mon krwar apre ki Mr Derjaques ti'n pase, i ti eksplik nou ki mannyer i normal, ki Prezidan Ramkalawan i met 1 ou 2 kolaborater politik, dan son lekip. E i annan 2 dimoun ki dan sa lekip. Mr Derjaques e Mr Ferrari.

Akòz depi konmansman ' 91, ' 92, ' 91 in la obor li, ki mannyer konmsi ou espekte kit li ater ozordi? I pa pe fer li en faver, me in vwar sa vizyon zot annan pou Sesel zot in formel li ansanm, ou vwar? E alor Mr Ferrari enn bann karakteristik ki en dimoun pou bezwen konman en Minis, se ki nou apel li konman en *political navigator*.

E pou bann dimoun sirtou ki'n avek li dan mwan mon'n servi avek li dan katriyenm Lasanble, mon'n servi ek li dan 6enm Lasanble e mon'n vwar i annan bann moman kot in sa dimoun ki'n navig politikman pou negosye e i fer sa ekstrememan byen.

I en dimoun ki pe al ki pe vin konman en Minis ki pou annan sa i kapab koz langaz ki Minis Finans pou koze. E sa i

en *asset* pou li al avek dan *Cabinet*.

E en lot zafer mon vwar li konman en bon *manager*. I en bon *manager*. E dan pozisyon kot i pou al ganny mete mon krwar poudir i pou kapab *build* li en lekip ki pou fer li konfyans i pou osi i osi annan sa *leadership skills* pou li kapab asanble en lekip efektiv otour li.

Me pli enportan, mon ava mon pa konnen si sa mo i egziste an Kreol me en dimoun ki en enplimantater i kapab enplimant keksoz. Li dan sa bann moman ki mon'n konn li toultan vwar li kapab *manage* bann kriz, ouswa *fire fighting*.

E sa i bann kalite ki nou bezwen pou en dimoun ki pe vin en Minis. Me pli enportan dan tou i *humble*. I *humble*. E i pou pare pou li aprann avek lezot. E i pou parey mon'n dir i pou rekonnèt bann keksoz ki'n ganny fer. I annan liminite. In dir nou letan in la devan. *Verbatim* i kapab prouve. In dir ek nou poudir parfwa mon pou tap mon lipye. Parfwa mon pou fer fot e mon pou demann sipor.

Me alor konmsi zot pa vwar poudir set en frer Seselwa ki'n vin la devan? Ti nesaser pou nou repros li koumsa? Seryezman? Ti nesaser? Mon pe get zot tou dan zot lizye enn

par enn, ti nesaser pou zot fer sa?

(Interruption)

HON GERVAIS HENRIE

Alor mwan mon swete mwan mon krwar poudir zot repros li akoz tou sa letan.

MR SPEAKER

En pe lord silvouple.

HON GERVAIS HENRIE

Tou sa letan, in en pikan lo zot deryer. Pou sa rezon zot in repros li. Zot ti krwar zot in vin la avek lafrim, lafrim in refoule, akoz so lapo i epe. Lafrim in refoule.

Mr Speaker mon ava termin an dizan sa. Mwan mon demann Prezidan Larepublik pou met Mr Jean-Francois Ferrari ansarz Minister pli difisil an menm tan pli enportan pou Sesel. Minister pli enportan pou Sesel. Nou pa ankor dekouver delwil nou. Nou delwil se ou lanmer. Se sa kot nou rises i ete.

E tou sa bann kalite la ki mon'n dir, dimoun ki kapab *manage* kriz i kapab fer *fire fighting* ki *humble*, ki kapab *build* bann lekip otour li ki efektiv. Mwan mon dir donn li Minister Lapes akoz Gouvernman *LDS* fodre ki fer

lapes vin pilye nou lekonomi, e No.1, an term reveni dan nou pei. Mersi Mr Speaker.

(APPLAUSE)

MR SPEAKER

Mersi, mersi Onorab. Ou'n zis ariv ou 10 minit. *Ok* a se moman mon a apel, ekout mon Onorab Pillay. Ou menm ou fek *complain* dimoun pe enteronp ou. *Ok* ou menm ou fek *complain*. Alor si ou, ou montre legzanp lezot a swiv ou, e ekout ou. Mersi. Onorab Georges mon ava apel ou pou *resume*. Onorab Georges.

HON BERNARD GEORGES

Mersi.

(Interruption)

MR SPEAKER

Silvouple *carry on*.

HON BERNARD GEORGES

Mersi Mr Speaker. Osito ki lot kote i *settle down*, mon ava konmansé.

Mr Speaker ozordi nou ti annan en sans promot enn nou koleg ki'n la avek nou, depi en pake lannen. E nou ti konnen nou ti konnen ki zot, lo zot kote zot ti pou tonm dan zot prop

latrap. E olye ganny vwar pou *push* en koleg, zot ti pou tonm dan en latrap denigre li depi premye kestyon in ganny demande rod tou sord pinez ki i annan e met sa devan.

E se sa rezon, se sa enn bann rezon prensipal, akoz i annan zis 10 zot lo zot kote latab ozordi.

(APPLAUSE)

HON BERNARD GEORGES

Akoz you can not rise to the occasion! Zot ganny en sans parey kandida Prezidansyel Mr St Ange ti dir, e zot in mank sa sans. Zot in rat sa sans.

Mwan mon ki mon pou fer Mr Speaker, ozordi mwan apre midi ansanm avek tou lezot isi me mwan mon pou *rubber stamp* sa Mosyon, ki devan nou e mon pou anvoy Onorab Ferrari dan *Cabinet* Prezidan Ramkalawan.

(APPLAUSE)

HON BERNARD GEORGES

Akoz i merite. E merite e i merite. Akoz si i annan en dimoun parey Prezidan Larepublik ozordi ki'n lalit pou son plas dan en *Cabinet*, se Jean-Francois Ferrari!

(APPLAUSE)

HON BERNARD GEORGES

Mr Speaker ler mon ti koz Lendi swar pou linogirasyon Prezidan, mon ti lir en pti morso dan en *speech The Man in the Arena*. E ti annan pa zis Prezidan Ramkalawan ki ti *The Man in the Arena*.

Me annefe Jean-Francois Ferrari ti osi *The Man in the Arena*. Akoz se li ki son figir *was marred by dust and sweat and blood*. Pa selman dan en fason figuratif. Me dan en fason aktyel.

Onorab Ferrari in sa boug ki depi premye zour parey in dir in kont kaso. Sez in ganny kase lo son ledò, in ganny swiv pandan en peryod letan i ti reste kot mwan lakaz avek mon madanm ek mwan, akoz i pa ti kapab reste okenn lezot landrwa akoz zot ti pe target li. Ou konn sa tre byen Mr Speaker, akoz ou osi tanzantan ou ti bezwen al dormi dan kaso dan sa bann peryod letan.

E si ozordi, sa msye in fer sa parkour politik e in anmenn en laviktwar pou son parti sa enn ki'n la a kote *through thick and thin*, akoz ki i pa kapab ganny en *reward* konman en Minis? Ki se sa ki fatig zot, akoz

i pe ganny *reward* par son Prezidan, pou sa travay ki'n fer pou anmenn laviktwar? Akoz Mr Speaker annou pa bliye ki se Jean-Francois Ferrari avek Wavel Ramkalawan ki ti met zot lavi *on the line* pou sa 35,000 dimoun ki ti vot pou zot!

(APPLAUSE)

HON BERNARD GEORGES

Me osi pou sa 28,000 ki pa ti vot pou zot.

(APPLAUSE)

HON BERNARD GEORGES

Mr Speaker si i annan en dimoun ki nou tou nou ti pe espekte pou vin Minis, se byen Jean-Francois Ferrari. E zot osi zot ti konnen i pou vin Minis, akoz zot in prepar en pti diskour an ekrir ki zot in anmennen ozordi pou zot lir apre midi.

Si Prezidan Ramkalawan pa ti'n nonm Mr Ferrari konman enn son bann Minis dan *Cabinet* zot menm zot, zot ti pou dir be kisisa ki ou fer sa boug in travay ek ou tou sa letan ou kit li ater? *Seriously! Seriously deliver, delivered*. La apre midi e ozordi non selman zot pa'n ganny lakourtwazi pou zot promot enn nou bann koleg, me zot in menm evant keksoz lo

li, ki pa'n zanmen arive. Onorab Loze in dir atraver ou Mr Speaker, ki ler i ti ganny son paspor *Italien* Onorab Ferrari in zet son paspor Seselwa! *Seriously!*

Mwan, mwan ki ti Avoka mwan ki Avoka Jean-François Ferrari pou sa zafer paspor. Alor napa en dimoun ki konn sa pli byen ki mwan. E Mr Speaker ou a dir zot ki'n arive.

Zot Gouvernman Parti Inik sa lepok ki ti pe asize anler *National House*, akoz se la anler kot Parlman ti ete, ti pe pas en Lalwa ki ti dir ki si ou kit pei ou riske pa ganny drwa retournen, ou riske pa ganny drwa re antre.

E zot in montre ki zot in kapab fer sa avek Mrs Kathleen Pillay ki ti pe sey antre isi, e nou Gouvernman in deport enn son sitwayen lo avyon *Aeroflot*.

E Jean-Francois Ferrari parey son koutim, i ti fer sa ki nou tou mwan menm nou *included* nou ti napa kouraz pou fer. I ti al dan Lasanble ler zot ti pe *sit*, ler zot ti pe pas sa Lalwa e in zet son paspor i dir si zot pou fer sa la, la pran mon paspor akoz mwan mon pa pe kit pei pou zot kapab ki mwan laba deor! La, la ki sa garson i fer.

(Interruption)

HON BERNARD GEORGES

La, la laverite Mr Speaker. Paspur, paspor *Italien* zot in vwar mon zot in vwar mon sorti dan Lasanble pou al verifeye paspor *Italien* in vin 10an apre sa lensidan in arive.

Alor silvouple ler nou pret serman ler nou pret serman- E i ti ganny e i ti ganny pourswiv akoz in fer sa. E i ti ganny kondannen akoz in fer sa. Se sa se sa kalite dimoun se sa, sa kalite dimoun ki Prezidan Ramkalawan in swazir Mr Speaker pou met avek li pou met avek li dan son *Cabinet*.

E si i annan en dimoun. E si i annan en dimoun ki vo sa tit Minis ozordi, se pa lot ki Onorab Jean-Francois Ferrari.

Mr Speaker Onorab Pillay pe konplent, akoz mon pe koze. Me donn mwan en sans koze silvouple.

(Interruption)

HON BERNARD GEORGES

Me mwan me mwan depi, depi premye zour mwan osi mon pe travay. Mwan sa tit *Leader of Government Business* la mon'n travay avek depi avek Mr Ramkalawan depi 20an mon osi. *I've earned this job!*

(Interruption)

MR SPEAKER

Onorab Pillay. Ou, ou *complaint* ki lezot dimoun i enteronp ou. Ou, ou enteronp lezot dimoun. Zis silvouple annou nou tou respekte letan en lot dimoun pe koze, *ok?*

(Off-Mic)

MR SPEAKER

Mon'n fer li arete, mon'n fer li arete. Onorab Georges kontinyen prezan silvouple.

HON BERNARD GEORGES

E zot problemm Mr Speaker se ki zot...

(Interruption)

MR SPEAKER

Calm down.

HON BERNARD GEORGES

Zot pa kapab vwar, zot pa kapab vwar zot ler Onorab Pillay i deside donn mon laparol mon ava pran Mr Speaker.

(Interruption)

MR SPEAKER

Ou annan laparol Onorab Georges. Mwan ki donn ou laparol.

HON BERNARD GEORGES

Zot pa kapab vwar zot lizye in telman ganny bouse avek laenn ki zot pa vwar bann kalite sa msye ki ti met devan nou ozordi.

(APPLAUSE)

HON BERNARD GEORGES

Pourtan semenn apre semenn dan sa Lasanble, in montre zot son kalite, mannyer i kapab travay pou son distrik, mannyer i kapab anmenn devlopman pou son distrik, mannyer i kapab defann en Polisi, mannyer i kapab negosye e mannyer malgre ki zot sourd lo li i kapab anmenn bon Mosyon devan.

Mr Speaker mon napa okenn dout ki Onorab Ferrari pou enn bann Minis kle dan *Cabinet* Prezidan Ramkalawan. E mon krwar e mon krwar ki enn sa bann zanfan Sesel plis ki bokou parmi nou, annefe plis ki kekwfa tou dimoun isi dan sa lasal ki merit ki merit sa travay e ki merit sa dyob.

E si Prezidan Ramkalawan i trouve ki non selman, i bezwen vin Minis me i bezwen vin Minis Dezinyen se aköz Prezidan Ramkalawan i konnen valer sa garson e i konnen ki avek li i pou annan en kolaborater ki'n

travay avek li pou tou sa letan, ki konpran son fason travay e ki pou kapab anmenn sa manifesto ki nou'n ki zot in ganny elekte lo la, pou byennet Sesel pou sa prosen 5an.

Alor Mr Speaker avek sa detrwa parol, mon repet sa ki mon ti dir taler, mwan Bernard Georges ozordi mon pou *rubber stamp* sa Mosyon pou anmenn Jean-Francois Ferrari dan *Cabinet* Prezidan Ramkalawan. Mersi.

(APPLAUSE)

MR SPEAKER

Mersi Onorab Georges. Me aprezan pran Mosyon pou vote. E Mosyon parey nou'n amande i lir koumsa;- *in accordance with articles 63(1), 69(2) and 75 of the Constitution, this Assembly approves the proposed appointment by the President of the Republic of Mr Jean-Francois, Gabriel, Ferrari to the office of Minister and his designation as Designated Minister. Nou a vote all those in favour? Tou bann ki kont? Wi Madanm Clerk.*

Mosyon pou lapwentman Mr Jean-Francois Ferrari konman Minis e konman *Designated Minister* in ganny pase avek 23 vot pour, 2 vot

kont e 7 abstansyon. Alor Mosyon in pase.

(APPLAUSE)

MR SPEAKER

Onorab *Leader of Government Business*, eski ou pe kontinyen avek bann Mosyon?

HON BERNARD GEORGES

Wi Mr Speaker mon krwar i 5er mon pa konnen si nou ti a kapab pran 10 minit pou en *refreshment*, epi nou ava pran sa 2 lezot Mosyon.

MR SPEAKER

Annou pran 15 minit.

HON BERNARD GEORGES

15 minit, mersi.

MR SPEAKER

Wi alor nou a rebran 5.15.

(BREAK)

MR SPEAKER

Bon nou a rebran. Hon Georges.

HON BERNARD GEORGES

Mersi Mr Speaker. Mr Speaker prosen Mosyon i lir *in accordance with Articles 63(1) and 69(2) of the Constitution, this Assembly approves the proposed appointment by the*

President by the President of the Republic of Mr Billy, Anthony, Andrew Rangasamy to the office of Minister. Mersi Mr Speaker.

MR SPEAKER

Mersi nou a demann segonnman. Onorab Gervais Henrie.

HON GERVAIS HENRIE

Motion is seconded Mr Speaker.

MR SPEAKER

Mersi. Onorab Georges.

HON BERNARD GEORGES

Mersi Mr Speaker. Mr Speaker Mr Rangasamy i ti pe reste an deor Sesel in ariv Sesel, e mon konpran ki pou lemoman i dan i an karantenn, akoz i ti pe reste dan en pei kot nou egzize i bezwen al an karantenn. E i pa pou kapab donk prezan apre midi. E mon ava demann ou pou nou sanz sa prensip, sa prosedir ki nou ti'n ki nou ti'n adopte. Setadir pou demann tou bann kandida Minis pou vin devan Lasanble pou nou demann zot detrwa kestyon, avan ki nou debat lo zot apwentman. Pou sa rezon ki Mr Rangasamy pa kapab avek nou apre midi.

E mon *move* ki nou *proceed* donk direktman lo debat lo sa Mosyon. Tou Manm

i annan CV Mr Rangasamy, e donk sa i permet nou kapab fer en deba san ki nou *interview* Mr Rangasamy parey nou'n fer avek sa bann lezot manm ki'n vin la avan. Sa se mon Mosyon apre midi Mr Speaker. Mersi.

MR SPEAKER

Mersi. Ou a bezwen gid mon en pe lo prosedir la akoz mon en pe, mon en pe nouvo. Eski mon kapab pas laparol avek *Leader* Lopozisyon pou Mosyon ki Mr Georges in mete?

HON SEBASTIEN PILLAY

Mr Speaker pou lemoman mon pa konnen, i annan en dimoun personn mon ankor segonn Mosyon segonde? Segonde? *Ok* mon krwar mon pe konpran *Leader* Zafer Gouvernman akoz son *issue* se ki nou dan en letan ki pa normal. E si ti normal sa msye ti'n ariv lo *Airport* bomaten i ti prezant son lekor devan Lasanble, si i posibil. Me i bezwen al dan karantenn avan i kapab vin dan Lasanble. E son CV i n deza devan nou.

Sa ki ou pe demann mon se mwan mon krwar Lasanble i bezwen al lo deba lo sa Mosyon, so sa ki ou kapab fer Mr Speaker, zis demann bann Manm ki le entervenir lo kalifikasyon Mr Rangasamy. E bann Manm i ava endik zot

panse lo Mr Rangasamy, tel parey zot ava fer mon krwar petet *Leader Zafer* Gouvernman in azoute , tel parey zot ava fer pou Mr *Sylvestre* Radegonde. Mon ava demann ou Mr Speaker ou ava ouver lasal.

MR SPEAKER

Wi mersi. Selman pou nou spektater, nou telespektater deor, permet mwan zis dir en pti keksoz lo la avan nou prosede. Mon'n pase lo la en pe e mon'n regard Konstitisyon, e sa ki nou pou fer sizesyon Mr Georges mon oule dir i antyerman dan Lalwa *within the Constitution*. Sa ki'n nou'n fer pou bann lezot Minis, i en pratik ki Lasanble in adopte.

Selman mon le fer kler, ki sa 2 Lartik la ki nou'n refer avek souvan dan tou sa bann Mosyon, *in another words* Lartik 63(1) lartik 63 (1) i dir ki *'an appointment to an office or the designation of a person for any purpose by the President, is expressed to be subject to the approval of the National Assembly.'* Napa naryen dan Konstitisyon ki dir ki sa dimoun i devret la aprezan. Lasanble i konsider son apwentman, baze lo detay ki biro Prezidan in donn Lasanble.

E lot 69 (2) i lir, *'The President may, with the*

approval of a majority of the members of the National Assembly, appoint a person who is a citizen of Seychelles and who has attained the age of eighteen years, to the office of Minister. ' Zis pou fer kler ki akoz nou pe depar avek prosedir ki nou'n swiv, ki sa ki nou pe fer i korek, dapre Konstitisyon.

E avek sa mon annan en pe lankourazman, akoz mon konnen zot tou zot konn sa 2 kandida osi byen, so sa i ede en pe. Tre byen. Alor nou a prosede avek deba. Mon a demann Onorab Cosgrow pou konmanse.

HON WALLACE COSGROW

Mersi Mr Speaker. Mr Speaker, mersi pou donn mwan laparol. Parey bann lezot Manm mon krwar nou ti a voudre ki Mr Rangasamy i la prezan avek nou pou nou kapab kestyonn li, pou nou kapab ganny serten son bann pwennvi serten keksoz. Me nou'n konpran nou'n aksepte nou konpran poudir Mr Rangasamy i pa kapab prezan avek nou ozordi.

E alors mon pou limit mon entervansyon pou detrwa keksoz. Ler nou vwar CV Mr Rangasamy, son CV i koz pou li menm. I annan en kantite konpetans, dan domenn *Civil*

Engineering, dan domenn *Project Management* sirtou bann proze sivil, konstriksiyon in travay in en etidyan ekselan in travay Sesel. In travay dan plizyer pei lemonn, e mon sipoze se sa enn bann rezon ki oparavan ler Prezidan Faure ti pran sa desizyon, pou apwent li Minis, se sa, sa bann rezon ki Prezidan Faure ti vwar pou apwent li Minis.

Prezidan Faure osi ti met tou konsiderasyon politik akote e get son profesyonnalizm, son kontribisyon ki kapab fer pou Sesel konman en zanfan Sesel.

Mon pa tro anvì antre dan lepase, me solman i enportan ki nou fer resorti, ki Mr Rangasamy son lapwentman pa ti menm ni ganny konsidere par *previous* Lasanble.

Me ozordi nou vwar son lapwentman *or* demann pou son lapwentman, i retourn dan sa Lasanble demann par nouvo Gouvernman, Gouvernman Mr Ramkalawan. E mon sipoze Gouvernman Mr Ramkalawan in vwar osi konpetans sa msye e zot konnen ki kantite servis i kapab vin fer pou son pei.

So Mr Speaker, mon santi mwan konfortab, konfortab pou mon donn mon sipor Mr Rangasamy. Mon krwar i kapab kontribye en kantite dan sa domenn ki i ete. I en domenn

ki nou annan en kantite *challenges*, en domenn kot i annan en kantite lekspektasyon, e mon *hope* ki Mr Rangasamy i a kapab fer Sesel fyer. I a kapab anmenn son kontribisyon pou pep Seselwa. E mwan lo mon kote parey mon'n dir mon pou donn li mon sipor pou li kapab anmenn sa domenn en pti pe pli an avan. Mersi Mr Speaker.

MR SPEAKER

Mersi Onorab. Onorab Loze.

HON JOHAN LOZE

Mersi Mr Speaker. Mr Speaker, i fer dezyenm fwa ki Mr Rangasamy i mank en lapwentman, avek nou Lasanble. Sa voyaz nou tou nou kapab konpran ki ou servi en mo ki'n vin popiler depi *COVID force majeure*.

Be premye fwa ki i ti mank son lapwentman ti en aksyon *orchestre* par *LDS*. Sanmenm sa *LDS* ki ozordi pe anmenn li devan nou Lasanble. Mon pa konnen si sanmenm sa lekspresyon '*eating your hat*' '*swallowing your own hat*' ouswa '*eating crow*', mon krwar petet i plito '*eating crow*' sa enn.

Me *it takes nothing away from* Mr Rangasamy li menm. *He was fit to be a Minister*, letan zot ti zet li, e rezet li *he is fit to*

be a Minister now, letan ki zot in al anmas li kot zot in zet li, e remet li konman en kandida pou en pos ministryel.

Mon pa konnen *however* si Mr Rangasamy pou kapab fer zot konfyans. Pou kapab fer zot parti konfyans, pou kapab fer zot *leadership* e zot *Cabinet* konfyans, vwar li par lafason ki zot in azir anver li dan lepase. E bann keksoz ki'n ganny dir lo sa tretman ki i ti gannye *earlier* ozordi, e mon'n deza koz lo la pli boner.

Mwan personnelman, mon krwar ki Mr Rangasamy *is fit to serve as a Minister in the Republic of Seychelles*. Mon pou lev mon lanmen anler, pou donn mon laprouvasyon pou li al *serve* dan *Cabinet* Prezidan Ramkalawan. Sa ki mon pa krwar par kont se ki *Cabinet* Prezidan Ramkalawan i *deserve* Mr Billy Rangasamy. Sa mon pa krwar ladan.

Mon pa krwar ki zot *deserve* en dimoun ki zot in maltrete, dan lafason ki zot in maltret li, kot ni bonzour zot pa ti kapab dir li. Mon vwar lakanmizri dan zot lizye. Mon konnen i for pou zot anmennen sa enn. *But it has to be said*.

Lepep Seselwa i bezwen tande sa bann keksoz. Fanmir Mr Rangasamy i bezwen tande konmkwa ki pa nou tou isi

anndan, ki krwar ki Mr Rangasamy i kapab fer zot konfyans. I pou ariv en pwen kot *in the next 5 years* kot zot pou tret li ankor parey zot ti tret li la dernyen fwa. Mersi Mr Speaker.

MR SPEAKER

Mersi Onorab. Onorab Clifford Andre.

HON CLIFFORD ANDRE

Mersi Mr Speaker. Bonn apre midi ankor enn fwa. Mr Speaker Onorab ki'n koz avan mwan, in dir keksoz ki personnelman i pa konnen. Mon dir sa Mr Speaker akoz mwan mon en zanmi pros Mr Rangasamy. E letan i ti vin Sesel pou li pas atraver *interview*, nou ti annan en konversasyon nou de. E i ti eksprim serten konsern, e i pa ti zanmen dir mwan ki li i santi ki *LDS* in fer li en *disservice*, pou li pa pas atraver a sa prosesis ki i ti'n vin isi pou li pas atraver.

O kontrer, parey mon'n dir nou ti annan en dyalog, nou ti pran en dinen ansanm, kot nou ti ganny loportinite an fanmir pou nou kapab koze, e vwar ki mannyer li i kapab kontribye dan devlopman Sesel a lavenir.

E letan bann prosesis eleksyon ti pe pase, ankor nou

ti annan en konversasyon. E nou konversasyon ti viz ver lo ki manner kontribisyon i kapab ganny fer, pou ki Sesel i a benefisye avek larises ki tou son zanfan i annan ki ti enkli Mr Rangasamy.

Parey mon'n dir, mwan mon en dimoun ki'n konn li dan son parkour. Mon'n vwar ki in osi dan son letan lwazir Mr Speaker, fer keksoz ki pou egey tou Seselwa. In fer sanson li avek son madanm, 'Soley i a pe leve.' E ki i senboliz son swe e son partisipasyon dan devlopman son pei. Ozordi letan sa soley in leve ki li ti sante, i fyer pou li form par sa Gouvernman, ki pou kontinyen fer sa soley reste anler e ki kekfwa parey sanson i dir sa gro nyaz nwanr in ale...

(APPLAUSE)

HON CLIFFORD ANDRE

E savedir i montre ki poudir ki poudir, i montre ki poudir Mr Rangasamy ti annan en vizyon dan son sanson e alors se sa vizyon ki li i pou anmennen dan sa devlopman Sesel anba direksyon Prezidan Mr Ramkalawan.

Mr Speaker, mon pou dir ki, Mr Rangasamy i annan son garson, son 2 garson, ki zot osi

zot in form par dan serten sanson. E zot bann zanfan ki'n ganny e leve dan en fason *humble*, dan en fason disiplin si oule, e sa i osi demontre disiplin ki Mr Rangasamy i pou anmennen dan en Minister.

I pa la pou li temwanny sa li menm. Alors mon santi mwan oblize pou mwan fer sa bout, pou li. Mon'n annan en pti konversasyon avek li taler atraver *WhatsApp*. So in dir ek mon dir avek zot pou ki dir li son swe se pou fer sir ki i vin travay pou Sesel, akoz i krwar dan sa moto ki "Sesel i pou tou son zanfan."

So alors Mr Speaker parey mon'n dir, mwan mon pou lev mon lanmen anler akoz mon en zanmi avek Mr Rangasamy, me akoz osi mon krwar dan son abilite ki nou tou nou'n vwar lo papye, ki i kapab deservi Sesel. Pou fer sir ki sa departman kot i a ganny mete, son bann ekspertiz son bann kalifikasyon i montre nou ki i viz ver en landrwa kot i annan bann devlopman bann *civil engineering works*.

So mon sir ki Prezidan Ramkalawan in pran sa an konsiderasyon e ki Billy Mr Rangasamy i a ganny sans pou li deservi Sesel *to the best of his ability* e fer nou tou fyer. Alors Mr Speaker mon ti mon konnen

lezot lot kote pou donn sa sipor alors, mon ti ava zis demande ki nou fer sa prosesis e nou vot pou Mr Rangasamy. Mersi.

MR SPEAKER

Mersi Onorab. Onorab Sebastien Pillay.

HON SEBASTIEN PILLAY

Mersi Mr Speaker. Bonn apre midi. Bonn apre midi tou koleg. E bonswar tou dimoun ki pe ekout nou. E mon krwar en bonswar spesyal i al pou Mr Rangasamy ki finalman ou CV in ariv devan Lasanble. E mon kontan ki entervenans avan mwan in koz parey in koze mon zis demann mon lekor kote son lalang i ete ler CV ti premye fwa? Me, *it's water under the bridge* e nou bezwen *move on*. E taler, taler Mr Speaker *Leader Zafer* Gouvernman in pran en in pran li par mwens ki apepre 10 minit, pou li blanm nou, atak nou lo tou bann loportinite ki nou'n manke ler nou ti pe pran pozisyon ki nou'n pran avek Onorab Ferrari.

E ti vreman *hors* karakter *Leader Zafer* Gouvernman, me mon konnen parfwa ler ou annan serten louvraz ou bezwen fer li dan serten fason.

E ou bezwen sanz langaz ki ou servi, aköz ozordi ou pe reprezant Gouvernman, alors

probableman sa i mont dan nou latet osi i fer nou koz serten keksoz.

Mwan mon ti ava'n prefere pou zwenn Mr Rangasamy e pou donn, pa neserman aköz mwan mon anvi zwenn li, me pou donn Lepep Seselwa bann ki pa pou konn li en loportinite pou zot kapab ekout li, e koz ek li.

E mon ti ava demann Lasanble dan *the shortest delay possible*, apre ki tou bann prosedir ki sipoze ganny fer, ki sa msye i a kapab vin devan Lasanble, e Seselwa i a kapab konn li en pe plis sirtou bann ki pa konn son parkour. Me mwan, mwan mon rapel tre byen son parkour, aköz pou premye fwa ki mon ti mon ti tann nonm Mr Rangasamy sete en program lo televizyon, ki ti pe koz lo son performans ki ti'n fer dan *A Levels*, e i ti'n ganny en A mon krwar pou *maths* pou son *A Level*. Se bokou dimoun bokou bann etidyan ki'n antre Politeknik in si oule souvan mansyonn son non. In toultan *sort of* en legzanp. En legzanp pou bokou profesyonnel, pou bokou zenn Seselwa, kot ler ou travay dir ou kapab *achieve* en kantite keksoz.

E mwan personnelman, mon napa okenn dout *as to* son

abilite. Akoz son CV nou'n ganny ase letan pou nou pas lo son CV depi ler nou'n ganny li. E nou pa pou fer li en letap kot nou pou nou pou *unnecessarily* fer sa prosedir avek Mr Rangasamy vin pli difisil ki i ete. Akoz mon krwar in pas dan en fwa, i pa nesese pou li pas ladan en dezyenm fwa.

Ozordi i pe ganny i pou ganny leloz lo lot kote latab, mon ti espekte zot pou donn li leloz, pli gran leloz posib. Mon pa krwar Mr Rangasamy i enterese avek leloz ki nou pe kapab donn li, me plito enteresan avek travay ki kapab fer pou son pei.

E ler nou regard son bann kalifikasyon, ki i annan e bann diferan pei ki in travay ladan i, i montre nou ki ti annan en rezon akoz, akoz Gouvernman an pandan letan 6em Lasanble ti deside prezant son kandidatur konman Minis.

E si zot ti santi parey zot pe santi, zot ti'n kapab depi *then* donn li sa loportinite. Me lefe i reste ki in ariv devan nou Lasanble ozordi, e ozordi avek Mr Rangasamy kontrerman avek kandida ki'n prezant son lekor oparavan, sa enn kandida ki la, nou pou siport li.

Mwan mon pou siport li personnelman, akoz mon krwar i pe vin travay pou Sesel. Mon

krwar i pou travay pou Sesel dan tout enparsyalite. Mon krwar i pou fer son louvraz avek en avek en *open mind*. I pou fer tou sa ki posib pou li kapab anbelir pou son pei, e pou kontribye pou son pei. E mon pou demann tou mon bann koleg ki kapab fer li, ki i annan en lopinyon parey mwan menm pou siport li. Mon pa pou egzize ki mannyer zot pou vote lo Mr Rangasamy, me mon krwar i en kandida ki nou, nou kapab nou kapab promot li.

Rubber stamp i vin letan nou letan nou pa kapab nou pa kapab kestyonn en kandida. Nou pa kapab kestyonn son abilite e ler nou annan en lopinyon diferan nou atak lezot dimoun son lopinyon diferan

Dan ka Mr Rangasamy i pa en *rubber stamp* sa Mr Rangasamy ti'n deza ganny prezante pou vin en Minis dan piblik Sesel. E mon krwar i pa nesese ki nou ki nou fer *polemic* avek sa sityasyon, akoz zot in konmanse sey fer serten *polemic* avek akoz mon ti espekte zot pou sey pran en mea koulpa pou sey pou sey zistifye lafason ki zot ti tret son vin devan Lasanble.

Ozordi mon krwar lafanmir Rangasamy i devret tre fyer. E mon santi poudir avek Mr Rangasamy dan, dan en

Gouvernman, pe enport *whether* i ti pou dan en Gouvernman *US* ou swa dan en Gouvernman *LDS*, i pou en dimoun ki mon krwar i pou travay avek enparsyalite, avek lanmour pou son pei.

E i en dimoun ki sertenman i en zanfan Sesel ki sertenman *deserve* son sans. Mersi Mr Speaker.

MR SPEAKER

Mersi Onorab. Onorab Georges ou pou fer rezimen?

HON BERNARD GEORGES

Mersi Mr Speaker. Mr Speaker mon napa en gran kantite keksoz pou dir mon krwar ki tou dimoun in reini deryer sa propozisyon apwent Mr Billy Rangasamy. Mon'n lir son *CV* parey tou dimoun. E i en i paret en dimoun egzampler. E mon sir se pou sa rezon ki i pe ganny swazir.

Onorab *Leader* Lopoziyon in dir nou *water under the bridge* annou pa retourn lo sa ki'n arive avan epi li in retourn lo la 5/ 6 fwa mwan mon pa swiv son legzanp.

It is water under the bridge. Mr Rangasamy pe ganny son sans. Me mon ti a kontan dir en pti keksoz e pou ki nou konpran tre byen en Gouvernman, sa mo, sa mo en

Gouvernman *LDS*, oubyen Gouvernman *US or whatever* mon pa krwar i tro apropiye dan en sistenm ki nou annan isi.

Mon krwar set en Gouvernman Sesel anba direksyon en Prezidan ki sorti dan *LDS*. I pa kestyon Gouvernman, en Gouvernman *LDS*. E mon krwar i montre tre byen atraver son *Cabinet of Ministers*, ki se prezizeman sa ki Prezidan Ramkalawan pa anvi. I anvi en Gouvernman ki reprezant Sesel an antye.

E ki pou travay pou Sesel an antye e pa en Gouvernman *made up of* politisyen ki sorti dan *LDS*. E sa kekfwa i ava reponn en pti pe kestyon lo akoz dan lepase dan serten ka en desizyon ti ganny pran dan sa Lasanble, an koneksyon avek bann Minis. Pa an koneksyon avek Mr Rangasamy, mon *proceed* pou mwan dir.

Mr Speaker mersi pou ou laparol, Mr Rangasamy pou ganny natirelman sipor lo nou kote latab. Mersi.

MR SPEAKER

Mersi. E mon a relir Mosyon;- *In accordance with Articles 63(1) and 69(2) of the Constitution, this Assembly approves the proposed appointment by the President of the Republic of Mr*

Billy Anthony Andrew Rangasamy to the office of Minister.

Tou bann ki pour lev lanmen silvouple? Silvouple relev lanmen silvouple e tenir li en pti pe anler. *Ok Madanm Clerk.*

Alor Mosyon pou aprouv ekout mon silvouple Mosyon pou aprouv apwentman Mr Billy Rangasamy in pase par 31 vot pour, 0 vot kont e 0 abstansyon. E sa annou felisit li pou en aprouvasyon inanim. Mersi.

(APPLAUSE)

MR SPEAKER

Mersi. Onorab Georges ou a prosede.

HON BERNARD GEORGES

Mersi Mr Speaker. Mr Speaker nou dernyen Mosyon dan sa seri Mosyon. E nou dernyen Mosyon pou ozordi i lir *comme suivan; - in accordance with Articles 63(1) and 69(2) of the Constitution, this Assembly approves the proposed appointment by the President of the Republic of Mr Louis, Sylvestre Radegonde to the office of Minister.* Mersi Mr Speaker.

MR SPEAKER

Tre byen. Eski nou annan segonde? Onorab Terence Mondon.

HON TERENCE MONDON

Mersi Mr Speaker mon segonn sa Mosyon.

MR SPEAKER

Mersi. Nou a en lalis pou deba, tre byen. Nou a konmans avek Onorab Ghislain.

HON CHANTAL GHISLAIN

Mersi Mr Speaker. Bonn apre midi ankor tou dimoun, mon pou tre bref Mr Sylvestre Radegonde malgre nou ti ava'n vwar li la. Me selman dan bann sirkonstans parey in ganny dir ki i pa pe kapab la. Nou tou konnen poudir Mr Sylvestre Radegonde i en zanfann La Digue, in ne La Digue *and* an plis ki sa Radegonde mon manman i Radegonde en. *And* mon konn li tre byen, *and* bann letan parkour kekfwa ki mon'n kapab rankontre li pou lo kote profesyonnel, sete dan bann moman kot ou ti pe konmans swazir en karyer, *and* li i ti dan laz diplomasi, *and* nou ti pe koze. Mon ti ankor pe etidye mon fer mon *A Levels Humanities and Sciences.*

Mon ti pe tante pou konmans al laba, be apre mon dir non, mon krwar mon en pti

pe tro antete pou al dan la diplomasi plito mon pran zournalizm. *And* i ti enn bann dimoun ki ti ankouraz mon en kantite pou ale. *And* mon konnen Mr Sylvestre Radegonde i en dimoun ki tre *humble* i sorti dan en fanmir *humble and* mon zis espere ki i kontinyen aport sa *charm* Digwaz partou kot i ale. Vwala mon konnen mon pou donn li sipor vreman, pa zis akoz i en zanfan La Digue me mon konn li personnelman. Mersi Mr Speaker. E mon konnen i pou fer en bon louvraz akoz in toultan travay dan la diplomasi, e i en Diplomat. Mersi Mr Speaker.

MR SPEAKER

Mersi Onorab. Onorab Aglae.

HON EGBERT AGLAE

Mersi Mr Chair. Mon pa pou long. Mr Speaker, Mr Radegonde, i en personnalite ki depi mon pe lekol mon mazine mon'n tann son non. E nou vwar li lo televizyon, e in en dimoun ki'n mark mon en kantite lafason ki in profesyonalizm son travay dan tou sa bann domenn ki in ladan.

E in montre poudir i kapab delivre konman en Seselwa lo nivo lokal e lo nivo

enternasyonal. Ki'n fer li ganny sa tit Anbasader li menm.

E a okenn moman in lev paviyon Sesel partou kot in ale. E sa nou bezwen rekonnet e nou bezwen siport bann tel Seselwa parey ki'n fer sa.

E Mr Radegonde ozordi i pe ganny aprouve pou vin Minis e mon konnen e mon konvenki ki i pou fer byen sa travay ministeryel dan son portfolyo, ki i pou ganny mete. E mon swete ki i kontinyen i kontinyen lev paviyon Sesel pou fer ki nou ava al ankor pli devan, menm dan sityasyon ki nou ladan. Mon konvenki ki i pou zwe en rol enportan, ekstrememan enportan pou kapab annan bann lyen enternasyonal pou kapab sofgard sa ki nou'n deza annan e menm rod plis sipor pou Sesel, kapab sorti dan sa kriz ki nou ladan.

E avek sa Mr Speaker mon napa dout, mon napa regre osi, mon pou donn li mon vot parey nou bann Manm mon krwar i espekte fer. Mersi.

MR SPEAKER

Mersi Onorab. Onorab Georges ou pou rezimen? Ale Onorab Terence Mondon.

HON TERENCE MONDON

Mersi Mr Speaker. Mon ti'n lev mon lanmen pou koz brefman.

Mr Speaker Mr Radegonde in fer en long parkour dan servis piblik kot in akimil leksperyans e konesans nesaser pou deservi nenport portfolyo Ministeryel.

E nou vwar ki depi 1974 i ti konmans servis dan Lafors Lapolis e in servi lo plizyer *Board* tel ki *Air Seychelles SCAA*, *STB* e in Sekreter Prensipal e in osi travay konman Diplomat atraver Minister Zafer Etranzer.

In fer 46an servis pou son pei. Pou mwan mon'n ganny sans konn li. I en zom ki drwat e zis, e i krwar dan bann bon prensip, bann prensip bonn gouvrenans. E mon'n konn li pandan letan ki mon ti pe etidye an *Belgique* kot li i ti Anbasader ki ti pe kouver Linyon Eropeen.

Parey in ganny dir Sylvestre Mr Radegonde i en zom *humble*, en zom ki posed bann kalite ki dan Ramkalawan i bezwen pou fer marse son program. E mon kontan, mon kontan, ki Prezidan in rekonnet valer Mr Radegonde.

Alors son konpetans ek karakter i fer Mr Radegonde sa zom ki nou bezwen dan sa pozisyon Minis, alor parey lezot mon pou donn tou mon sipor. Mersi Mr Speaker.

MR SPEAKER

Mersi Onorab. Onorab Georges.

HON BERNARD GEORGES

Mersi Mr Speaker. Mr Speaker mon ti anvi zis azout detrwa mo mwan osi. Mon konn Mr Radegonde depi en bon pe letan pase. E tou sa ki'n ganny dir ozordi i absoliman apropiye a regar sa dimoun.

Mon ti ava zis kontan azoute e dir ki Mr Radegonde i konplet sa levantay Seselwa ki sorti Sesel oubyen ki viv aletranze, ki zenn ki pli ki mwen zenn, ki msye ki madanm e ki fer ki en *Cabinet* ki pou byen reprezantatif Nasyon Seselwa.

E mon krwar se sa ki donn, ki donn sa *Cabinet* en, en lanpler e en labote ki mon pa kapab trouv en lot mo ki egzampler e mon krwar nou ,ava reste ek dan menm sa mo.

Mr Radegonde i anmenn sa dernyen latous a en zoli group dimoun, ki pou travay ansanm parey nou'n antann zot dir dan en sel bi, e sa se pou promouvwar lentere nou Nasyon Sesel. Alor parey mon'n fer avek tou bann lezot kandida avan, mon ti a kontan zis anmenn mon sipor. E demande ki ankor enn fwa akouz nou'n koz tre byen lo sa kandida ki'n montre sa par lafason ki nou

pou vot vote apre midi. Mersi
Mr Speaker.

MR SPEAKER

Mersi. Mon a relir Mosyon pou nou pas nou vot. *In accordance with Articles 63(1) and 69(2) of the Constitution, this Assembly approves the proposed appointment by the President of the Republic of Mr Louis, Sylvestre Radegonde to the office of Minister.*

Nou a vote. *All those* pour Mosyon lev lanmen silvouple. Mersi. Mersi Madanm Clerk. Mosyon pou aprouv apwentman Mr Sylvestre Radegonde in pase avek 30 vot pour, 0 vot kont e 0 abstansyon. Alor mon deklar Mosyon *pass*. Mersi.

E sa i fer trwazyenm vot inanim, trwazyenm vot inanim dan en sel zournen, e si sa pa en rikord, mon krwar i pre pou en rikord. E i tre byen pou lavenir nou Lasanble, ki nou kapab travay byen ansanm ler nou arive dakor lo sa ki devan nou. Mersi.

Alor avek sa nou pou *adjourn* me mon le Lendi konze piblik donk Mardi Lasanble i a rebran 9er.

(ADJOURNMENT)